

Varu poia to Yoan imbooda

Jon

Ŋgeu to ipatoonj ghiit pa saveeŋ ve ngar to Maaron, to izi inim taan ve inim tamtoghon

1 ¹Muunj kat, sawa to sambam ve taan tivot sone, ŋgeu to ipaghazonjan ghiit pa saveeŋ ve ngar to Maaron ne inepneep.^a

Ye ineep toman Maaron, ve ye Maaron.^b

²Tovenen sawa to ivot muunj kat, ye inepneep toman Maaron. ³Maaron ighur mbeb tisob tivot ila ye nima. Mbeb eta ivot ila ataam ite paam maau.^c

⁴Ye to nepoonj mata yaryaara pughu. Ve nepoonj toni izi taan, tauto inim ghazooŋa pa tamtoghon.^d

⁵Ghazooŋa tonowen iyaryaara ila ndoroom lolo, ve ndoroom tapiri irau itatani maau.^e

⁶Maaron imbaaŋ ŋgeu eez inim, iza Yoan. ⁷Ye inim pa ipariaaŋ saveeŋ pa ghazooŋa tonenen. Leso igham ival tisob tighur ila toni.^f

⁸Yoan, ye ghazooŋa tonenen maau. Ye inim pa ipariaaŋ saveeŋ to ŋgeu to ghazooŋa tau. Leso tamtoghon tighur ila toni.^g

⁹Tovenen ghazooŋa tau to iyaryaara pa ival tisob ve ipaghazonjan di pa Maaron, tauto izi inim taan.^h

a 1:1 Ila Grik aliŋadi, Yoan iwaat Kriŋi ighaze ye ‘logos.’ Saveeŋ ‘logos,’ pughu naol. Pughu eez, nene ‘saveeŋ.’ Pughu ite, nene ‘ngar.’ Pughu inim tol pani, nene mbeb to ikis mbeb tisob tineep denja ila inadi inadi. Ve ighaze tagham ngar pa Maaron aliŋa to timbooda, saveeŋ toni, nene ataam to ye ipatoonj tau pait, ve ipaghazonjan ghiit pa ngar toni. Ve saveeŋ toni, nene saveeŋ moghon maau. Saveeŋ toni, le tapiri. Ye isaav moghon, ve mbeb tisob tivot. Saveeŋ ‘logos’ pughu naol tonene tipaghazonjan ghiit pa Kriŋi ve uraat toni.

b 1:1 Mbnp 1:1; Yo 10:30, 17:5; Pil 2:6; 1Yo 1:1+; Syg 19:13 **c 1:3** 1Kor 8:6; Kol 1:16+; Hib 1:2 **d 1:4** Yo 5:26, 8:12, 9:5, 12:46 **e 1:5** Ataam ite to tatoon saveeŋ waaro tonene, nene vene: “Ghazooŋa tonowen iyaryaara ila ndoroom lolo, eemoghon yes to ndoroom ledi ghilaloonj pani maau.” **f 1:7** Mt 3:1 **g 1:8** Yo 3:28+ **h 1:9** Yo 8:12, 9:5; 2Kor 4:6

¹⁰Onoon, mbep tisob to taan tivot ila ye nima. Eemoghon sawa to ye izi inim ve ineep izi taan, yes to titaghon taan ngara tighilaala maau. ¹¹Ye ila ivot tau ndug toni, ve tamtoghon toni paam tighami maau. Tizuruni.ⁱ ¹²Eemoghon tamtoghon tisob to tighur ila toni ve tighami inim Tiina todi, nene ye igham ledi izadi pa tinim Maaron ndinatu.^j ¹³Ndiran tonenen, sirj to nditamandi ma nditinandi igham di tinim Maaron ndinatu maau. Ve tinim Maaron ndinatu itaghon ngeu eta to taan ngar toni ma lolo maau. Maaron tau, tauto igham di tinim ye ndinatu.^k

¹⁴Tovenen aghita. Ngeu to ipaghazonan saveej onoon ve ngar to Maaron pait, tauto inim tamtoghon ve inim ineep ila sosood wa. Ye ipatoonj Maaron tapiri ve poia toni ivot ighazonj, ve yei nighita pa matamai. Tauto nighilaala nighaze ye Maaron tau Natu ee moghon to ineep to Tama Maaron ve inim. Poia to Maaron toman ngar toni to isasavia saveej onoon moghon, nene ivon ila to Natu tonowen.^l

¹⁵Yoan ipariaanj tamtoghon pa tighur ila toni, ve isaav aliija tiina ighaze: “Muuj, you nasaav payam naghaze: ‘Ngeu eez pale inim muri payou. Ye iza ilib payou kat. Pasa, sawa to navot sone, ye ineep muuj wa.’ Nene ngeu tau tonene.”

¹⁶Onoon kat. Ngar popoia naol tivon ila to Maaron Natu, ve ye irei poia toni pa iit tasob. Tovenen poia to Maaron to aazne iza toit, nene tiina kat. Ilib pa poia toni to muuj ipatoonja pait. ¹⁷Onoon, Maaron ivotia tutuuj toni pait ila Mose avo. Eemoghon Yesu Krisi, tauto inim ataam pa poia to Maaron iza toit, ve ipaghazonan ghiit pa saveej onoon.^m

¹⁸Tamtoghon eta to taan ighita katin Maaron nagho pa eta sone. Natu moghon to ipatoonj Maaron nagho ve ngar toni pait. Pasa, ye Maaron, ve ineep Tama dige, ve Tama lolo ineep toni kat.

Yoan ngeu rughuzaanja ipariaanj tamtoghon pa tighur ila to Yesu
(Mt 3:1-12; Mk 1:1-8; Lu 3:1-18)

¹⁹⁻²⁰Sawa eez, daba to yes Yuda to tineep Yerusalem ne, timbaanj ndiran pida to watoonjrau toman nginiinja pida to Rumai Tiina tila to Yoan, ve tighasoni tighaze: “Laak, yom sa ngeu, to ughamgham uraat tonene?”

Yoan isaav ghazonja padi ighaze: “You tonene, Mesia maau.”ⁿ

²¹Tovenen tighasoni muul: “Ighaze venen, avaat yom propet Ilia tou?”^o
Ye ipamuul alijadi ighaze: “Maau.”

i 1:11 Is 53:3; Yo 12:37+ **j** 1:12 Yo 3:15; Ro 8:14+; Ga 3:26; 1Yo 3:1+ **k** 1:13 Yo 3:3,5+; Tit 3:5+; 1Pe 1:23; 1Yo 5:1+ **l** 1:14 Pil 2:6+; Kol 2:9; 1Tim 3:16; Hib 2:14; 1Yo 1:1+
m 1:17 Ataam ite to tautoo saveej waaro tonene, nene vene: “Eemoghon Yesu Krisi, tauto inim ataam pa poia to Maaron iza toit, ve igham saveej mbuaanj to Maaron anoja ivot.”
n 1:19-20 Yo 3:28 **o** 1:21 Mal 4:5; Mt 11:14

Tovenen tighasoni muul tighaze: “Wai, vene yom avaat propet tiina to nisasarjani ne?”^p

Taum tonene?”

Eemoghon ye ipamuul aliñadi muul ighaze: “Maau.”

²²Tovenen tighasoni muul tighaze: “Wai, ighaze venen, yom sei kat? Upaghazonan taum payei lak! Leso nipaesia ghom pooi pa yes to timbaan ghei ninim.”

²³Tovenen Yoan isaav padi ighaze: “You ngeu to muun, propet Isaia isavia ne ighaze:

Ŋgeu eez imboboob izi ndug balim ighaze: ‘Apasalungan ataam pa Ŋgeu Tiina le denja moghon.’”^q

²⁴⁻²⁵Yes to tila tighita Yoan, ndiran tutuunja pida tila toman di paam. Tiloon Yoan aliña tonene, ve tighasoni muul tighaze: “Ighaze yom Mesia maau, ve yom Iliia maau, ve yom propet tiina to nisasarjani ne maau, pughu vena to ururughuuz tamtoghon?”

²⁶⁻²⁷Yoan ipamuul aliñadi ighaze: “Nene you narurughuuz tamtoghon pa ya. Eemoghon ngeu eez inepneep ila lolomim, ve yam aghilaala maau. Ye inim muri payou, eemoghon ilib payou kat. Uraat sorok inimale polaang waar to duduunja to aghe, nene paam, you poiag irau to naghham pani maau.”

²⁸Mbeb tonenen tisob tivot izi ndug Betania to inep ya Yordan panja vena we. Pasa, Yoan irurughuuz tamtoghon izi tonowe.

Yesu, ye sipsip to Maaron

²⁹Mboŋ le ndugizau muul, ve Yoan ighita Yesu ilaagh narua inim. Tovenen isaav ighaze: “Aghita. Nowe sipsip to Maaron. Ye inim pa ireu sosor to tamtoghon to taan.”^r

³⁰Ŋgeu tonene, to muun nasavia payam naghaze: ‘Ŋgeu eez pale inim muri payou. Eemoghon ye ilib payou kat. Pasa, ye inep muun wa, ghoru you navot.’^s

³¹Muun, you paam naghilaala maau. Eemoghon you nanim ve narughuuz tamtoghon pa ya, lesu nagharaat ataam pani, ve navotia pa yes Israela.”

³²Yoan ighaze ipariaan di pa tighur ila to Yesu. Tovenen ipaes padi ighaze: “Taug naghita Maaron Avuvu ipul sambam, ve izi inim inimale man mbaluuz, ve inep izala ngeu tonene pogho.”^t

p 1:21 Iliia, ye propet ariana to muun ivotia Maaron aliña pa yes Israela. Yes Yuda tigham ngar pa saveen to inep ila Malakai 3:1, 4:5-6, tauto matadi ingal tighaze Maaron pale imbaan Iliia ila ivot padi muul, lesu igharaat ataam pa Mesia. Ve tighaze Maaron pale imbaan propet tiina eez padi, itaghon saveen to Lo 18:15-19. Pida tighaze propet tonowen pale Mesia. Ve pida tighaze ye pale igham uraat to propet moghon. **q 1:23** Is 40:3
r 1:29 Igham 12:3+; 1Kor 5:7; 1Pe 1:19; Syg 5:6 **s 1:30** Muun kat ve inim, Yesu inepneep toman Tama Maaron izi ndug sambam. **t 1:32** Mt 3:16

³³Muunj, you paam naghilaala maau. Eemoghon Ijgeu to imbaan ghou nanim pa narughuuz tamtoghon, ye isaav payou ighaze: ‘Sawa eta, yom pale ughita Avuvu Patabuanj izi inim, ve ineev ila to ngeu eta. Ijgeu tonenen, to pale irei Avuvu Patabuanj pa tamtoghon.’^u

³⁴Ve alooj. You naghita katin mbep tonenen pa taug matag wa. Tauto nasaav ghazooja payam. You naghur ila naghaze ngeu tonene ye Maaron tau Natu.”^{v w}

Andreas yesuru Simon Petrus tinim taghoniija to Yesu
(Mt 4:18-22; Mk 1:16-20; Lu 5:2-11)

³⁵Mboj ndugizau, ghoru Yoan iyondyood muul toman taghoniija toni ru. ³⁶Yoan mata ila le ighita Yesu ilaagh ila. Tovenen isaav padi ighaze: “Aghita. Nowe sipsip to Maaron.”^x

³⁷Taghoniija toni ru tonenen tilooj Yoan isaav tovene ve yesuru tipul Yoan, ve tila titaghon Yesu. ³⁸Yesu mata imuul, ve ighita di titaghoni tinim. Tovenen ighason di ighaze: “Yamru akaal sa?”

Yesuru tipamuul aliija tighaze: “Rabi, yom unepneep sine?” (Saveej ‘Rabi,’ pughu tovene: ‘Patojaanj.’)

³⁹Yesu isaav padi ighaze: “Yamru anim toman ghou, ghoru aghita.” Tovenen yesja tila tighita ruum to ye inepneep pani. Sawa tonenen, rabrab izi wa. Ndag anunu igham paan ma venen. Yesuru tineep toman Yesu le mboj izi. ⁴⁰Ndiran ru to tilooj Yoan aliija ve titaghon Yesu, eez nene Andreas to Simon Petrus tazi. ⁴¹Tinepneep le isob, ghoru Andreas imundig, ve malmali ila ikaal togha Simon muunj. Ila indeeja, ve isaav pani ighaze: “Ulooj. Yei nighita Mesia wa.” (Saveej ‘Mesia’ ve ‘Krisi,’ nene pughudi ee moghon.)^y

⁴²Tovenen Andreas igham togha Simon, ve yesuru tila to Yesu. Yesu ighita Simon, ve isaav pani ighaze: “Yom Simon, Yoan natu. Muri pale tiwaat izam tighaze Kepas.” (Pisis ‘Kepas,’ yes Grika tiwaata ila alijadi tighaze ‘Petrus.’)^{z a}

Yesu ipoi Pilip yesuru Natanael paam tinim taghoniija toni

⁴³Mboj ndugizau muul, ghoru Yesu mata injal ighaze ila pa taan suruvu to Galilaia. Ilaagh ivot to ngeu eez, iza Pilip, ve isaav pani ighaze: “Yom

u 1:33 Mk 1:8; Yo 14:16; Mbanj 2:1+ **v 1:34** Ataam ite to tator saveej waaro tonene, nene vene: You naghur ila naghaze ngeu tonene, Maaron isia ve ighuri pa uraat toni. **w 1:34** Mt 3:17 **x 1:36** Yo 1:29 **y 1:41** Saveej ‘Mesia,’ nene Hibru alijadi. Ve saveej ‘Krisi,’ nene Grika alijadi. Ila saveej English tighaze ‘anointed.’ Saveej waaro ru tonene, pughudi ee moghon: ‘Ijgeu to tiliij ngoreej izala pogho.’ Yes Israela tighamgham tovene pa yes to tighur di pa ghamuunj uraat tiina pa Maaron, inimale kinik todi, yes propeta, ve ndiran to watoonjrau. **z 1:42** Kepas, nene yes Aramea alijadi. Ve Petrus, nene yes Grika alijadi. Pisis ru tonene, pughudi ee moghon. Nene ‘yaam.’ **a 1:42** Mt 16:18

unum utaghon ghou.”⁴⁴ Pilip ndug toni, nene Betsaida. Pilip, Andreas, ve Simon, yes tol, ndug todi ee moghon. ⁴⁵Ghoro Pilip ila ikaal ita ite Natanael le indeeja, ve isaav pani ighaze: “Ulooj. Ijgeu to muuj Mose imbood saveeja ila tutuuj toni, ve propeta pida timbood saveeja paam, tauto aazne nighita wa! Ye iza Yesu. Ye ngeu to ndug Nasaret, ve tama iza Yosep.”^b

⁴⁶Eemoghon Natanael isaav pani ighaze: “Wai, mbeb poia eta irau ivot ila ndug Nasaret?”

Pilip ipamuul aliya ighaze: “Unum tala, ve taum ughita pa matam!” Tovenen timundig ve tila.

⁴⁷Yesu ighita Natanael injarua inim, ve isaav ighaze: “Aghita. Ijgeu to inim ne, ye Israel tau. Ijgar kaarom eta ineep ila lolo maau.”^c

⁴⁸Tovenen Natanael ighason Yesu ighaze: “Yom uwatag ghou vena?”

Yesu ipamuul ghasoniij toni ighaze: “Pilip isavia ghou payom sone, ve you naghita ghom unepneep izi ai fik paroꝛania.”

⁴⁹Natanael ilooj saveej tonene, ve ighaze: “Rabi, yom Maaron Natu. Yom moghon to kinik to Israel.”^d

⁵⁰Yesu ipamuul aliya ighaze: “Natanael, vena? Saveej tiou to naghaze naghita ghom unep izi ai fik paroꝛania, tauto igham ghom ughur inim tiou ne? Ulooj. Muri, yom pale ughita mbeb tintina pida to tilib pa mbeb tonene.” ⁵¹Ve Yesu isaav padi muul ighaze: “You nasaav payam: Onoon kat, muri yam pale aghita sambam ikaak, ve ajea to Maaron tiip taghon Tamtoghon Natu tizizi ve tizaza.”^{e f}

Yesu itoor ya inim vaen izi ndug Kana

2 ¹Mboj ru inim ila, ve ite inim tol pani, ghoro vaiuuj to ngeu eez ivot izi ndug Kana to ineep izi taan suruvu to Galilaia. Yesu tina ila tonowe pa ighita vaiuuj tonowen. ²Ve tipoi Yesu toman taghoniija toni pa tila pa vaiuuj tonenen paam. ³Marewaan to vaiuuj tonenen ivot, ve tighanghan ve tighunghun ila le vaen isob. Tovenen Yesu tina isaav pani ighaze: “Ughita. Vaen todi isob wa.”

⁴Yesu ipamuul aliya ighaze: “Tinaj, yom usaav payou pasa? Nene mbeb to ituru maau. Pasa, sawa to napatooj taug navot ghazooja, nene sone.” ⁵Ghoro tina isaav pa yes mbesooja ighaze: “Alooj! Ighaze ye isaav payam pa agham mbeb eta, yam ataghon aliya moghon.”

⁶Ruum to ghanghaniij ivot pani, tighur uur tintina liim ve eez to tigharaat di pa yaam ne tineep pataghaaj wa. Leso titib ya ila, ve timen

b 1:45 Mt 2:23 **c 1:47** Mbo 32:2; Ro 2:28, 9:6+ **d 1:49** Mt 2:2, 16:16, 27:42; Yo 12:13
e 1:51 Sawa to Yakop ighau pa togha Esau, vibiiij eez ivot pani, ve ighita mbeb inimale ndeet to iyoon izi taan, ve izala pa sambam. Ve ajea to Maaron tiip taghon ndeet tonowen tizizi ve tizaza. (Ughita Mbnp 28:12.) Mbeb tonenen ipatooj ghiit pa Yesu. Pasa, ye pale ilup Maaron to sambam ve iit tamtoghon to taan, inimale ndeet tonenen. Ve ye pale inim pughu pa lupuu toni, inimale Yakop inim pughu to yes Israela. **f 1:51** Mbnp 28:12

nimadi ma aghedi ve mbef pida, le tingalaaj itaghon tutuuj to yes Yuda. Uur enaenja lolodi, nene irau titib ya 20 ma 30 galon ila.^g

⁷Yesu isaav pa yes mbesooja tonenen ighaze: “Yo, atib ya ila uur tonene le tisob tivon.” Tovenen tilooj aliija, ve tipavonin uur tonowen le tivon kat. ⁸Ghoro ye isaav padi muul ighaze “Atib rita, ve aghami ila to ngeu to ingin aniiij to vaiuuj tonene, ve itoova.” Tovenen titaghon aliija, ve tighami ila to ngeu tonenen.

⁹Sawa to itoova, ya tonowen inim vaen wa. Ye ikankaan pa vaen tonenen ilaagh vena to inim. (Eemoghon mbesooja to titib ya tonenen, yes tiwatag.) Tovenen ngeu tonenen ipoi ngeu to ivai paghu inim, ¹⁰ve isaav pani tovene: “Ighaze ghanghaniij tovene ivot, nene ival tisob moghon moghon tipamuuj vaen popoia ila pa tamtoghon ve tighun muuj. Ve ighaze isooj di maau, nene pale tirei vaen to poia kat maau ne ila padi. Eemoghon yom ugham tovene maau. Unguruut vaen poia inepneep, le ngaramus ughami ivot.”

¹¹Mbef tonenen ivot izi ndug Kana to Galilaia. Nene mbef gharatooja to Yesu ighami muuj, leso ipatooj tau pa tamtoghon ve tighilaala tighaze ye iza tiina pa tapiri ve poia toni. Taghoniija toni tighita mbef tonenen ve tighur ila toni.^h

¹²Ghanghaniij to vaiuuj tonenen isob, ghoro Yesu yesja tina, nditazi, ve taghoniija toni tizila pa ndug Kapernaum, ve tineep ris izi tonowe.

Yesu izurun ndiran to raukoliij tighau pa Rumai Tiina

(Mt 21:12-13; Mk 11:15-17; Lu 19:45-46)

¹³Sawa to Pasova, lupuuj tiina to yes Yuda matadi ingal muul pa sawa to Maaron igham mulin nditimbudi ve tipul Isip, nene inim igharau. Tovenen Yesu izala pa Yerusalem. ¹⁴Ye ilooj ila sirsiir to Rumai Tiina lolo, ve ighita tamtoghon tiraaurakol pa makau, sipsip, ve man mbaluuz izi tonowe. Ve ighita ndiran to paraboliiij yaam paam, mboledi izi ve tighamgham uraat todi. ¹⁵Tovenen igharaat ravraav tuktuku pida inim toon, ve inaan ndiran to raukoliij tonowen toman sipsip ve makau todi, tisob tighau tivot pa Rumai Tiina. Ve ipakud watiij to ndiran to paraboliiij yaam paam, le yaam todi imaliij izi taan. ¹⁶Ve isaav pa yes to tiraaurakol pa man mbaluuz ne ighaze: “Ayou mbef tiam tonene, ve aghau avot ala! Agham Tamaaj Rumai toni inim ndug to raukoliij malep!”

¹⁷Tovenen taghoniija toni matadi ingal Maaron aliija waaro eez to timbooda. Isaav tovene:

g 2:6 Mk 7:3+ **h 2:11** Uur toman ya to yes Yuda timenmen aghedi ve nimadi pani, nene iza to ataan muujina to tutuuj to yes Yuda titaghoni, leso tingalaaj ila Maaron mata. Mbef gharatooja to Yesu ighami ne, ipatooja ighaze ye igham sawa paghu ivot. Sawa paghu tonenen, nene sawa poia to Mesia igham tamtoghon to Maaron tineep pooi toman tinidi iza.

‘Ŋgar tiou iyaryaan naghaze le nagharaat mulin rumai tiom.
Eemoghon inim pughu pa nambaad pataņani tiina inimale yab
ighan ghou.’ⁱ

Yesu inim Rumai tau to Maaron

¹⁸Daba to yes Yuda tighita ŋgar to Yesu ighami, ve tisaav pani tighaze: “Pale upatoonj sa inim ghilaloonj payei, lesu niwatag nighaze Maaron ineeq toman ghom pa uraat to aazne ughami ne?”^j

¹⁹Yesu ipamuul alinjadi tovene: “Ighaze yam areu rumai tonene izi, you pale napayoonda muul pa mboņ tol moghon.”^k

²⁰Tovenen daba to yes Yuda tighaze: “Wai, yom sei? Rumai Tiina tonene, tigham uraat pa reiņi irau ndaman tamoot ru liim ve eez (46) wa! Ve yom ughaze yom irau upayoonda muul pa mboņ tol moghon?”

²¹Eemoghon rumai to Yesu isavia, nene ye tau anoņa. Pasa, ye to inim Rumai tau to Maaron.^l ²²Tovenen muri, sawa to ye imundig pa mateej, taghoniņa toni matadi ingal muul pa aliņa to ye isavia ne, ve tighur ila saveej tonenen. Ve tighur ila Maaron aliņa to timbooda pataghaan ne paam.^m

Ival tiina tighaze tighur ila to Yesu. Eemoghon tighur ila kat maau

²³Lupuņ tiina to Pasova tonenen, Yesu ineeq izi Yerusalem, ve igham mbeg gharatoonjadi naol to tipatoonja tighaze Maaron ineeq tomani pa uraat toni. Tovenen tamtoghon katindi tighita di, ve tighur ila toni. ²⁴Eemoghon Yesu ighur ila todi maau. Pasa, ye iwataq katin tamtoghon tisob lolodi ve ŋgar todi. ²⁵Ye le pughu eta to ighason pa ŋgar to tamtoghon tighamghami ne maau. Pasa, ye tau iwataq sa ŋgar to ineeq ila ival tisob lolodi.ⁿ

Yesu isavsav toman Nikodemus

3 ¹Ŋgeu tutuņja eez inepneep, iza Nikodemus. Ye ineeq ila lupuņ tiina to yes daba to tiņgin yes Yuda.^o

²Mboņ eez, ye ila ivot to Yesu, ve isaav pani ighaze: “Patoņaan, yei niwatag: Maaron imbaan ghom unum pa upatoot tamtoghon pa saveej toni. Pasa, yom ughamgham mbeg gharatoonjadi naol to ipatoonj ghom ighaze Maaron ineeq toman ghom pa uraat tiom.

i 2:17 Mbo 69:9 j 2:18 Mt 12:38, 16:1 k 2:19 Mk 14:58; Mbaņ 6:14 l 2:21 Muņ, yes Yuda tilala Rumai Tiina to Yerusalem, lesu tineep tigharau Maaron ve yesņa tilup di tinim ee moghon. Eemoghon aazne, Yesu igham Rumai Tiina ina. Pasa, ye inim ataam pait, lesu tagharau Maaron, ve itiņa Maaron talup ghiit tanim ee moghon. m 2:22 Lu 24:8,27 n 2:25 Mbo 139:1+; Mk 2:8; Yo 6:64; Syg 2:23 o 3:1 Yo 7:50, 19:39

Tamtoghon to ighaze Maaron ineep tomani maau, nene irau igham mbeg gharatoonjadi inimale yom ne maau.”^p

³Yesu ipamuul aliya ighaze: “Onoon kat, you nasaav payom tovene: Ighaze tapiri to ndug sambam igham tamtoghon eta inim paghu maau, ye irau ighilalal pooz to Maaron ve ighita anoja ne maau.”^q

⁴Tovenen Nikodemus ighasoni ighaze: “Wai, ighaze tamtoghon eta inim olman wa, pale irau inim paghu muul vena? Pale ilooj ila tina apo, ve ipoopa muul inim pae ru?”

⁵Yesu ipamuul aliya ighaze: “You nasaav payom: Onoon kat, ighaze tamtoghon eta inim paghu ila ya ve uraat to Maaron Avuvu maau, ye irau itaghton pooz to Maaron, ve ilooj ila ndug toni ne maau.”^{r s}

⁶Ndiran to titaghton ngar to taan, tighamgham tovene pasa, nditamandi ve nditinandi to tipoop di ne, yes to taan. Eemoghon tamtoghon to Maaron Avuvu itoor di tinim papaghudi, yes titaghton ngar to Maaron Avuvu.^t

⁷Saveej to you nasavia payom naghaze: ‘Tapiri to ndug sambam irau igham gham anim paghu,’ nene rujam iza ve ugham ngar naol pani malep. ⁸Ugham ngar pa yaghur. Yom irau ughita maau, ve unjini maau. Ilaagh vena inim, ma ilaagh vena ila, nene yom uwatagi maau. Ilaagh itaghton tau ataam toni, ve uloojoolj avolutu moghon. Uraat to Maaron Avuvu ighamghami ila tamtoghon lolodi leso igham di tinim paghu, nene ngara raraate moghon.”

⁹Nikodemus ilooj saveej tonene, ve ighason Yesu muul ighaze: “Wai, mbeg to yom usavia ne, pale ivot vena?”

¹⁰Yesu ipamuul aliya ighaze: “Wai, yes Israela tighita ghom tighaze yom izam tiina pa uraat to patojaan tamtoghon pa Maaron aliya. Pughu vena to yom ughazooj pa mbeg tonene maau? ¹¹You nasaav payom. Onoon kat, mbeg to yei nighita pa matamai ve niwatag katini, tauto nisavia ve nipariaan saveeja. Leso tamtoghon tighur ila. Eemoghon yam Yuda aghur ila saveej tiei maau.”^u

¹²You nasavsav payam pa uraat to Maaron ighamghami izi taan, eemoghon yam aghur ila maau. Tovenen ighaze nasavia mbeg to ndug sambam payam, pale awatagi ve aghur ila wa? Maau. ¹³Tamtoghon eta to

p 3:2 Yo 9:16, 10:37+; Mban 2:22 **q 3:3** Mbo 51:10; Yo 1:12+; 1Kor 2:14; 2Kor 5:17; 1Pe 1:23 **r 3:5** Ngara pida tighaze saveej tonene pughu, nene vene: Tamtoghon irau tigham ya, ve Maaron Avuvu igham lolodi ve ngar todi inim paghu, ghoru yes irau titaghton pooz to Maaron ve tilooj tila ndug toni. Ve ngara pida tighaze saveej tonene isavia ngar to ghamuuj ya maau. Tighaze saveej tonene, pughu tovene: Maaron irau itoor ngar to tamtoghon ve igham di tingalaan ila ye mata inim ngeu to iririu pooi ila ya, ve Avuvu Patabuan igham lolodi ve ngar todi inim paghu, ghoru yes irau titaghton pooz toni ve tilooj tila ndug toni. **s 3:5** Yo 7:37; Tit 3:5 **t 3:6** Mbo 51:5; Yo 1:13; 1Kor 15:50 **u 3:11** Yo 1:11, 12:49

taan izala ndug sambam ve ighita mbeb tonowe leso ivotia pa tamtoghon ne maau. Tamtoghon Natu to ineep sambam ve izi inim ne, ye moghon to irau isavia mbeb tonenen.^v

¹⁴⁻¹⁵ “Muuj, sawa to yes Israela tilaghlaagh izi ndug balim, Mose igharaat moot anunu, isaroni ila ai, ve ipayoonda iza iyoon.”

Ŋgar raraate moghon pale ivot pa Tamtoghon Natu. Pale tighuri ila ai, ve tipayoonda iza iyoon itaghon Maaron ŋgar toni. Leso sei masin to ighaze tighur ila toni, tigham nepooj poia ila to Maaron, ve tineep tovene le alok.^x

¹⁶ “Pasa, Maaron ighur lolo kat pa tamtoghon to taan. Tauto ipul Natu ee moghon izi inim taan ve imaat padi. Leso tamtoghon tisob to tighur ila toni, tilaledi sob, ve tigham nepooj poia ila to Maaron, ve tineep tovene le alok.^y

¹⁷ Onoon kat, Maaron imbaaŋ Natu izi inim taan pa iŋgabiiz tamtoghon ve ighur atia padi ne maau. Ye imbaaŋa izi inim pa igham mulin di.^z

¹⁸ Tamtoghon to ighaze ighur ila to Maaron Natu, nene Maaron irau iŋgabiiza ve ighur atia pani ne maau. Ve ighaze tamtoghon eta ighur ila toni maau, nene ye inimale tamtoghon to iŋgabiiza tighaze ye isosor wa, ve isaŋan moghon pa igham atia toni. Pasa, ye ighur ila to Maaron Natu ee moghon tonenen maau.^a

¹⁹ “Pughu to Maaron ighur atia pa tamtoghon, nene vene: Ghazooŋa toni izi inim taan wa. Eemoghon tamtoghon lolodi pani maau, ve tizuruni. Ve lolodi pa ŋgar to ndoroom moghon. Pasa, ŋgar isob to tighamgham di, nene samsamiadi moghon.^b

²⁰ Tamtoghon tisob to tighamgham ŋgar samia, tighurghur koi pa ghazooŋa to Maaron, ve tineep sagan pani. Pasa, timatughez tighaze: Ghazooŋa toni pale ipatooj sosor todi ivot ghazooŋa. ²¹ Eemoghon yes to titaghon saveeŋ onoon ŋgara, tiŋarua ghazooŋa to Maaron. Leso ghazooŋa toni ipatooj di pa ŋgar popoia to tighamgham di ne, ve tiwatag tighaze ŋgar todi tonowen, Maaron ineep toman di ve ipalot di, tauto tigham di.”^c

Yoan ipariaaŋ tamtoghon pa tighur ila Yesu saveeŋ toni

²² Muri ghoru, Yesu toman taghoniŋa toni tipul Yerusalem, ve tila tineep sawa pida izi taan suruvu to Yudea, ve tirurughuuz tamtoghon

v 3:13 Yo 3:31+; 1Kor 15:47; Ep 4:9+ w 3:14-15 Sawa to yes Israela tinepneep izi ndug balim, tizoor Maaron aliŋa le tipas Maaron ate. Tovenen ye imbaaŋ moot samsamia tila tighan tamtoghon todi katindi le timatmaat. Eemoghon yes to matadi ila pa moot anunu to Mose igharaata ne, timaat maau. Maaron ipul sosor todi. Saveeŋa ineep ila Namba 21:4+.
 x 3:14-15 Nam 21:4+; Yo 3:36, 6:47, 20:31 y 3:16 Yo 10:28; Ro 5:8, 8:32; 1Yo 4:9+
 z 3:17 Lu 19:10; Yo 12:47; 1Tim 1:15 a 3:18 Mk 16:16; Yo 5:24; Ro 8:1
 b 3:19 Yo 1:4+, 8:12 c 3:21 1Yo 1:7+

izi tonowe. ²³Yoan paam, irurughuuz tamtoghon izi ndug Aenon to ineep igharau ndug Salim. Pasa, ndug tonowen, le ya katindi. Tovenen tamtoghon tilala toni, ve ye irughuuz di tonowe. ²⁴Sawa tonenen, Erod ighur Yoan iloonj ila ruum to yabyabuuj sone.^d

²⁵Sawa eez, taghoniija pida to Yoan yesja Yuda eez, tiwazoran di pa ataam sine to pale titaghoni pa ririwaan leso tingalaanj ila Maaron mata.^e

²⁶Tovenen tila to Yoan, ve tisaav pani tighaze: “Patojanj, ughita. Ijgeu to muuj yamru anepneep izi ya Yordan panja ila ilib pa ndag iza, ve yom upariaanj tamtoghon pa tighur ila toni, tauto aazne ival tisob tilala toni, ve irughuuz di we.”^f

²⁷Yoan ipamuul alijadi ighaze: “Nene poia. Agham ijgar naol malep. Tamtoghon eta irau igham uraat tovene sorok maau. Maaron to sambam ipaloti, tauto ye irau igham tovene.”^g

²⁸Muuj, itija tanepneep, ve yam taumim aloonj ghou nasaav naghaze: ‘You Mesia maau. Maaron imbaanj ghou namuuj nanim pa nagharaat ataam pani moghon.’^h

²⁹Ghoro Yoan isavia saveej palelaanj tonene iza to ye tau ve Yesu: “Ighaze vaiuuj eta ivot, ve tamoot inim pa igham liva, ve ita ite to imuuj pa uraat to vaiuuj ne iloonj aliija, nene ighami lolo poia kat. Onoon, ye irau igham liva tonenen maau. Pasa, liva tonenen, ye to ita ite. Eemoghon ye pale lolo poia kat. Pasa, uraat toni ighur anoja wa. You tovene paam. Lolog poia le poia kat pasa, uraat tiou ighur anoja wa.”ⁱ

³⁰Ye iza pale inim tiina. Ve you izag, ghoro izi ve naneep ila ye samba.”

Ijgeu to ineep sambam ve izi inim, ye ilib kat

³¹Tamtoghon to taan, ye isavia mbep to taan moghon. Pasa, ye ivot izi taan. Ve ye to ineep sambam ve izi inim, ye ilib pa tamtoghon tisob.^j

³²Mbeb to ijgeu to sambam tonenen ighita ve iloonja, tauto ivotia. Eemoghon tamtoghon tighur ila saveej toni maau.^k

³³Ve ighaze tamtoghon eta iloonj saveej toni ve ighur ila, nene ipatoonja ighaze ye ighur ila ighaze Maaron saveej toni, nene onoon.^l

³⁴Ijgeu to Maaron imbaanja izi inim, ye ivovotia Maaron tau aliija. Pasa, Avuvu to Maaron ireii pani ne, ye irei alulu pani maau. Ipul suvuni ila pani.^m

³⁵Tama Maaron lolo ineep to Natu kat, ve ipul mbep tisob tila ye nima wa.ⁿ

d 3:24 Mk 6:14+ **e 3:25** Yes Yuda ledi tutuuj naol pa ririwaan. Ijgar todi tovene: Ighaze titaghon katin ataam to tutuuj tisob tonowen, nene pale iuul di pa tingalaanj ila Maaron mata. **f 3:26** Yo 1:29,35 **g 3:27** 1Kor 3:5+; Yems 1:17 **h 3:28** Yo 1:20,23 **i 3:29** Mt 9:15 **j 3:31** Yo 8:23; Ro 9:5; 1Kor 15:47 **k 3:32** Yo 1:10+, 3:11, 12:37+ **l 3:33** Ro 3:4 **m 3:34** Is 42:1; Mbanj 10:38 **n 3:35** Mt 11:27, 28:18; Hib 2:8

³⁶Tovenen tamtoghon to ighaze ighur ila to Maaron Natu, nene igham nepooj poia ila to Maaron wa. Ve ye pale ineep tovene le alok. Eemoghon yes to tizoor Maaron Natu aliņa, nene irau tigham nepooj tonenen maau. Maau kat. Mbalmbali to Maaron pale izaza todi itaghoni taghoni gha ila.^o

Yesu isavsav toman Samaria tidi eez

4 ¹⁻³Sawa tonenen, ndiran tutuņa tilooj tighaze Yesu iyou tamtoghon katindi tinim taghoniņa toni, ve irughuuz di le tilib pa Yoan taghoniņa toni. Eemoghon Yesu tau irughuuz tamtoghon maau. Taghoniņa toni moghon to tighamgham uraat tonenen. Yesu iwatag ighaze ndiran tutuņa tilooj uraat toni varu wa. Tovenen ipul taan suruvu to Yudea, ve ighaze imuul ila pa Galilaia. ⁴Ataam to ye itaghoni, nene imbut taan suruvu to Samaria, ve ila ivot izi Galilaia.

⁵Tovenen ye ilaagh ila le ivot ndug eez to Samaria, iza Sikar. Ndug tonowen ineep igharau taan to muuj Yakop igham pa natu Yosep.^p

⁶Ya taiņ eez to muuj Yakop itaii ne, ineep ndug dige. Yesu ilaagh mala le laghoon isoonj matini. Tovenen ila mbole izi ya taiņ dige, ve ate izi. Sawa tonenen, ndag iza bobodaņ wa.

⁷⁻⁸Yesu ate izi inepneep, ve taghoniņa toni tila paanu pa gholiņ adi aniiņ. Mala maau ve Samaria tidi eez inim ighaze itib ya. Yesu ighita, ve isaav pani ighaze: “Liva, irau ugham ag ya rita inim naghun?”

⁹Tovenen liva tonowen isaav pani ighaze: “Wai, yom Yuda taamdi, ve you Samaria tidi. Pughu vena to ughason ghau pa am ya?” Ye isavia saveeņ tonene pasa, yes Yuda ve yes Samaria tiwalupun di pa nepooj maau.^{q r}

¹⁰Yesu ipamuul aliņa ighaze: “You naghason ghom pa ag ya. Ve inimale yom ughilaal ghau kat, ve uwatag mbep poia to Maaron ighaze igham payom, tone ughason ghau pa naghama am ya to pale igham ghom uneep matam iyaryaar le alok. Ya tonene pale ireer irau sawa isob.”

¹¹Tovenen liva tonenen isaav pani muul ighaze: “Olman, yom lem ya apatu eta maau. Ve saambu tonene, ya ineep sila kat. Ya reera to usavia ne, pale ughami sine?^s

¹²Yom uwatag: Timbuud Yakop itai ya tonene payei alok wa. Ve ye tau toman ndinatu, ve makau ve sipsip toni tighunghun ya tonene. Vena, yom ighaze ulib pa Yakop, tauto ughaze ugham ag ya ite paam ne?”

o 3:36 Yo 5:24, 6:47; Ro 1:17; 1Yo 5:12 **p 4:5** Mbnp 33:19, 48:22 **q 4:9** Yes Samaria titaghon sunuuj to yes Yuda ngara pida toman taudi sunuuj todi ngara pida, ve tamtoghon to ndug ndug tineep ila lolodi. Tovenen yes Yuda tighita yes Samaria tighaze yes Yuda kat maau, ve titaghon katin Maaron tutuņ toni maau. Pughu tonene to yes to Yuda kat tighaze tineep saganu padi. Pasa, matadi ingal tighaze yes Samaria pale tigham di tisami ila Maaron mata. **r 4:9** Lu 9:52+; Mbaņ 10:28 **s 4:11** Liva tonene igham poian Yesu saveeņ toni pughu maau. Ye ighaze pa Yesu isavia ya kat to ireerer. Eemoghon Yesu isavia nepooj poia to tamtoghon pale tighami ila toni, ve Avuvu Patabuaņ.

¹³Yesu ipamuul aliņa ighaze: “Tamtoġhon tisob to tighun ya tonene, nene pale murun di muul. ¹⁴Eemogħon ighaze tamtoġhon eta ighun ya to you naghaze naghām pani, ye irau muruni muul maau. Pasa, ya to you naghām pani, nene pale pisikia iza le ivon ila lolo. Tovenen tamtoġhon tonenen pale ighām nepooŋ poia ila to Maaron itaġhoni taġhoni għa ila.”^t

¹⁵Liva tonenen ilooŋ saveeŋ tonene, ve isaav pa Yesu muul ighaze: “Wai olman, ughām ya tonenen payou lak! Leso muri murun għou muul sob, ve nala nanim pa tibuŋ ya to sualen muul sob.”

¹⁶Għoro Yesu isaav pani ighaze: “Yo, ula ughām azuwam, ve yamru amuul anim.”

¹⁷Liva tonenen ipamuul aliņa ighaze: “You leg azuwag maau.”

Yesu ipamuul aliņa ighaze: “Aliŋam to yom ughaze lem azuwam maau, nene denja. ¹⁸Eemogħon yom uvai nditamoot liim wa. Ve ŋgeu to aazne yom uneep tomani, ye azuwam tau maau. Tovenen aliŋam, nene onoon.”

¹⁹Liva tonenen ilooŋ saveeŋ tonene, ve ŋgar toni pakia. Tovenen isaav pa Yesu ighaze: “Olman, għara naghilaal għom. Yom avaat propet eez to Maaron.”^u

²⁰Nes, you leg għasoniij eez payom. To muuŋ ve inim, yei Samaria nditibumai tiluplup di pa suŋuuŋ izala lolooz tonowen. Ve aazne, paam, nitagħon ŋgar tonenen. Eemogħon yam Yuda aghaze tamtoġhon irau tisuŋ pa Maaron izi ndug Yerusalem mogħon. Laak, ndug sine to poia pa suŋuuŋ?”^v

²¹Yesu ipamuul aliņa ighaze: “Olman tidi, ughur ila saveeŋ tiou tonene. Mala maau pale aghām ŋgar pa ndug eta to suŋuuŋ inimale lolooz tonowen, ma Yerusalem muul maau. Ndug sine to ighaze aneep pani ve asuŋ, nene poia mogħon.”^w ²²Yam tamtoġhon to Samaria awatag katin Maaron to asuŋsuŋ pani ne maau. Ve yei Yuda, għoro niwatagi. Pasa, yei ninim ataam pa Maaron ighām mulin tamtoġhon.”^x

²³Ve ulooŋ. Mala maau pale sawa paghu ivot. Aazne, inim igharau wa. Sawa tonenen ighaze ivot, tamtoġhon pale tighām suŋuuŋ tau pa Tamaan Maaron. Yes pale tisuŋ pani toman lolodi itaġhoni saveeŋ onoon ve pooz to Maaron Avuvu. Tamaan Maaron izuarria tau pa youŋ le tamtoġhon to pale tisuŋ pani itaġhoni ataam tovene.”^y

²⁴Maaron, ye Avuvu. Tovenen tamtoġhon to tighaze tisuŋ pani, yes irau tisuŋ pani toman lolodi itaġhoni saveeŋ onoon ve pooz to Maaron Avuvu.”

²⁵Yesu isavia saveeŋ tonene le isob, għoro liva tonenen isaav pani ighaze: “You nawatag: Mesia pale inim. Ve sawa to inim ivot, ye pale

t 4:14 Is 44:3, 55:1; Yo 7:37+; Syg 21:6 **u 4:19** Lu 7:16; Yo 6:14 **v 4:20** Lo 12:5+; Mbo 122:1+ **w 4:21** Yesu saveeŋ toni pugħu tovene: Maaron ighām ŋgar pa ndug to suŋuuŋ muul maau. Ye ighām ŋgar tiina pa tamtoġhon lolodi. Ighaze tisuŋ pani toman lolodi itaġhoni saveeŋ toni, nene pale ye lolo poia pa suŋuuŋ todi. **x 4:22** Ro 3:1+, 9:4+ **y 4:23** Pil 3:3

ipaghazonjan ghei pa mbeb to naol.” (Saveen ‘Mesia,’ yes Grika tiwaata ila alinjadi tighaze: ‘Krisi.’) ²⁶Tovenen Yesu isaav ghazonja pani ighaze: “Mesia to usavia ne, nene you taug tonene, you to nasavsav toman ghom ne.”

²⁷Yesu isavsav pani, ve taghoniija toni timuul tinim tivot. Tighita Yesu yesuru liva tonenen tisavsav, le tigham ngar naol. Eemoghon eta ighasoni pa pughu vena to ye isavsav toman liva tonenen maau. ²⁸Ghoro liva tonenen ipul ya apatu toni izi, ve imuul ila pa paanu, ve ipaes pa tamtoghon ighaze: ²⁹“Ou, yam anim tala aghita ngeu eez to inepneep we. Nggar naol to you naghmagham di ne, ye ivotia di payou le tisob. Ye avaat Mesia tou?” ³⁰Tauto ival tiina tipul paanu, ve tikeet tila tighaze tighita Yesu.

³¹Sawa to liva tonenen ipul Yesu ve imuul ila pa paanu, taghoniija toni tisaav pa Yesu tighaze: “Patojan, ugham am aniij eta ughan.”

³²Eemoghon ye isaav padi ighaze: “Aniij tiou to ghaniij inepneep. Eemoghon yam awatagi maau.” ³³Tovenen taghoniija toni tiwasavon di tighaze: “Vena, tamtoghon eta igham a aniij wa?”

³⁴Yesu isaav padi muul ighaze: “Aghita. You irau nataghon Nggeu to imbaan ghou nanim ne lolo, ve napasob uraat toni le isob kat. Aniij tiou tau tonenen.”^z

³⁵Yam asavsav aghaze: ‘Kaiyo paan isob, ghoro sawa to taitaij ivot.’ Eemoghon you nasaav payam: Nenen ila matini. Matamim ila pa uum. Aniij tisob timatu, ve sawa to taitaij, tauto ivot wa.^a

³⁶Tovenen aazne, yes to taitaij tisanjan muul maau. Tinggog aniij anoja, ve tilup di ila ndouj ndouj, ve tighamgham ledi atia. Tauto yesja yes to vazogiij aniij, lolodi poia ve tinidi iza. Pasa, uraat todi ighur anoja wa. Anoja tovene: Tigheghereb tamtoghon tila to Maaron, lesonee matadi iyaryaar le alok.^b

³⁷Nggar tonenen denja pa saveen to moghon moghon tatasavia ne: ‘Nggeu eez ivazog, ve ite ilup anoja.’ ³⁸You nambaan gham ala pa lupuu aniij anoja to taumim avazogi maau. Ndiran pida tigham uraata le tighun wadedenjadi pani. Uraat todi anoja, tauto aazne yam ala aghami.”

Tamtoghon katindi to Samaria tighur ila to Yesu

³⁹Yes Samaria katindi to tinepneep izi ndug tonowen tilooj saveen to liva tonenen, ve tighur ila to Yesu. Pasa, ye ivotia ngar to Yesu igham pani ne, ve isaav padi ighaze: “Nggar tisob to you naghmagham di, tauto ye ivotia di payou le tisob.” ⁴⁰Tovenen yes Samaria tonowen tila tivot to Yesu, ve tinguruuta tighaze inep toman di ris. Tovenen ye inep mboj ru tonowe. ⁴¹Tauto tamtoghon katindi to ndug tonowen tighur ila toni. Pasa,

z 4:34 Yo 6:38, 17:4 a 4:35 Mt 9:37; Lu 10:2 b 4:36 Mk 4:14+

tilooŋ saveeŋ ila ye tau avo. ⁴²Ve tisaav pa liva tonowen tighaze: “Papazogi yei nilooŋ saveeŋ tiom moghon, ve nighur ila to ŋgeu tonene. Ve aazne, taumai nilooŋ saveeŋ ila ye tau avo. Tauto niwatag nighaze onoon kat, ŋgeu tonene, ye Volaanŋa to pale igham mulin ival tiina to taan.”^c

Yesu imuul ila pa taan suruvu to Galilaia

⁴³Yesu yesŋa yes Samaria tineep mboŋ ru isob, ghero imundig muul ve ila pa Galilaia. ⁴⁴(Ye tau isaav pataghaanŋ wa ighaze: “Propet eta irau le iza izi tau ndug toni maau.”)^d

⁴⁵Ye ila ivot Galilaia, ve yes Galilaia tighami toman lolodi poia. Pasa, sawa to lupuuŋ tiina to Pasova, yes paam tila Yerusalem, ve tighita uraat naol to ye igham di tonowe.

Yesu igharaat kinik uraata toni natu le tini poia

⁴⁶⁻⁴⁷Tovenen Yesu ila ivot muul izi ndug Kana to ineeŋ izi Galilaia ne. Muuŋ, ye ineeŋ tonowe, ve itoor ya inim vaen. Yesu inepneep tonowe, ve uraata eez to kinik to ineeŋ izi ndug Kapernaum, ilooŋ Yesu varu tighaze ye ipul Yudea ve inim ivot Galilaia wa. Uraata tonowen natu, moroghoonŋ tiina ighami ve ighengheen. Tovenen ye ipul Kapernaum, ve ila ighaze ighita Yesu. Ila ivot toni, ve itanŋ rorani ighaze izila Kapernaum ve igharaat natu. Pasa, moroghoonŋ tiina ighami le igharau ighaze imaat.

⁴⁸Yesu isaav pani ighaze: “Wai, yam aghaze le aghita mbep gharatooŋadi toman uraat tintina to ipatooŋ ghou ighaze Maaron ineeŋ toman ghou pa uraat tiou, ghero aghur ila. Ve ighaze maau, nene irau aghur ila maau.”^e

⁴⁹Uraata tonenen ipamuul aliŋa ighaze: “Tiina, rikia unum ve tazila. Pa vene, natug imaat.”

⁵⁰Yesu isaav pani ighaze: “Ula! Natum irau imaat maau. Ye pale tini poia.” Tovenen uraata tonenen ighur ila Yesu aliŋa ve ila.

⁵¹Ilaagh muul izila, ve mbesooŋa toni pida tinim tivot toni izi ataam luvuŋa, ve tipaes pani tighaze: “Olman, natum tini poia wa!”

⁵²Tovenen ye ighason di pa sawa sine kat to natu mata pakia.

Yes tipaes pani tighaze: “Noor, ndag iza bobodaanŋ ve itap ris, ghero tini iluum ve mata pakia.” ⁵³Tovenen pain kainanŋen tama mata iŋgal: Sawa tonenen kat to Yesu isaav pani ighaze: “Ula. Natum irau imaat maau. Ye pale tini poia.” Tovenen yesŋa tamtoghon toni to tineep tomani ila ruum toni, tisob tighur ila to Yesu.

⁵⁴Nene mbep gharatooŋa inim ru to Yesu ighami inim ghilalooŋ pa tamtoghon, leso tighilaala tighaze Maaron ineeŋ tomani pa uraat toni. Sawa to ye ipul taan suruvu to Yudea ve imuul ila Galilaia, igham mbep gharatooŋa tonene.

c 4:42 Lu 2:11; 1Yo 4:14 d 4:44 Mk 6:4 e 4:48 Yo 2:18; 1Kor 1:22

Yesu igharaat ngeu narape eez izi ya naliu Betesda

5 ¹Muri ghoru, yes Yuda sawa todi eez ivot pa tilup di ve tigham sunjuun tiina pa Maaron. Tovenen Yesu izala pa Yerusalem. ²Ya naliu eez ineeep igharau didiinj tiina to iluvut Yerusalem. Tiwaat iza ila Hibru alinjadi tighaze Betesda.^f

Ya tonowen ineeep igharau ataam avo to tiwaata tighaze ‘Ataam to Sipsip.’ Ve tirei mbeez liim tiyoon tiluvutin ya aze. ³⁻⁴Moghon moghon moroghoonja katindi tighengheen ila mbeez tonowen lolodi. Pida matadi pisi, pida aghedi isami, ve pida aghedi imaat wa. Irau tilaagh maau. [Tinepneep tonowe ve tisanajan le ighaze ya itarir, nene rikia moghon tila tiyatov di tizila. Pasa, sawa enaenja, anjela to Maaron izi inim, ve igham ya tonenen itarir. Ve sei to ighaze iyatova izila muun, nene pale moroghoonj toni isob, ve tini poia.]

⁵Ngue eez ineeep ya tonenen aze. Ye moroghoonj ikisi irau ndaman tamoot ee saangul liim ve tol (38) wa. ⁶Yesu ighita ngeu tonenen ighengheen, ve iwatag ighaze ye imoroon sawa mala wa. Tovenen ighasoni ighaze: “Vena? Lolom pa tinim poia?”

⁷Narape tonenen ipamuul aliija ighaze: “Ngue tiou, ighaze ya itarir, you leg itag ite eta to iuul ghou ve ighur ghou nazila ya maau. Ve sawa naol to taug natoova pa nazila, tamtoghon pida timuunj payou ve tizila.”

⁸Yesu isaav pani ighaze: “Umundig uyoon, uput moogh tiom, ve ulaagh.” ⁹Rikia moghon ve ngeu tonenen tini poia. Tovenen imundig, iput moogh toni, imbaada, ve ilaagh ila. Eemoghon sawa tonenen, nene umbom patabuanj to Maaron.^g

¹⁰Tovenen daba to yes Yuda tighita ngeu tonenen, ve tiyaana tighaze: “Ai, aazne, nene umbom patabuanj to Maaron! Umbaad moogh tiom ve ulaagh pasa? Nggar to ughami ne, tutuunj ingalsek pani.”

¹¹Ngue tonenen ipamuul alinjadi ighaze: “You taug maau. Ngue to igharaat ghou ve tinig poia, tauto isaav payou ighaze: ‘Uput moogh tiom, ughami, ve ula.’”

¹²Tovenen tighasoni muul tighaze: “Sei isaav payom?” ¹³Eemoghon ngeu tonenen ikankaan pa sei to igharaata ve tini poia. Pasa, sawa tonenen, ival tiina tinepneep tonowe. Tauto Yesu ipasi ila lolodi, ve ighau ila wa.

¹⁴Muri ghoru, Yesu ila indeej ngeu tonenen izi Rumai Tiina dige, ve isaav pani ighaze: “Ughita. Aazne, tinim poia wa. You nasaav payom: Ugham sosor muul malep. Ighaze unoknok ghamuunj sosor, nene pale

f 5:2 Baibol pida tiwaat ya naliu tonene iza tighaze Bet-zata, ma Betsaida.

g 5:9 Is 35:4-6; Yo 9:14

patajani tiina kat igham ghom le ilib pa patajani to papazogi igham ghom.”^h

¹⁵Yesu isavsav paani le isob, ghoru ngeu tonenen ipuli, ve ila ipaes pa daba to yes Yuda ighaze: “Ŋgeu to igharaat ghou, nene Yesu.”

¹⁶Tovenen daba to yes Yuda tiyou avodi pa Yesu, ve tikaal ataam pa tingal mata. Pasa, ye ighamgham uraat tovene ila umbom patabuanj to Maaron. ¹⁷Eemoghon Yesu ipamuul alinjadi ighaze: “To muuj ve inim, Tamaŋ ighamgham uraat toni irau sawa isob. Tauto you paam naghamaŋ uraat tovene.”ⁱ

¹⁸Saveej toni tonene ireu daba tonenen lolodi. Tovenen nŋar todi iyaryaaj kat tighaze le tirabi imaat. Pasa, tighita tighaze ye imamalaaj pa tutuuj to umbom patabuanj. Ve nŋaramus igham sosor ite izala pogho. Pasa, iwaat Maaron ighaze ye tama. Tovenen tighita tighaze ye ipakur tau ighaze ye raraate inim Maaron.^j

Yesu itaghon Tama Maaron nŋar toni pa uraat to ye ighamghami

¹⁹Tovenen Yesu isaav pa daba to yes Yuda ighaze: “You nasaav payam. Onoon kat, Maaron Natu irau igham mbeb eta itaghon tau nŋar toni ne maau. Maau kat. Ye ighita Tama igham sa nŋar, nene ye itaghoŋi moghon. Tovenen sa nŋar to Tama ighamghami, nene Natu ighami paam.”^k

²⁰Tama lolo pa Natu kat. Tovenen uraat naol to ye ighamgham di ne, ye ipatoonj di pa Natu. Ve muri, ye pale ipatoonj uraat tintina pida to tilib pa uraat to nŋaramus ivot ne pa Natu. Tovenen yam pale aghita di, le ruŋamim iza padi ve avomim ikaak.^l

²¹Tama Maaron, ye ipamundigin yes mateeŋa ve timundig matadi iyaryaar muul. Natu tovene paam. Ighaze lolo pa tamtoŋhon eta, ye pale ighami ineep poia.^m

²²Uraat to gabizoonj tamtoŋhon, tovene paam. Tama Maaron inŋabiiz tamtoŋhon eta ve ighur atia paani maau. Uraat tonenen, ye ipuli isob ila Natu nima.ⁿ

²³Leso ival tisob tighita Natu tighaze ye le iza, ve titandag paŋi tinimale titandag pa Tama Maaron. Ve ighaze tamtoŋhon eta itandag pa Maaron Natu maau, nene itandag pa Tama Maaron maau paam. Pasa, ye to imbaaj Natu izi inim taan.^o

²⁴“You nasaav payam: Onoon kat, ighaze tamtoŋhon eta iloonj saveej tiou ve itaghoŋi, ve ighur ila to Tamaŋ to imbaaj ghou nanim, nene ye igham nepoonj poia ila to Maaron wa. Ve ye pale ineep tovene itaghoŋi

h 5:14 Yo 8:11; 2Pe 2:20+ **i 5:17** Yo 9:4, 14:10 **j 5:18** Yo 10:30,33, 19:7

k 5:19 Yo 8:28+, 14:10 **l 5:20** Yo 3:35 **m 5:21** Yo 11:25; Ro 4:17; 1Kor 15:45; Ep 2:5

n 5:22 Mt 25:31; Mbaŋ 10:42, 17:31 **o 5:23** Lu 10:16; Pil 2:10+; 1Yo 2:23

taghoni gha ila. Tamtoghon tovene, you irau nangabiiza ve naghur atia pani ne maau. Pasa, ye ipul ataam to mateej wa, ve aazne itaghon ataam to ineep mata iyaryaar le alok.^p

²⁵You nasaav payam: Onoon kat, mala maau pale sawa paghu ivot. Aazne, inim igharau wa. Sawa tonenen ighaze ivot, yes to titaghon ataam to mateej ne, pale tilooj Maaron Natu aliņa. Ve ival tisob to ighaze tilooj aliņa ve titaghoni, nene pale tigham nepooj poia ila to Maaron.^q

²⁶Maaron tau inim pughu pa tau nepooj toni. Ve ye ighur tapiri tonenen ila to Natu. Tauto Natu paam inim pughu pa tau nepooj toni.^r

²⁷Ve Tama ighur uraat to gabizooj tamtoghon ve ghuruuj atia padi ila Natu nima paam. Pasa, ye Tamtoghon Natu.^{s t}

²⁸Yam ruņamim iza pa saveej tonene malep. Muri, sawa eta pale ivot, ghoru mateeja tisob to tighen naal lolo, pale tilooj Maaron Natu aliņa,^u

²⁹ve timundig, tipul naal todi, ve tivot. Yes to muuj tighamgham ŋgar popoia, pale timundig ve tineep matadi iyaryaar le alok. Eemoghon yes to muuj tighamgham ŋgar samia, pale timundig ve tigham atia to sosor todi.^v

³⁰“You irau naghram mbeb eta itaghon taug lolog ve ŋgar tiou ne maau. Saveej to nalonjloņa ila to Tamaņ Maaron, tauto ighamgham pooz payou pa gabizooj tiou. Tovenen ighaze nangabiiz tamtoghon, nene pale gabizooj tiou deņia moghon. Pasa, you nataghon taug lolog maau. Nataghon Tamaņ to imbaaņ ghau nanim ne lolo.”^w

Mbeb pida to tipariaaņ ghiit pa taghur ila to Yesu

³¹Yesu isaav muul tovene: “Ighaze you taug napariaaņ saveej tiou, nene iraua maau. Saveej tovene, yam irau aghur ila aghaze nene onoon ne maau. ³²Eemoghon]ņgeu ite to ipariaaņ saveej tiou. [Nene Tamaņ Maaron.] Ve you nawatag: Saveej to ye isasavia payou, nene onoon moghon.^x

p 5:24 Yo 3:16, 6:40, 8:51; 1Yo 5:13 **q 5:25** Ga 2:20; Ep 2:1,5; Kol 2:13 **r 5:26** Yo 1:4
s 5:27 Sawa naol, Yesu iwaat tau ighaze ‘Tamtoghon Natu.’ Saveej waaro tonene, pughu tol. Sawa pida, nene ataam ite to ye isavia tau. Ve sawa pida, Yesu iwaat tau ighaze ‘Tamtoghon Natu’ pasa, ye tamtoghon raraate inimale it. Ve sawa pida, saveej tonene pughu tovene: Yesu, ye Mesia to Maaron ighuri pa uraat to ghamuuj pooz itaghon saveej to Daniel 7:13-14. Saveej to Yesu tonene, ŋgar ru tineep ila: Eez, nene vene: Ighaze Yesu iņgabiiz it tamtoghon, gabizooj toni pale deņia. Pasa, ye tamtoghon raraate inimale it, ve iwatag katin pataņani ve tovaaņ naol to taan. Ve ŋgar ite, nene vene: Yesu irau iņgabiiz tamtoghon, pasa ye Mesia to Maaron ighuri pa uraat to ghamuuj pooz.
t 5:27 Hib 4:15-16 **u 5:28** 1Kor 15:52; 1Tes 4:16 **v 5:29** Mt 25:46; Mbaņ 24:15; Ro 2:7+;
 Syg 20:12 **w 5:30** Yo 6:38, 8:16; Syg 19:11 **x 5:32** Mt 3:17; Yo 8:18

³³“Ve ŋgeu ite paam ipariaaŋ saveeŋ tiou. Sawa to yam ambaaŋ tamtoghon tiam pida tila to Yoan ŋgeu rughuzaaŋa, ye ivotia saveeŋ onoon padi, ve ipariaaŋ di pa tighur inim tiou.^y

³⁴You naghur matag pa tamtoghon eta pa ipalot saveeŋ tiou ne maau. Eemoghon nasavia saveeŋ tonene to nauul gham, lesa aghur inim tiou, ve Maaron igham mulin gham. ³⁵Yoan, ye inim yaryarooŋa to ighan ve igham ndug ighazooŋ pa tamtoghon. Ve sawa rismoghon to ye ineeŋ toman gham, yam tinimim iza ve lolomim poia pa ghazooŋa toni.

³⁶“Eemoghon you leg mbeb ite paam to ipariaaŋ saveeŋ tiou ve ilib pa saveeŋ to Yoan. Nene uraat naol to Tamaŋ ighur di tinim nimag lesa naghama di ve napasob di. Uraat naol to naghamaŋ di, nene tipatooŋ ghou tighaze: Tamaŋ Maaron imbaaŋ ghou to nanim.^z

³⁷“Tovenen Tamaŋ Maaron to imbaaŋ ghou nanim, ye ipariaaŋ saveeŋ tiou wa. Eemoghon muuŋ ve inim, yam alooŋ aliŋa rita maau, ve aghita nagho pa eta sone. ³⁸Ve saveeŋ toni paam ineeŋ tunja ila lolomim maau. Pasa, Tamaŋ Maaron imbaaŋ ghou nazi nanim taan, eemoghon yam aghur inim tiou maau. ³⁹Yam anumeer aghaze Maaron saveeŋ toni pale ipatooŋ gham pa ataam to aneeŋ matamim iyaryaar le alok. Tovenen sawa naol awatwaat saveeŋ toni, ve azuaria gham aghaze le awatag katin pughu. Ve mos waaro to naol ne tipariaaŋ saveeŋ tiou.^a

⁴⁰You naghaze yam anim tiou, lesa agham nepooŋ poia ila to Maaron. Eemoghon yam lolomim pa ŋgar tovene maau.

⁴¹“Ighaze tamtoghon tipait izag, ma tipait ghou maau, nene matag ila padi maau. Pasa, you nazuaria ghou pa paitooŋ to tamtoghon maau.^b

⁴²Eemoghon yam, you nawatag gham wa. Yam aghur lolomim pa Maaron rita maau. ⁴³Pasa, you naghama Tamaŋ Maaron nagho to nanim. Eemoghon yam agham ghou maau, ve azurun ghou. Ve ighaze ŋgeu eta itaghoŋ tau ŋgar toni ve inim, ghoru yam rikia moghoŋ aghami toman lolomim poia, ve aghur ila saveeŋ toni. ⁴⁴Pale irau aghur ila to Maaron vena? Maau. Pasa, yam azuaria gham aghaze le nditamim tipait gham, ghoru poia. Eemoghon paitooŋ tau to inim pa Maaron, yam azuaria gham pani maau.^c

⁴⁵Vena, yam aghaze you pale napayoon gham pa savsaveeŋ ila Tamaŋ Maaron nagho? Maau. Mose, ŋgeu to yam anumeera aghaze tutuuŋ toni pale igham gham aneeŋ pooi, nene ye to pale ipayoon gham pa savsaveeŋ. ⁴⁶Inimale yam aghur ila saveeŋ toni, tone aghur inim tiou paam. Pasa, saveeŋ waaro naol to ye imbood di, nene tiza tiou.^d

y 5:33 Yo 1:29,35 z 5:36 Yo 10:25, 14:11 a 5:39 Lu 24:44; Mbaŋ 13:27; Ro 1:2

b 5:41 Ga 1:10; 1Tes 2:6 c 5:44 Mt 23:5+; Yo 12:43; Ro 2:29

d 5:46 Mbnp 3:15, 22:18, 49:10; Lo 18:15+

47Eemoghon yam aghur ila saveej to ye imbooda ne maau. Tauto pale aghur ila saveej tiou vena?"^e

Yesu ipan tamtoghon ndiḡndiḡ ndiḡndiḡ liim (5000)

(Mt 14:13-21; Mk 6:30-44; Lu 9:10-17)

6 ¹Muri ghoru, Yesu toman taghoniḡḡa toni tigham waan ve tivoool tila pa ya naliu Galilaia paḡa ite. Ya tonowen, iza ite Tiberias. ²Tila tiloon tonowe, ve ival tiina kat titaghoni ve yesḡa tila. Pasa, tighita mbef gharatoonḡadi naol to ye ighamgham di pa yes moroghoonḡa. ³Yesu yesḡa taghoniḡḡa toni tizala ndug mbuḡa eez, ve mboledi izi ve tinepneep. ⁴Sawa tonenen, sawa to yes Yuda tilup di pa sunuunḡ tiina to Pasova, nene inim igharau wa.^f

⁵Yesu mbole izi ve inepneep, ve mata ila le ighita ival tiina tonowen tikeet tiḡarua tila. Tovenen ighason Pilip ighaze: "Pale taghol aniiḡ sine, ve tapan ival tiina tonene?" ⁶Saveej tonene, ye isavia pa itoov Pilip. Eemoghon ye tau iwataḡ sa ḡgar to ye ighaze ighami.

⁷Pilip ipamuul aliḡa ighaze: "Wai, ival ne ris? Ighaze taghol adi aniiḡ rita pa titatan atedi pani, nene yaam denari 200 iraua paam maau."

⁸Ghoru taghoniḡḡa toni ite, iza Andreas (ye Simon Petrus tazi) isaav pa Yesu ighaze: ⁹"Ai, ughita pain tonene. Ye a mberet bali liim, ve iigh geegeu ru. Eemoghon tamtoghon tonene, ival le ival kat. Aniiḡ ḡgiira tovene pale irau di vena?"

¹⁰⁻¹¹Ndug to tineep pani, le kikiliḡḡ popoia. Tovenen Yesu isaav pa taghoniḡḡa toni ighaze: "Ala asaav pa ival tiina tonowen mboledi izi." Ival tiina mboledi izi, ghoru Yesu igham mberet tonowen, ipait Maaron pani, ve ireii padi. Ghoru igham ḡgar raraate moghon pa iigh. Tovenen ival tiina tighan le isoon di. Ival tiina tonenen, nditamoot todi moghon irau ndiḡndiḡ liim (5000) ma venen.

¹²⁻¹³Tamtoghon tisob tighan le apodi isunḡ, ghoru Yesu isaav pa taghoniḡḡa toni ighaze: "Yam ala anḡoog avodi alulu to izi we. Takaria aniiḡ malep." Tovenen tila tiḡoog aniiḡ pida pida tonowen, ve tinonog di tila nakaral saanḡul ve ru le tivon.

¹⁴Ival tiina tighita mbef gharatoonḡa to Yesu ighami inim ghilaloon padi, le tisaav tighaze: "Onoon kat, propet tiina to tisavia tighaze Maaron pale imbaanḡa izi inim taan, tau tonene!"^{g h}

e 5:47 Lu 16:31 **f 6:4** Pasova ivotvot pa ndaman to naol ne. Yoan imbood saveej pa Pasova tol. Iḡgat inim ru pani, nene isavia Pasova eez. Iḡgat tonene isavia Pasova ite to inim ru pani. Ve Yesu imaat pa Pasova to inim tol pani. **g 6:14** Yes Yuda to tineep pa sawa to Yesu, matadi iḡgal tighaze Maaron pale imbaanḡ propet tiina eez padi, itaghon saveej to Lo 18:15-19. Pida tighaze ḡgeu tonowen pale Mesia paam. Ve pida tighaze ye pale igham uraat to propet moghon. **h 6:14** Lo 18:15-22; Yo 1:21

¹⁵Tovenen timundig tighaze tikisi ve tighuri inim kinik padi pataghaan. Eemoghon Yesu iwataḡ nḡar todi wa. Tovenen ipul di tizi, ve ighau izala pa lolooz, lesu enḡeni ineeḡ tonowe.ⁱ

Yesu ilaagh izala ya pogho
(Mt 14:22-33; Mk 6:45-52)

¹⁶Taghoniija to Yesu tinepneep le rabrab izi, ghoru tizila pa naari, ¹⁷ve tiza waan, lesu tiraav tivool tila pa ndug Kapernaum to ineeḡ ya naliu paḡa ite. Sawa tonenen, Yesu ila ivot todi sone. Ve mboḡ izi wa. ¹⁸Tivot gha tila ve mala maau, yaghur tiina imundig le ipei dibom tintina. ¹⁹Tapiridi pa nḡoraan le tila tivot bodbodaan to ya naliu. Ghoru matadi imuul, le tighita Yesu ilaghlaagh ila ya pogho inarua di inim le igharau di. Tighita le matughezaan tiina igham di. ²⁰Eemoghon Yesu isaav padi ighaze: “Amatughez malep! You nanepneep.” ²¹Ghoru lolodi poia, ve tighami iza waan. Rikia moghon ve tila tilooḡ naari to tighaze tila pani.

Ival tisaḡan Yesu

²²⁻²³Ival tiina to tineep izi ya naliu paḡa ite, tisaḡan Yesu mboḡ le ndugizau. Ghoru tigham nḡar naol pani. Pasa, noor tighita waan ee moghon to taghoniija toni tighami ve tila. Waan ite paam maau. Eemoghon Yesu ila toman di maau. Taghoniija toni moghon to tivot tila. Ival tiina tonowen tinepneep tonowe, ve waan geeḡu pida to ndug Tiberias tilooḡ tigharau ndug to noor moghon Tiina toit ineeḡ pani, ve ipait Maaron pa aniiḡ, ve igham pa ival tiina ve tighan. ²⁴Ival tiina to tisaḡan Yesu, tighita Yesu toman taghoniija toni naghodi maau, tovenen tiza waan geeḡu tonowen, ve yesḡa waan tamtoghonadi tiraav tivool tila pa Kapernaum. Lesu tikaal Yesu tonowe.

Yesu, ye aniiḡ to igham ghiit taneep mataad iyaryaar

²⁵Ival tiina tonenen tila tilooḡ ya naliu paḡa ite, ve tindeej Yesu tonowe. Tovenen tighasoni tighaze: “Mos Tau, unum sualen nḡeez?”

²⁶Yesu ipamuul aliḡadi ighaze: “You nasaav payam. Onoon kat, yam agham nḡar pa mbeg gharatooḡadi tintina to naghama di tinim ghilalooḡ payam, ve akaal ghou anim ne maau. Yam ataghon ghou anim pasa, aghan katin aniiḡ le apomim isuḡ! ²⁷Alooḡ, aniiḡ to isami rikrikia, yam arab taumim pani malep. Yam irau azuarua gham pa aniiḡ to pale igham gham aneeḡ matamim iyaryaar le alok. Aniiḡ tonowen, Tamtoghon Natu irau igham payam. Pasa, Tama Maaron igham mbeg gharatooḡa inim ghilalooḡ pani, tauto ipatooḡa ighaze ye iza pa ghamuuḡ uraat tovene.”^j

²⁸Tovenen yes tighasoni: “Ighaze venen, pale nigham sa, lesu nigham uraat to Maaron lolo pani?”

i 6:15 Mk 6:46 **j** 6:27 Is 55:2; Mt 4:4

²⁹Yesu ipamuul aliñadi ighaze: “Uraat to Maaron ighaze yam aghami, nene vene: Yam irau aghur ila to ñgeu to ye imbaañja inim.”^k

³⁰⁻³¹Tovenen tighasoni muul: “Venen, pale ugham sa mbeb ivot inim ghilaloñ payei, lesu nighita ve nighur ila nighaze Maaron ineep toman ghom pa uraat tiom? Ughita. Yei nighur ila saveeñ to Mose pasa, muuñ sawa to nditimbunai tilaghaaagh izi ndug balim, ye igham aniiñ manna padi, ve tighanghan. Saveeña timbooda pataghaañ wa. Ighaze:

‘Ye igham aniiñ to sambam izi padi ve tighan.’”^l

³²Yesu ipamuul aliñadi ighaze: “You nasaav payam kat. Yam aghaze Mose igham aniiñ to sambam izi pa nditimbunim ve tighan? Maau. Pasa, aniiñ tau to ipul sambam ve izi inim, tauto aazne Tamañ Maaron igham payam. ³³Aniiñ to Maaron igham payam, nene ñgeu to ipul sambam ve izi inim, lesu igham nepooñ poia pa tamtoghon to taan.”^m

³⁴Yes tilooñ saveeñ tonene, ve tisaav pani muul tighaze: “Wai tiina, ighaze venen, ghoru ugham aniiñ tonowen payei irau sawa isob!”

³⁵Yesu isaav padi muul ighaze: “Aniiñ to igham tamtoghon tineep matadi iyaryaar, nene you taug. Tamtoghon to ighaze inim tiou, nene pale pitoola muul maau. Ve ighaze ñgeu eta ighur inim tiou, nene pale muruni muul maau.”ⁿ

³⁶You nasaav payam wa. Onoon, yam aghita ghou toman uraat tiou. Eemoghon aghur inim tiou maau. ³⁷Ve tamtoghon to Tamañ Maaron ighur di pa tinim leg, yes tisob pale tinim tiou. Ve ighaze tamtoghon eta inim tiou, nene you irau nazuruni maau. Maau le maau kat.^o

³⁸“You naneep sambam ve nazi nanim taan pa nagham mbeb eta itaghon taug lolog ne maau. You nazi nanim pa nataghon Tamañ to imbaañ ghou nanim ne lolo. ³⁹Ve ye lolo ighaze yes to ye ighur di tinim leg, irau napul eta ilale maau. Ye ighaze sawa to Mboñ Muri, you napamundigin di pa mateeñ.”^p

⁴⁰Onoon kat, Tamañ Maaron lolo tovene: Tamtoghon tisob to tighilaal Natu ve tighur ila toni, ye ighaze tigham nepooñ poia ila toni, ve tineep tovene itaghoni taghoni gha ila. Tovenen Mboñ Muri, you pale napamundigin di pa mateeñ ve timundig matadi iyaryaar.”^q

⁴¹Yes Yuda tilooñ saveeñ tonene, le irau lolodi maau ve tiyou avodi pani. Pasa, Yesu isaav padi ighaze: “Aniiñ tau to ipul sambam ve izi inim, nene you taug.” ⁴²Ve tivelegi tighaze: “Ñgeu tonene, ye Yosep natu Yesu. Iit tawatag tama ve tina. Pughu vena to aazne isaav ighaze ye ipul sambam ve izi inim?”^r

⁴³Tovenen Yesu ipamuul aliñadi ighaze: “Yam lolomim ñukia ve ayu avomim pasa? ⁴⁴Tamtoghon eta irau inim tiou sorok ne maau. Tamañ to

k 6:29 1Yo 3:23 **l 6:30-31** Igham 16:4,15 **m 6:33** Yo 3:13,31; 1Yo 5:11 **n 6:35** Is 55:1-2
o 6:37 Mt 11:28 **p 6:39** Yo 10:28; Ro 8:29,38; Pil 1:6; 1Pe 1:5 **q 6:40** Yo 3:16, 11:25
r 6:42 Mt 13:54; Yo 7:27

imbaan̄ ghou nanim ne, irau ipazaagh tamtoghon lolodi ve ighereb ngar todi in̄arua ghou, ghorō tinim tiou. Tamtoghon tovene, sawa to Mboᅇ Muri, you pale napamundigini pa mateeᅇ ve ineeᅇ mata iyaryaar.^s

⁴⁵“Saveeᅇ waaro eeᅇ ineeᅇ ila rau to yes propeta. Isaav ighaze:

‘Maaron pale ipatoot tamtoghon tisob ve ipaghazoᅇan ngar todi.’^t Tamtoghon tisob to tiloᅇloᅇn̄ Tamaᅇ aliᅇa ve tighamghan̄ ngar ila toni, nene pale tinim tiou. ⁴⁶Tamtoghon eta to taan ighita Tamaᅇ Maaron pa eta sone. Ye to ineeᅇ to Maaron ve inim, ye moghon to ighita.^u

⁴⁷“You nasaav payam: Onoon kat, ighaze tamtoghon eta ighur inim tiou, nene ye igham nepooᅇ poia ila to Maaron wa. Ve ye pale ineeᅇ tovene itaghoni taghoni gha ila.^v

⁴⁸Pasa, you taug aniiᅇ to igham tamtoghon tineep matadi iyaryaar le alok. ⁴⁹Onoon muuᅇ nditimumim tighanghan̄ aniiᅇ manna izi ndug balim. Eemoghon tisob timatmaat. ⁵⁰Ve aniiᅇ to you nasavia ne, nene ipul sambam ve izi inim. Leso yes to tighani, timaat gha tilaledi sob, ve tineep matadi iyaryaar le alok. ⁵¹Aniiᅇ to ipul sambam ve izi inim taan, ve igham tamtoghon tineep matadi iyaryaar, nene you taug. Ighaze tamtoghon eta ighan̄ aniiᅇ tonene, ye pale ineeᅇ mata iyaryaar le alok. Aniiᅇ to nasasavia, nene you mindag. Pasa, you pale napul taug namaat pa tamtoghon to taan, leso tigham nepooᅇ poia ila to Maaron.”^w

⁵²Yes Yuda tilooᅇ saveeᅇ tonene, le ireu lolodi kat. Tovenen tiwazoran di tighaze: “Wai, ᅇgeu tonene ighaze igham minda pait ve taghani? Pale mbeb tonene ivot vena?”

⁵³Tovenen Yesu isaav padi muul ighaze: “You nasaav payam: Onoon kat, ighaze aghan̄ Tamtoghon Natu minda maau, ve aghun̄ siᅇ toni maau, yam irau aghan̄ nepooᅇ poia ila to Maaron maau.^x ᅇ

⁵⁴Ve tamtoghon to tighan̄ mindag ve tighun̄ siᅇ tiou, nene tigham nepooᅇ poia ila to Maaron wa. Ve yes pale tineep tovene le alok. Tovenen sawa to Mboᅇ Muri, you pale napamundigin di pa mateeᅇ ve tineep matadi iyaryaar. ⁵⁵Pasa, mindag, nene aniiᅇ tau. Ve siᅇ tiou, nene ya tau to ghunuᅇ. ⁵⁶Ighaze tamtoghon eta ighan̄ mindag ve ighun̄ siᅇ tiou, nene pale yeru nilup ghei ninim ee moghon, ve ye ineeᅇ inim tiou, ve you naneep ila toni irau sawa isob.

⁵⁷“Tamaᅇ to imbaan̄ ghou nanim ne, ye nepooᅇ mata yaryaara pughu, ve you naneep ila toni. Ve tamtoghon to ighaze ighanghan̄ inim tiou,

s 6:44 Yer 31:3; Yo 12:32; Mbaᅇ 13:48; 1Kor 2:14 **t 6:45** Is 54:13; Yer 31:34; Hib 8:10; 1Yo 2:27 **u 6:46** Igham 33:20; Yo 1:18 **v 6:47** Yo 3:36; 1Yo 5:13 **w 6:51** Hib 10:5,10
x 6:53 Ndiran ngara pida tighaze saveeᅇ to Yesu tonene in̄arua ngar to ghaniᅇn̄ pasa. Ve ndiran ngara pida tighaze saveeᅇ tonene, pughu tovene: lit irau tagham Yesu inim leed, ve taghur ila taghaze pataᅇani to ye imbaada ve mateeᅇ toni, nene ireu sosor toit. Ighaze tagham tovene, ye pale ipalot ghiit inimale aniiᅇ, ve tagham nepooᅇ poia ila toni.
y 6:53 Mt 26:26+

ve ighamgham tapiri inim tiou, tovene paam. Ye pale igham nepooŋ poia inim tiou. ⁵⁸Aniŋ to ineeŋ sambam ve izi, ve you nasasavia payam ne, nene aniŋ mata ite pa aniŋ manna to muuŋ nditimumim tighani izi ndug balim. Pasa, yes to tighan manna tonowen, tisob timatmaat. Eemoghon tamtoghon to ighaze ighan aniŋ to you nasavia, nene pale ineeŋ mata iyaryaar le alok.”

⁵⁹Yesu ineeŋ izi ndug Kapernaum, ve ipatoot di pa Maaron aliŋa ilooŋ ila rumai todi, ve isavia saveeŋ tonene padi.

**Tapul Yesu malep. Pasa, saveeŋ to igham ghiit
taneep mataad iyaryaar, ineeŋ toni**

⁶⁰⁻⁶¹Tamtoghon katindi to titaghon Yesu, tilooŋ saveeŋ toni tonenen, le irau lolodi maau. Tovenen tiyou avodi pani tighaze: “Wai, saveeŋ tonene pataŋani kat! Sei pale ilooŋa ve ighur ila?”

Eemoghon Yesu iwataŋ yes tiyou avodi pa aliŋa to ye isavia. Tovenen isaav padi ighaze: “Vena, yam arere ghou pa saveeŋ tiou tonene, tauto aghaze apul ghou ne? ⁶²Ighaze venen, ve muri yam aghita Tamtoghon Natu imuul izala pa ndug to muuŋ ye ineeŋ pani, nene pale agham ŋgar vena?”^z

⁶³Maaron Avuvu moghon irau igham nepooŋ poia to anunuud ivot. Mbeb eta to tamtoghon to taan tighami ila taudi tapiridi ve ŋgar todi, irau iuul di pa tigham nepooŋ tonenen maau. Saveeŋ to you nasavia payam, tauto inim ataam pa agham Maaron Avuvu toman nepooŋ poia.^a

⁶⁴Eemoghon tamtoghon pida to tineep ila lolomim, tighur ila maau.” Yesu isavia saveeŋ tonene pasa, sawa to ye ipamundigin uraat toni ve inim, ye iwataŋ yes to tighur ila toni maau. Ve ŋgeu to muri ighuri ila koia nimadi ne paam, Yesu iwataŋi.

⁶⁵Yesu iseeŋ saveeŋ toni muul ighaze: “Pughu tonene, to you nasaav payam pataghaaŋ naghaze: ‘Tamtoghon eta irau inim tiou sorok ne maau. Tamaŋ Maaron irau iuuli ve ighereb ŋgar toni iŋarua ghou, ghoru inim tiou.’”^b

⁶⁶Yesu isavia saveeŋ tonene le isob, ghoru tamtoghon katindi to titaghoni, yes tipuli, ve tighau tila. Muri, tilaagh tomani muul maau.

⁶⁷Tovenen Yesu ighason taghoniŋa toni saangul ve ru ighaze: “Vena, yam paam aghaze apul ghou ve aghau?”

⁶⁸Simon Petrus ipamuul aliŋa ighaze: “Tiina, ighaze nipul ghom ve nighau, pale nila to sei? Pasa, saveeŋ to pale igham ghei nineep matamai iyaryaar le alok, nene ineeŋ tiom. ⁶⁹Yei nighilaal ghom wa, ve nighur ilat tiom nighaze yom ŋgeu patabuaŋ to Maaron imbaaŋ ghom unum.”^c

z 6:62 Mk 16:19; Mbaŋ 1:9+; Ep 4:8 **a 6:63** 2Kor 3:6; 1Pe 1:23 **b 6:65** Yo 6:44
c 6:69 Mt 16:16; Yo 11:27

⁷⁰Tovenen Yesu ipamuul alinjadi ighaze: “Yam saangul ve ru tonene, you taug nisia gham anim leg. Eemoghon tamtoghon tiam eez, ye inim Ijgeu Samia le wa.” ⁷¹Saveej tonene, Yesu isavia injarua Yudas to Simon Iskariot natu. Onoon, taghoniinja toni saangul ve ru, Yudas, ye todi eez. Eemoghon muri, ye ighur Yesu ila koia nimadi.^d

Yesu nditazi tighur ila toni maau

7 ¹Muri pa nenen, Yesu lolo pa ilaagh izi Yudea muul maau. Pasa, ye iwatag: Daba to yes Yuda to tineep nowe ne, tikalkaal ataam pa tirabi imaat. Tovenen ilaghlaagh izi Galilaia moghon. ²Sawa tonenen, lupuuñ tiina ite to yes Yuda inim igharau. Lupuuñ tonenen, to matadi injal pa sawa to nditimbudi tilaghlaagh izi ndug balim ve tinepneep ila dur moghon.^e

³Tovenen Yesu nditazi tisaav pani tighaze: “Upul ndug tonene, ve ula pa Yudea. Leso ndiran tiom pida to tinepneep tonowe paam tighita uraat to yom ughamgham di ne. ⁴Ighaze ngeu eta ighaze varu ilaan irau ndug, nene irau igham uraat toni inim ngozaanj maau. Tovenen ighaze yom ugham uraat tovene, yom irau upatooñ naghom pa ival tiina.”

⁵Onoon, Yesu nditazi kat. Eemoghon yes tighur ila toni sone. Tauto tisaav pani tovene.^f

⁶Tovenen Yesu isaav padi ighaze: “Sawa sine to aghaze ala, yam irau ala. Ve sawa tiou to nala, nene sone. ⁷Tamtoghon to taan ledi pughu eta to tighur koi payam maau. Eemoghon you, ghoru tighurghur koi payou. Pasa, njgar samsamia naol to tighamgham di ne, you navotia di tighazooñ.^g

⁸Tovenen yam moghon azala pa lupuuñ tiina tonowen. You irau nalat maau. Pale naneep. Pasa, sawa tiou to nazala, nene sone.” ⁹Yesu isaav padi tovene, ve ineep izi Galilaia.

Yesu izala pa Yerusalem, ve ighita lupuuñ tiina to Dur^h

¹⁰Tovenen Yesu nditazi tizala pa lupuuñ tiina tonenen. Muri ghoru, ye paam ana imundig ve itaghon di izala. Eemoghon ilaagh ghazooña maau. Ilaagh inim yongaan, ve ila ivot. ¹¹Daba to yes Yuda to tineep pa lupuuñ tiina tonowen, tikaal Yesu, ve tiwaghasonin di tighaze: “Ijgeu tonowen ineep sine?”

d 6:71 Mt 26:14+ **e** 7:2 Wkp 23:34+ **f** 7:5 Mbo 69:8; Mk 3:21 **g** 7:7 Yo 3:19+, 15:18+ **h** 7:9 Lupuuñ tiina to Dur ivotvot pa Septemba ma Oktoba. Sawa tonenen, nene sawa to tiyou oliv ve vaen anoja. Sawa to lupuuñ tonowen, yes Yuda ival tizala pa Yerusalem pa sunjuuñ, ve tigharaat dur enjaena le irau di, ve tineep ilooñ ila irau wik eez. Lupuuñ to Dur njgara tovene: Yes Yuda lolodi poia pa oliv ve vaen anoja to tiyou di, ve tipait Maaron pani. Ve matadi injal sawa to nditimbudi tilaghlaagh izi ndug balim to le ya maau, ve Maaron igham ya ivot ila yaam tiina eez ve ireer, lesu tighun.

¹²Ve ival tiina tiwazoran di pani paam. Pida tighaze: “Ye ngeu poia.” Ve pida tighaze: “Maau, ye iwatombanon ival tiina le tiyel pa ataam to Maaron.” ¹³Eemoghon saveej to tisasavia pa Yesu, nene tisavia ivot ighazooj maau. Pasa, timatughez pa daba to yes Yuda.

¹⁴Tinim bodbodaaj to lupuuñ tiina tonenen, ghoru Yesu inim peria, ve malmali izala pa Rumai Tiina, ve ipatoot tamtoghon pa Maaron aliña. ¹⁵Daba to yes Yuda tilooñ saveej toni le ruñadi iza. Ve tisaav tighaze: “Wai, ngeu tonene igham njar ila to patoñaaj eta maau. Pughu vena to ye le njar tiina tovene?”ⁱ

¹⁶Yesu isaav padi ighaze: “Sawa to napatoot gham pa Maaron aliña, saveej to navovotia payam, nene taug saveej tiou maau. Nene saveej to ñgeu to imbaaj ghou nanim.”^j

¹⁷Ighaze tamtoghon eta ighaze itaghon Maaron lolo, ye pale ighilaal: Saveej to you napatoot gham pani, nene inim pa Maaron, ma nasavia itaghon taug njar tiou? ¹⁸Ighaze tamtoghon eta isasavia saveej itaghon tau njar toni, nene taghilaal taghaze ye ighamgham pa tau iza moghon. Eemoghon ighaze tamtoghon eta izuaria tau pa pakuruuñ ñgeu to imbaaña inim ne iza, nene ye avo onoon, ve njar toni denja moghon. Kaarom eta ineep ila lolo maau.

¹⁹Muuñ, Mose igham tutuuñ pa nditimumim. Eemoghon tiam eta itaghoni kat maau. Pughu vena to aazne azuaria gham aghaze arab ghou namaat?”^k

²⁰Ival tiina tilooñ saveej toni tonene, ve tisaav pani tighaze: “Wai, sei ighaze irab ghom umaat? Avuvu samia eta avaat izeev ghom. Tauto njar tiom iwaghamgham.”^l

²¹Yesu ipamuul aliñadi ighaze: “You naghham mbep gharatooñ ee moghon, ve yam asob ruñamim iza pani ve agham njar naol.”^m

²²⁻²³Aghita. Muuñ, Mose ighur tutuuñ payam pa njar to zirooñ ndipain. Eemoghon ye ipamundigin njar tonowen maau. Nditimumim Abaram, Isak, ve Yakop, tauto tipamundigini. Muri ghoru, Mose isavia njar tonenen tutuuña payam. Yam aghaze ataghon tutuuñ toni tonenen, tauto azir ndinatutumim. Eemoghon sawa pida, yam agham uraat tonenen ila umbom patabuañ to Maaron. Pa vene, amalaaj pa tutuuñ to Mose.ⁿ Laak, ighaze yam taumim aghamgham tovene, pughu vena to atemim yabyab payou? You nanim pa ghamuuñ uraat to ulaaj. Tauto nagharaat narape eez tini isob poia ila sawa to umbom patabuañ.^o

²⁴Yam aṅgabiiz mbep to potla moghon malep. Aneep ve aṅgabiiz poian lolo toni paam. Leso gabizooñ tiam denja.”

i 7:15 Mt 13:54 j 7:16 Yo 14:24 k 7:19 Mbañ 7:38,53; Ro 2:17+ l 7:20 Mk 3:22
m 7:21 Yo 5:2+ n 7:22-23 Yuda tidi tipoop ndinatudi nditamoot ve mboñ inim liim ve tol pani, ghoru uraat to zirooñ ndinatudi tonenen ivot. Tovenen ighaze tipoop di pa Fraide, nene Saree to wai muri, yes pale tizir di. Eemoghon Sarere, nene umbom patabuañ to Maaron. o 7:22-23 Mbnp 17:9+; Wkp 12:3

Tamtoghon tiwazoran di pa Yesu: Ye Mesia, ma maau?

²⁵Tamtoghon pida to Yerusalem tilooŋ Yesu saveeŋ toni ve tisaav tighaze: “Vena, ŋgeu to daba toit tizuaria di pa tirabi imaat, tau tonene?^p ²⁶Aghita. Aazne, ye isavsaav ila ival tiina matadi. Eemoghon daba toit tisavia saveeŋ eta pani maau. Neneeŋadi moghon. Vena, yes avaat tiwatagi tighaze ye Mesia? ²⁷Eemoghon ŋgeu tonene, iit tawatag ndug to ye inim pani. Ve sawa to Mesia tau inim, tamtoghon eta pale iwataŋ ndug to ye inim pani ne maau.”

²⁸Yesu ipatoot tamtoghon pa Maaron aliŋa izi Rumai Tiina nagho, ve isaav aliŋa tiina ighaze: “Vena, yam agham ŋgar aghaze awatag ghou, ve awatag ndug to nanim pani ne? Alooŋ. You nataghon taug lolog ve nanim maau. Tamaŋ Maaron imbaaŋ ghou to nanim. Ye avo onoon, ve itataghon saveeŋ mbuaaŋ toni. Yam awatagi maau. ²⁹Eemoghon you, ghoru nawatagi. Pasa, naneep toni, ve ye imbaaŋ ghou nanim.”^q

³⁰Yes tilooŋ saveeŋ toni tonene, ve tighaze tikisi pataghaaŋ. Eemoghon eta kokor iza pani maau. Pasa, sawa toni ivot sone. ³¹Tamtoghon katindi to tineep ila ival tiina lolodi ve tilooŋ saveeŋ toni, tighur ila toni, ve tisaav tighaze: “Mesia to tasasaŋani ne, ighaze inim, pale irau ilib pa ŋgeu tonene pa ghamuunŋ mbeb gharatooŋadi? Maau. Ye tau tonene.”

Yes daba tighaze tikis Yesu

³²Ndiran tutuunŋa tilooŋ ival tiina tikamuun pa Yesu tighaze ye Mesia. Tovenen yesŋa yes daba to watoonŋrau timbaaŋ uraata pida to Rumai Tiina tila pa kisiŋi.

³³Yesu isaav padi ighaze: “You pale itiŋa taneep ris, ghoru napul gham, ve namuul nala to ŋgeu to imbaaŋ ghou nanim.”^r

³⁴Muri, yam pale azuaria gham pa kaloonŋ ghou. Eemoghon irau andeeŋ ghou maau. Pasa, ndug to you pale nala pani, yam irau ala pani maau.”^s

³⁵Tovenen daba to yes Yuda tiwaghasonin di tighaze: “ŋgeu tonene pale ila sine ve taghita muul maau? Ma ye ighaze ila to nditaad pida to tila tineep ila yes Grika lolodi we, leso ipatoot yes Grika paam pa Maaron aliŋa? ³⁶Saveeŋ toni tonene, pughu vena? Pasa, ye isaav pait ighaze: ‘Yam pale azuaria gham pa kaloonŋ ghou. Eemoghon irau andeeŋ ghou maau. Ve ndug to you nala pani, nene yam irau ala pani maau.’”

Yesu irau igham ya to nepoonŋ mataad yaryaara pait

³⁷Sawa to lupuunŋ tonenen ighaze isob, nene sawa tiina kat to tilup di pa surjuunŋ. Sawa tonenen, Yesu imundig, ve isaav aliŋa tiina tovene: “Ighaze tamtoghon eta muruni, ghoru inim tiou. You pale nagham a ya pa ighun.”^t

p 7:25 Yo 5:18 q 7:29 Mt 11:27; Yo 10:15 r 7:33 Yo 12:35 s 7:34 Yo 8:21, 13:33+ t 7:37 Is 55:1; Yo 4:10,14; Sgy 22:17

³⁸Pasa, Maaron aliŋa to timbooda, isaav ighaze: Tamtoghon tovene, ya to nepoon mata yaryaara pale ivon ila lolo, ve ireer ivot.”^u

³⁹Saveeŋ tonene, Yesu isavia iŋarua Maaron Avuvu. Muri, ye igham Avuvu tonowen pa tamtoghon tisob to tighur ila toni. Eemoghon sawa to ye isavia saveeŋ tonene, ival tiina tigham Avuvu Patabuaŋ sone. Pasa, sawa to Yesu ipatoon iza tiina ivot ighazoon, nene ivot sone.”^v

Tamtoghon tigham ŋgar naol pa Yesu

⁴⁰Ival tiina tiloon Yesu aliŋa tonene, ve tamtoghon pida timundig ve tisaav tighaze: “Onoon kat, propet tiina to tasasaŋani ne, tau tonene!”^w

⁴¹Ve pida tighaze: “Maau. Ŋgeu tonene, ye Mesia.” Ve pida tizoor di tighaze: “Aghita. Mesia irau ivot izi taan suruvu to Galilaia? Maau.

⁴²Pasa, Maaron aliŋa to timbooda, isaav ighaze Mesia pale ivot ila siŋ to David, ve tipooa izi David ndug toni Betelem.”^x

⁴³Tovenen ival tiina tonowen tigham ŋgar naol naol pa Yesu le tivalag taudi. ⁴⁴Pida tighaze tikisi pataghaaŋ. Eemoghon tamtoghon eta kokor iza pani maau.

Daba to yes Yuda tighur ila to Yesu maau

⁴⁵Tovenen yes uraata to timbaaŋ di tila pa kisiŋ Yesu ne, timuul tila sorok to yes daba to watoonrau ve ndiran tutuuŋa. Daba tonowen tighita di, ve tighason di tighaze: “Pughu vena to akis ŋgeu tonowen ve aghami anim maau?”

⁴⁶Yes uraata tonowen tisaav padi tighaze: “Wai, to muuŋ ve inim, tamtoghon eta isavsav inimale ŋgeu tonowen maau.”^y

⁴⁷Tovenen ndiran tutuuŋa tonowen tiyaan di tighaze: “Wai, kaarom toni ighamun ŋgar tiam paam? ⁴⁸Aghita. Daba toit ma ndiran tutuuŋa, todi eta ighur ila to ŋgeu tonowen? Maau.”^z

⁴⁹Nowe ival tiina to tikankaan pa tutuuŋ to Mose, tauto tighur ila toni. Ve tambaŋ di paam. Muri, mbalmbali to Maaron pale iza todi.”

⁵⁰Yes daba tonowen, tamtoghon todi eez to yesŋa tinepneep ne, iza Nikodemus. Ye ŋgeu to muuŋ ila to Yesu ve yesuru tisavsav. Ye isaav padi ighaze:^a

⁵¹“Ou, tutuuŋ toit isaav vena? Irau tasaav sorok taghaze tamtoghon eta igham sosor? Maau. Iit irau taloon saveeŋ toni, ve taŋgabiiz poian ŋgar to ye ighamghami, ghoru taghur atia pani.”^b

⁵²Yes tipamuul aliŋa tighaze: “Wai, ighaze venen, yom paam avaat Galilaia taamdi? Utiir poian Maaron saveeŋ toni, ve ugham ŋgar pani

u 7:38 Is 12:3, 44:3, 58:11; Ezek 47:1+ **v 7:39** Yoel 2:28; Yo 14:16+; Mbaŋ 2:4
w 7:40 Lo 18:15+; Yo 6:14 **x 7:42** Mbo 132:11; Mika 5:2; Mt 2:5+ **y 7:46** Mt 7:28+
z 7:48 Yo 12:42; 1Kor 1:26, 2:8 **a 7:50** Yo 3:1+, 19:39 **b 7:51** Lo 1:16+

pooi. Propet eta irau ivot izi taan suruvu to Galilaia maau.”⁵³ Ghoro yes tisob tighau mbiriis tila pa ruum todi todi.

Yesu lolo isamin liva eez to ighur maat

8 ¹Yesu ipul Yerusalem, ve izala pa lolooz Oliv, ve ineep tonowe pa mboj. ²Mbojmaagh kat, ve ye imuul ila, ve ilooj ila sirsir to Rumai Tiina. Ve ival tiina tinim tiluvuti. Tovenen ye mbole izi, ve ipatoot di pa Maaron aliya. ³⁻⁴Ye isavsaav padi, ve yes ngara to tutuuj toman ndiran tutuuna pida tigham liva eez, ve tila tivot toni. Liva tonowen ighur maat, ve tamtoghon pida tighita. Tauto tikisi, ve tighami tila to Yesu. Ghoro tipayoonda ila ival tiina matadi, ve tisaav pa Yesu tighaze: “Patoñaaj, ughita liva tonene. Ye ighur maat, ve tamtoghon pida tighita. ⁵Mose ighur tutuuj ariana pait ighaze liva tovene, iit irau tarabi pa yaam le imaat. Ve yom usaav vena?”^c

⁶Yes tisavia saveej tonene pa titoova. Ighaze ye isavia saveej eta isosor, ghoru inim le pughu pa tipayoonda pa savsaveej. Eemoghon Yesu ipamuul aliñadi rikia maau. Izi imbutur, ve imbodbood ila taan pa nima u.

⁷Yes tinoknok ghasoniini. Tovenen mata iza, ve isaav padi tovene: “Tiam eta, ighaze le sosor eta maau, ghoru igham yaam ve irab liva tonene muuj.”^d

⁸Ghoru mata izi muul, ve imbodbood pa nima u ila taan.

⁹Yes tilooj saveej toni, ve enaena tipaspas ve tiwaghaughau. Ndolman timuuj, ve yes papaghudi titaghon di, ve tisob tighau tila. Tovenen liva tonenen engeni moghon iyondyood ila Yesu nagh. ¹⁰Yesu imundig iyoon, ve ighasoni ighaze: “Liva, yes to tigham ghom unum ne, tila vena? Eta ineep pa ighur atia payom maau?”

¹¹Liva tonenen ipamuul aliya ighaze: “Tiina, eta ineep sualen muul maau. Tisob tighau tila wa.”

Yesu isaav pani muul: “Ighaze venen, you paam irau naghur atia payom maau. Ula. Eemoghon matam iñgal. Muri, ugham sosor muul malep.”^e

Yesu inim ghazooja to taan

¹²Yesu isaav ila pa ival tiina muul ighaze: “You taug to ghazooja to taan. Ighaze tamtoghon eta itaghon ghou, ye pale ilaagh ila ndoroom lolo muul maau. Ghazooja to Maaron pale ineep toni, ve igham nepooj poia inim tiou.”^f

Yesu ipariaaj tamtoghon pa tighur ila saveej toni

¹³Ndiran tutuuna tilooj saveej tonene, ve tisaav pani tighaze: “Ughita. Aazne, yom usavia taum, ve upariaaj taum saveej tiom leso tamtoghon

c 8:5 Wkp 20:10; Lo 22:22+ d 8:7 Mt 7:1+; Ro 2:1,22 e 8:11 Yo 3:17, 5:14
f 8:12 Mbo 27:1; Is 49:6; Lu 2:32; Yo 1:4+; 2Kor 4:6

tighur ilat tiom. Eemoghon lem mbbeb eta to ipariaan saveej tiom leso nighur ila ne maau. Saveej tovene, pale nighur ila vena?”

¹⁴Yesu ipamuul alijadi ighaze: “Onoon, you nasavia taug ve napariaan taug saveej tiou, leso tamtoghon tighur inim tiou. Ve saveej tiou, nene onoon. Yam irau aghur ila. Pasa, ndug to nanim pani ve muri pale namuul nala pani, you nawatagi. Eemoghon yam awatag ndug tonowen maau.^s

¹⁵Gabizoon tiam, nene itaghon ngar to tamtoghon. Eemoghon you nangabiiz tamtoghon nanimale yam maau. ¹⁶Ve ighaze nangabiiz tamtoghon eta, nene pale gabizoon tiou denja. Pasa, engengou nangabiiz tamtoghon eta maau. Tamañ to imbaan ghou nanim, yeru nilup ghei pa uraat tonenen. ¹⁷Saveej waaro eez to ineej ila tutuun tiam paam isaav tovene: ‘Ighaze tamtoghon ru tipariaan saveej eta, ve tisavia saveej raraate, nene irau taghur ila taghaze saveej tonenen, nene onoon.’^h

¹⁸Aazne, you taug napariaan saveej tiou. Eemoghon Tamañ to imbaan ghou nanim, ye paam ipariaan saveej tiou. Tovenen yam irau aghur ila.”ⁱ

¹⁹Tauto tighasoni tighaze: “Tamam ineej sine?”

Yesu ipamuul alijadi ighaze: “Yam awatag ghou maau. Tauto awatag Tamañ maau. Ve inimale awatag ghou, tone awatag Tamañ paam.”^j

²⁰Yesu ipatoot tamtoghon pa Maaron aliña izi ndug to tipipiyaav yaam pa uraat to Rumai Tiina, ve isavia saveej tonene. Eemoghon tamtoghon eta ikisi maau. Pasa, sawa toni ivot sone.

Ighaze taghur ila to Yesu maau, nene pale tamaat toman sosor toit ve talaleed

²¹Yesu isaav padi muul ighaze: “You pale napul gham ve nala, ve yam akaal ghou. Eemoghon irau aghita ghou maau. Pasa, ndug to you pale nala pani, nene yam irau ala pani maau. Tovenen yam pale amatmaat toman sosor tiam ve alalemim.”^k

²²Daba to yes Yuda tiloon saveej tonene, ve tiwaghasonin di tighaze: “Wai, ye isaav ighaze ndug to ye pale ila pani, nene iit irau tala pani maau. Saveej toni tonene, pughu vena? Ma ye ighaze ila irab tau imaat?”

²³Yesu isaav padi muul ighaze: “Aloon. Yam to sila. Ve you to sala. Yam to taan, tauto ataghon ngar to taan. Ve you to taan maau.”^l

²⁴Pughu tonene to nasaav payam naghaze yam pale amatmaat toman sosor tiam ve alalemim. Pasa, yam irau aghur ila aghaze IJgeu to iza YOU NANEPNEEP, nene you taug tonene.”^m

g 8:14 Yo 5:31+, 7:28+, 9:29 **h 8:17** Lo 19:15; Mt 18:16 **i 8:18** 1Yo 5:9 **j 8:19** Yo 14:7; 1Yo 2:23 **k 8:21** Yo 7:34, 13:33 **l 8:23** Yo 3:31 **m 8:24** Uwaat Maaron Igham Mulin Yes Israela (= Kisim Bek o Eksodus) 3:14. Maaron iza Yoova (o Yahweh), pughu tovene ‘You nanepneep.’ Tovenen saveej waaro tonene, pughu tovene: Iit irau taghur ila to Yesu taghaze ye Maaron.

Ve ighaze aghur inim tiou maau, yam pale amatmaat toman sosor tiam, ve alalemim.”ⁿ

²⁵Yes tilooŋ saveeŋ tonene, ve tighasoni muul tighaze: “Yom sei? Usavia taum kat.”

Yesu ipamuul aliŋadi ighaze: “Sawa to napamundigin uraat tiou ve inim, you navovotia taug payam. ²⁶You naghita ŋgar tiam naol isosor. Tovenen leg saveeŋ naol to nasavia payam, ve you irau naghur atia payam. Eemoghon you irau naghham tovene maau. Pasa, Ŋgeu to imbaaŋ ghou nanim, ye avo onoon. Ve saveeŋ to naloŋlooŋa ila toni, tauto navovotia pa yam tamtoŋhon to taan.”

²⁷Saveeŋ tonene, ye isavia iŋarua Tama Maaron. Eemoghon yes tighilaal saveeŋ toni pughu maau. ²⁸Tovenen Yesu iseeŋ saveeŋ toni muul ighaze: “Sawa to yam apayoon Tamtoŋhon Natu iza,^o nene pale ŋgar tiam ivot, ve aghilaal aghaze: You to izag Nanepneep. Ve awatag aghaze you naghham mbeb eta itaghon taug ŋgar tiou maau. Saveeŋ to naloŋa ila to Tamaŋ, tauto navovotia pa tamtoŋhon.^p

²⁹Ŋgeu to imbaaŋ ghou nanim, ye irau ipul ghou maau. Ye inepneep toman ghou. Pasa sawa isob, you nataghon ŋgar to ye lolo pani.” ³⁰Yesu isavia saveeŋ tonene, ve tamtoŋhon katindi to tiloŋlooŋa, tighur ila toni.

Saveeŋ onoon irau ipas ghiit tavot pa samia tapiri

³¹Ghoro Yesu isaav pa Yuda pida to tighur ila toni ne tovene: “Ighaze akis saveeŋ tiou tuŋia ve ataghoŋi, nene pale anim taghoŋiŋa tiou kat.

³²Ve yam pale awatag katin saveeŋ onoon, ve saveeŋ tonowen ipas gham avot pa samia tapiri. Leso anim mbesooŋa sorok muul sob.”^q

³³Yes tipamuul aliŋa tighaze: “Wai, yei tonene Abaram papaghu toni. Yei ninim mbesooŋa sorok pa tamtoŋhon eta pa eta sone. Pughu vena to yom usaav ughaze yei pale ninim mbesooŋa sorok muul maau?”^r

³⁴Yesu ipamuul ghasoniŋ todi ighaze: “Onoon kat, you nasaav payam. Tamtoŋhon tisob to tinoknok ghamuunŋ ŋgar samia, nene tinim mbesooŋa sorok pa ŋgar samia. Pasa, ŋgar tonowen to ighamgham pooz padi.^s

³⁵Mbesooŋa eta irau ineeŋ toman ruum tama itaghoŋi taghoŋi gha ila ne maau. Natu moghon to ineeŋ tomani irau sawa isob.^t

³⁶Tovenen ighaze Maaron Natu ipas gham avot pa samia tapiri, ye pale ipas gham kat. Leso samia iŋgin gham muul sob.^u

³⁷Onoon, yam papaghu to Abaram. Eemoghon saveeŋ tiou le ina eta to ineeŋ ila lolomim maau. Tauto aazne, azuarua gham aghaze le arab ghou

n 8:24 Igham 3:14; Yo 3:18 **o 8:28** Saveeŋ waaro tonene, Yesu isavia sawa to tirabi ila ai pambarooŋ ve tipayoonda imonau. Sawa tonenen ve ila, Yesu iza tiina pale ineeŋ ghazooŋa. **p 8:28** Yo 5:30, 12:32, 14:24 **q 8:32** Ro 6:18, 8:2; Ga 5:1 **r 8:33** Lu 3:8+
s 8:34 Ro 6:16+; 2Pe 2:19 **t 8:35** Mbnp 21:10; Ga 4:30 **u 8:36** Hib 2:14+; 1Yo 3:6,9

namaat. ³⁸Mbeb to yeru Tamaŋ nineep ve naghita, tauto nasavia payam. Ve yam tovene paam. Iŋgar to yam alonŋloŋa ila to tamamim, tauto aghamghami.”

Sa ndiran to Abaram papaghu toni kat?

³⁹Yes tipamuul aliŋa tighaze: “Yei timbumai to Abaram.”

Tovenen Yesu isaav padi ighaze: “Inimale yam Abaram papaghu toni kat, tone ataghon ŋgar to muuŋ ye ighamghami.”

⁴⁰Eemoghon maau. Aghita. Aazne, you navotia saveeŋ onoon to naloŋa ila to Tamaŋ Maaron ne payam. Eemoghon ŋgar tiam iyaryaŋ aghaze le arab ghou namaat. Abaram, ye igham ŋgar tovene maau. ⁴¹Nene yam ataghon tamamim ŋgar toni.”

Yes tipamuul aliŋa tighaze: “Yei Abaram papaghu toni kat. Ve Tamamai ee moghon kat, to Maaron. Nditinamai tipoop ghei sorok maau.”

⁴²Yesu ipamuul aliŋadi ighaze: “Inimale yam Maaron ndinatu kat, tone lolomim payou. Pasa, you naneep toni to nanim. You nataghon taug lolog ve nanim maau. Ye imbaaŋ ghou, tauto nanim.”

⁴³Pughu vena to aghazoŋ pa saveeŋ tiou sone? Yam avaat apoon lolomim wa. Tauto irau aloŋ saveeŋ tiou maau.”

⁴⁴Aloŋ wa! Yam tamamim to Sadan! Tauto aghaze le ataghon katin ŋgar to ye lolo pani. Sawa to muuŋ kat ve inim, ye ŋgeu to rabuuŋ tamtoghon timatmaat. Ve ye itaghon saveeŋ onoon maau. Pasa, saveeŋ onoon eta inepneep ila lolo. Ve ye to inim pughu pa saveeŋ kaarom to naol ne.”

⁴⁵Saveeŋ isob to you nasasavia payam, nene onoon moghon. Eemoghon yam lolomim pa saveeŋ onoon maau, tauto aghur ila saveeŋ tiou maau.

⁴⁶Ma vena? Ighaze tiam eta ighita ghou naghama sosor eta, ghoru ivotia lak! Ve ighaze leg sosor eta maau, ve nasasavia saveeŋ onoon moghon payam, pughu vena to aghur ila saveeŋ tiou maau?”

⁴⁷Sei to ighaze inim Maaron le, nene ilonŋloŋ Maaron aliŋa ve itaghoni. Eemoghon yam tamtoghon to Maaron maau. Tauto aloŋ aliŋa maau.”

Sawa to Abaram ivot sone, Yesu inep wa

⁴⁸Yesu isavia saveeŋ tonene, ve yes Yuda tisaav pani tighaze: “Wai, saveeŋ tauto nisavia ila wa. Yom ukankaan pa Maaron unumale yes Samaria. Yom, avuvu samia izeev ghom!”

⁴⁹Yesu ipamuul aliŋadi ighaze: “You, avuvu samia eta izeev ghou maau. You nazuaria ghou pa paitooŋ Tamaŋ Maaron iza. Eemoghon yam aveleg

v 8:39 Ro 2:28; Ga 3:7,29 w 8:42 Yo 16:27+; 1Yo 5:1 x 8:43 Ro 8:7; 1Kor 2:14

y 8:44 Mbnp 3:1+; 1Yo 3:8 z 8:46 Hib 4:15; 1Pe 2:22; 1Yo 3:5 a 8:47 Yo 10:26+, 18:37; 1Yo 4:6 b 8:48 Mk 3:21+; Yo 7:20, 10:20

ghou. ⁵⁰You naghām pa taug izag maau. Eemoghon Ɔgeu eez izuarīa tau ighaze ighām izag inim tiina, nene Tamaŋ Maaron. Ve uraat to gabizooŋ mbeb ve ghuruuŋ atīa, nene ineep ila ye tau nima.^c

⁵¹Onoon kat, you nasaav payam: Ighaze tamtoŋhon eta mata kisin saveeŋ tiou ve itaŋhoni, ye irau imaat ve ilale ne maau. Maau kat.”^d

⁵²Yes tilooŋ saveeŋ tonene, ve tisaav pani tighaze: “Aa, ŋgaramus niwatag katin ghom. Yom tonene, avuvu samīa izeev ghom! Pasa, Abaram toman propeta tisob timataar tila wa. Eemoghon yom usaav tovene: Ighaze tamtoŋhon eta mata kisin saveeŋ tiom ve itaŋhoni, ye irau imaat ve ilale ne maau. ⁵³Timbumai Abaram, ye imaat wa. Ve yes propeta paam timataar wa. Yom sa ŋgeu? Yom ughaze ulib pa Abaram? Usavia taum kat!”

⁵⁴Yesu isaav padi: “Ighaze napait taug izag, nene pale saveeŋ tiou ighur maau. Paitooŋ tovene, nene mbeb sorok. Eemoghon Tamaŋ to yam awatwaata aghaze Maaron tiam, ye tau to ipait ghou ve ighām izag inim tiina. ⁵⁵Yam awatagi rita maau. Eemoghon you, ghorō nawatagi. Tauto naloŋlooŋ aliŋa, ve nataghoni. Ighaze nasaav naghaze nawatagi maau, nene pale naghām kaarom nanimale yam. ⁵⁶Muūŋ, timbumim Abaram ighita sawa tiou to navot izi taan. Ye iwataŋ mbeb to pale ivot pa sawa tonene, tauto tini iza ve lolo poia kat.”^{e f}

⁵⁷Tovenen yes Yuda tonenen tipamuul Yesu aliŋa tighaze: “Wai, ndaman tiom tamoot ru saanŋul (50) sone. Ve yom upakur taum ughaze ughita Abaram!”

⁵⁸Yesu isaav padi muul ighaze: “Onoon kat, you nasaav payam: Abaram ivot sone, ve You Nanepneep.”^g

⁵⁹Saveeŋ toni tonene ireu yes Yuda tonenen lolodi. Tovenen tikor yaam tighaze tirabi pataghaaŋ. Eemoghon ye iŋguaaz tau, ve ipul Rumai Tiina, ve ivot ila pumuri.

Yesu igharaat ŋgeu eez to mata pisi

9 ¹Yesu ilaagh ila le ighita ŋgeu eez to mata pisi. Ye, tina ipooŋa tovene. ²Taghoniŋa toni tighita ŋgeu tonowen, ve tighason Yesu tighaze: “Patoŋaŋ, pughu vena to ŋgeu tonene tina ipooŋa mata pisi? Ye tau sosor toni, ma tama yesuru tina sosor todi?”^h

³Yesu ipamuul ghasoniŋ todi ighaze: “Ɔgeu tonene ighām sosor maau, ve tama yesuru tina paam tighām sosor maau. Patanani tonene ivot pani, leso Maaron iuuli ve ipatooŋ tapiri ve uraat toni ivot ighazooŋ.”ⁱ

⁴Aazne, nene sawa to ndag ve taneep ila ghazooŋa. Tovenen iit irau tagham uraat to Tamaŋ Maaron to imbaaŋ ghou nanim. Pasa, sawa to

c 8:50 Yo 5:41, 7:18 **d 8:51** Yo 5:24, 11:26 **e 8:56** Ɔgara pida tighaze Maaron ivotia mbeb to muri Mesia pale ighami pa Abaram ila vibiŋ. **f 8:56** Hib 11:13
g 8:58 Ighām 3:14; Yo 1:1; Kol 1:17; Syg 1:8 **h 9:2** Lu 13:2+ **i 9:3** Yo 11:4

ndoroom, nene inim igharau wa. Sawa tonenen ighaze ivot, nene irau tamtoghon eta igham uraat muul maau. ⁵Sawa to nanepneep izi taan, you taug to nanim ghazooŋa pa tamtoghon to taan.”^j

⁶Yesu isavia saveeŋ tonene le isob, ghoru ikor taan ris ila nima ve iŋazub ila, ve itoora ve ikumi ila ŋgeu tonenen mata.^k

⁷Ghoru isaav pani ighaze: “Ula ya naliu Siloam, ve umen matam.” (Ya tonowen iza, pughu tovene: ‘Mbanjoŋ.’) Tovenen ŋgeu tonenen itaghon Yesu aliŋa, ve ila imen mata. Sawa to ipul ya tonowen ve imuul inim, mata poia ve ighita ndug.

⁸Ndita pida to ruum todi igharau, ve tamtoghon to muuŋ tighita ŋgeu tonenen isuŋsuŋ tamtoghon pa le mbeb, yes tighita ŋgeu tonenen, le ruŋadi iza pani tighaze: “Wai, ŋgeu mata pisi to muuŋ inepneep ve isuŋsuŋ tamtoghon pa le mbeb, tau tonene?”

⁹Pida tighaze: “Vee! Ye tau tonene.” Ve pida tighaze: “Maau. Nene avaat ŋgeu ite paam to yesuru naghodi raraate.”

Ve ŋgeu tonenen inok saveeŋ ighaze: “Maau. You taug tonene!”

¹⁰Tovenen tighasoni tighaze: “Wai, vena to matam poia ve ughita ndug?”

¹¹Ye ipamuul aliŋadi ighaze: “Ŋgeu to iza Yesu, ye itoor taan toman ŋazuba ve ikumi ila matag, ghoru isaav payou ighaze “Ula ya naliu Siloam, ve umen matam.” Tovenen nataghon aliŋa ve nala namen matag, ve rikia moghon matag poia ve naghita ndug.”

¹²Tovenen tighasoni muul tighaze: “Ŋgeu tonowen, tau sine?”

Ye isaav padi ighaze: “Ii, you nakakaan pani.”

Ndiran tutuuŋa tipalooŋ ŋgeu to Yesu igharaat mata

¹³Ghoru tigham ŋgeu tonenen ve tila to ndiran tutuuŋa pida. ¹⁴Pasa, sawa to Yesu igharaat mata, nene umbom patabuaŋ. ¹⁵Tovenen ndiran tutuuŋa tonowen anadi tighason ŋgeu tonenen tighaze: “Sa ivot payom, to matam poia ne?”

Ye isaav padi ighaze: “Ŋgeu to iza Yesu, ye itoor taan toman ŋazuba, ve ikumi ila matag, ghoru nala nameni. Tauto aazne, matag poia ve naghita ndug.”

¹⁶Ndiran tutuuŋa tonenen tilooŋ saveeŋ toni tonene, ve tamtoghon todi pida tisaav tighaze: “Iit tawatag: Ŋgeu tonowen, Maaron imbaaŋa inim maau. Pasa, ye itaghon tutuuŋ to umbom patabuaŋ maau.”

Ve pida tighaze: “Maau. Ye ighamgham mbeb gharatoŋadi katindi to tipatoŋa tighaze Maaron ineep tomani pa uraat toni. Ighaze ye tamtoghon samia, nene irau igham mbeb tovene maau.” Tauto tivalag taudi.

¹⁷Tovenen tighason ngeu to Yesu igharaat mata ne muul tighaze: “Laak, yom to ye igharaat matam, ugham ngar pani vena?”

Ye ipamuul aliñadi ighaze: “Ye avaat propet eez to Maaron.”

¹⁸Onoon, ngeu tonenen, tina ipooa mata pisi, ve Yesu igharaat mata. Eemoghon ndiran tutuunja tonenen tighur ila maau. Tovenen tipoi tama yesuru tina tinim paam, ¹⁹ve tighason di tighaze: “Laak, natumim to yamru aghaze apooa mata pisi ne, tau tonene? Pughu vena to aazne mata poia ve ighita ndug?”

²⁰Tama ve tina tipamuul aliñadi tighaze: “Ngeu tonene, yeru niwatagi. Nene natumai. Ve niwatag nighaze nipooa mata pisi. ²¹Eemoghon ataam to aazne mata poia, ve sei to igharaat mata, nene nikankaan pani. Ye pain maau. Ye olman. Aghasoni, ghoru tau ipaes payam.”

²²Yesuru tisaav tovene pasa, timatughez pa daba to yes Yuda. Pasa, yes timbua saveen wa: Ighaze tamtoghon eta isaav tovene: ye ighur ila to Yesu ighaze ye Mesia, nene pale tizuruni pa lupuun todi, ve ila ineep pumuri. [Irau ilup toman di pa suruun ma uraat todi pida muul maau.]^l

²³Tauto tama ve tina tisaav padi tighaze: “Ye pain maau. Ye olman. Taumim aghasoni.”

²⁴Tovenen tipoi ngeu tonenen imuul inim, ve tisaav ariana pani tighaze: “Yom irau upait Maaron iza, ve usavia saveen onoon payei ila ye mata. Yei niwatag: Yesu tonowen, ye ngeu to ghamuun sosor!”

²⁵Ngeu tonenen ipamuul aliñadi ighaze: “Ye ngeu to ghamuun sosor, ma ngeu poia, nene you nawatagi maau. Ve mbeg ee moghon to you nawatagi, nene vene: Muun, matag pisi. Ve aazne, matag poia ve naghita ndug.”

²⁶Tovenen tighasoni muul tighaze: “Ye igham vena payom? Igharaat matam vena?”

²⁷Ye ipamuul aliñadi ighaze: “Saveen, tauto nasavia payam wa. Eemoghon yam aloon ghou maau. Pughu vena to anoknok ghasoniin ghou pa mbeg tonene? Yam paam aghaze le anim taghoniina toni?”

²⁸Tiloon aliña tonene, le igham di atedi yabyab kat. Tovenen tipiavaav saveen velegiin pani tighaze: “Yom to ngeu tonowen taghoniina toni. Eemoghon yei, ghoru nitaghon ngar to Mose. ²⁹Pasa, yei niwatag: Mose ivotia saveen to iloonja ila Maaron tau avo. Eemoghon ngeu tonowen, yei nikankaan pani toman uraat toni. Ineep sine to inim?”

³⁰Ngeu to muun mata pisi, ipamuul aliñadi ighaze: “Wai, naloon saveen tiam le runag iza pani! Ngeu tonowen igharaat matag, ve yam aghaze akankaan pani: Ineep sine to inim? ³¹Iit tawatag: Yes to tighamgham sosor, Maaron iloon di maau. Ye ilonloon yes to matadi ingalngali, ve titaghon aliña.”^m

³²Sawa to Maaron ighur sambam ve taan tivot, ve inim imuul aazne, iit talooŋ ŋgeu eta varu pa gharatooŋ tamtoghon to tina ipooa mata pisi nne maau. Aazne moghon, ghoru mbab tovene ivot. ³³Ighaze Maaron imbaaŋ ŋgeu tonowen maau, ye irau igham mbab gharatooŋa eta tovene maau.”ⁿ

³⁴Saveeŋ toni tonene ireu lolodi kat. Tovenen tipiyaav saveeŋ pani tighaze: “Ai, yom tonene, sawa to tinam ipoop ghom ve inim aazne, unepneep ilooŋ ila ŋgar samia lolo. Ve yom ughaze upatoot ghei pa Maaron aliŋa?” Tisaav pani tovene, ghoru tizuruni ighau.

Ndiran to tighur ila to Krisi maau, yes tinimale tamtoghon to matadi pisi

³⁵Yesu ilooŋ ŋgeu tonenen varu tighaze yes Yuda tizuruni ighau. Tovenen ila indeeŋa, ve ighasoni ighaze: “Vena? Yom ughur ila to Tamtoghon Natu, ma maau?”

³⁶Ŋgeu tonenen ipamuul aliŋa ighaze: “Tiina, Tamtoghon Natu tonowen, sei kat? Usavia payou, lesu naghur ila toni.”

³⁷Yesu isaav pani ighaze: “Yom ughita wa. Taug to ituru tasavsaav ne.”^o

³⁸Ŋgeu tonenen isaav pa Yesu ighaze: “Tiina, you naghur ilat tiom.” Ghoro iput aghe pani ve ipakuri.

³⁹Yesu isaav muul ighaze: “You nazi nanim taan pa navalag tamtoghon. Yes to tighilaal tighaze matadi pisi ve tikankaan pa Maaron ŋgar toni, nene pale matadi pakia ve tighazooŋ pani. Ve yes to tinumeer sorok tighaze matadi poia ve tighazooŋ pa Maaron ŋgar toni, nene pale matadi ipis, ve ndoroom ikau di le tisami kat.”^p

⁴⁰Yesu isavsaav, ve ndiran tutuunŋa pida to tiyondyood tigharai, tилоoŋa. Tovenen tighasoni tighaze: “Vena, yom ughaze yei tonene matamai pisi?”

⁴¹Yesu ipamuul aliŋadi: “Ighaze matamim pisi ve akankaan pa Maaron ŋgar toni, nene pale lemim sosor maau. Eemoghon yam aghaze matamim pakia ve aghazooŋ pa Maaron ŋgar toni. Tauto aazne, anepneep toman sosor tiam sone.”^q

Yesu iŋgin ataam to sirsiir

10 ¹Yesu isaav muul ighaze: “Onoon kat, you nasaav payam: Tamtoghon to ighaze ilooŋ ila sirsiir to sipsip, ye irau itaghon ataam, ve ilooŋ ila. Ve ighaze tamtoghon eta itaghon ataam maau, ve imalaan pa sirsiir ve ilooŋ ila, nene ye yubyub ve ŋgeu to ighaze iwaghamun sipsip. ²Eemoghon ŋgeu to itaghon ataam to sirsiir, ve ilooŋ ila, nene ye ŋginiinŋ tau to sipsip. ³Tovenen ŋginiinŋa to ataam to sirsiir pale ikaak ataam pani, ve ye ilooŋ ila. Yes sipsip toni

n 9:33 Mbo 146:8; Is 29:18, 35:5 **o 9:37** Yo 4:26 **p 9:39** Mt 13:11+; Yo 3:19
q 9:41 Yo 15:22+

tighilaal aliņa. Tovenen ye ipoipoi enjaeņa izadi, ve ighereb di tivot tila. ⁴Ighaze iyou di tisob tivot tila pumuri, ye pale imuņ padi, ve tikeet taghoni, ve yesņa tilaagh tila. Pasa, tighilaal aliņa. ⁵Eemoghon ighaze ŋgeu ite paam ipoi di, nene irau titaghoni maau. Pale tighau pani. Pasa, tighilaal aliņa maau.”

⁶Yesu isavia saveeņ palelaaņ tonene padi, eemoghon yes to tiloņlooņ saveeņ toni, tighilaal pughu maau.

⁷Tovenen ye isaav padi muul ighaze: “Onoon kat, you nasaav payam. Ataam to sirsir to sipsip tivotvot ve tiloņlooņ pani, nene you taug. ⁸Tamtoghon tisob to timuņ payou ve tinim, yes yubyubņa, ve ndiran to tiwaghamun sipsip.”

Eemoghon sipsip tilooņ aliņadi maau. ⁹You taug to ataam to sirsir. Tovenen ighaze tamtoghon eta iņarua ghou inim, ve ilooņ ila sirsir lolo, nene pale you naghām mulini ve ineep pooi. Ve ye pale ivotvot ve iloņlooņ, lesō ighām a aniņ popoia.⁵

¹⁰Ŋgeu yubyub, ye inim pa iwaghamun sipsip moghon. Ye iyubyub di, ireureu di, ve irabrab di timatmaat. Eemoghon you nanim pa naghām sipsip tiou tineep poia le poia kat.

Yesu, ye ŋginiņ poia to sipsip

¹¹“You taug to ŋginiņ poia to sipsip. Pasa, ŋginiņ poia, ye ipul tau kat pa sipsip toni.”^t

¹²⁻¹³Eemoghon ŋgeu to iņgin sipsip to tamtoghon ite, ye ŋginiņ tau to sipsip maau. Ighāmghām uraat pa le atia moghon. Tovenen ye pale ighur lolo pa sipsip kat maau. Pasa, ye sipsip tama maau. Ighaze ighita ŋgavuun sagsag eta inim, nene pale ipul sipsip tineep, ve ighau. Tovenen ŋgavuun sagsag pale ighan di, ve ireu di timbiriis.

¹⁴⁻¹⁵“You taug to ŋginiņ poia to sipsip. You nawatag sipsip tiou, ve yes tiwatag ghou, inimale you nawatag Tamaņ Maaron, ve ye iwatag ghou. Ve you pale napul taug namaat pa sipsip tiou. Lesō naghām mulin di ve tineep pooi.”^u

¹⁶Eemoghon you leg sipsip pida paam.^v

Yes to sirsir tonene maau. You leg uraat to nyou di tinim titaghon ghou paam. Yes pale tilooņ aliņag, ve yesņa sipsip tiou pida tilup di tinim lupuņ ee moghon, ve ledi ŋginiņ ee moghon.”^w

r 10:8 Tamtoghon to Yesu isavia di, nene daba samsamiadi pida to yes Yuda to iņgin poian sipsip to Maaron maau, ve matadi iņgal taudi moghon. Ughita Ezek. 34:1-23.
s 10:9 Yo 14:6; Ep 2:18; Hib 10:19 **t 10:11** Mbo 23:1; Ezek 34:8+; Yo 15:13; Hib 13:20; Syg 7:17 **u 10:14-15** Mt 11:27; 2Tim 2:19; 1Pe 2:25; 1Yo 3:16 **v 10:16** Sipsip pida paam to Yesu isavia di, nene tamtoghon to ndug ndug to muri pale tighur ila toni.
w 10:16 Yo 11:51+; Mbaņ 10:34; Ep 2:11+

¹⁷“Tamaŋ Maaron lolo payou kat. Pasa, you pale napul taug namaat. Leso namundig pa mateeŋ ve naneep matag iyaryaar muul.^x
¹⁸Tamtoghon eta to taan irau irab ghou namaat sorok ne maau. Nayokia taug, ghoru tirab ghou namaat. Pasa, you tapirig irau nayokia taug namaat, ve tapirig irau namundig matag iyaryaar muul, itaghon saveeŋ to Tamaŋ isavia payou.”

¹⁹Yes Yuda tilooŋ saveeŋ toni tonene, le tivalag di muul. ²⁰Tauto todi katindi tighaze: “Ŋgeu tonene, talooŋ saveeŋ toni pasa? Ye avuvu samia izeeva, tauto ŋgar toni iwaghamgham.”^y

²¹Eemoghon tamtoghon pida tisaav tighaze: “Ŋgeu to ighaze avuvu samia izeeva, nene irau isavia saveeŋ tovene maau. Ve aghita. Avuvu samia eta irau igharaat tamtoghon mata pisi ve ighita ndug? Maau.”^z

Yes Yuda tighur koi pa Yesu, ve tighaze tirabi pa yaam

²²Tinepneep le sawa to lupuuŋ tiina ite to yes Yuda ivot. Nene lupuuŋ to matadi iŋgal sawa to tigharaat mulin Rumai Tiina, ve tighuri inim Maaron le. Sawa to lupuuŋ tonowen, nene sawa to ndug yauna.^a ²³Yesu ilaghlaagh ila ruum to nepooŋ to Solomon ireii la Rumai Tiina dige ne lolo, ²⁴ve daba pida to yes Yuda tila tiluvuti, ve tisaav pani tighaze: “Yei nikaria saŋaniŋ ghom wa. Pale ŋeez o uvotia taum? Ighaze onoon yom Mesia, ghoru usaav ghazooŋa payei!”

²⁵⁻²⁶Yesu ipamuul aliŋadi ighaze: “You nasaav payam wa. Eemoghon yam aghur ila saveeŋ tiou maau. Uraat naol to naghhamgham di ila Tamaŋ iza, nene tipariaaŋ saveeŋ tiou. Eemoghon yam sipsip tiou maau, tauto aghur inim tiou maau.^b

²⁷Sipsip tiou, nene yes to tilooŋ aliŋag. You nawatag di tisob, ve yes titaghon ghou. ²⁸You naghham ledi nepooŋ poia to isenŋeeŋga taghoni gha ila. Tovenen yes irau timaat ve tilaledi ne maau. Pale tineep le alok. Ve tamtoghon eta irau isad di ila nimag maau.^c

x 10:17 Pil 2:8+ y 10:20 Yo 8:48,52 z 10:21 Yo 9:32+ a 10:22 Lupuuŋ tonene, iza ‘Hanuka.’ Ivotvot pa Desemba, igharau sawa to Krismas. Yes Yuda titun kandol ve lam katindi, ve tilup di pa suŋuuŋ irau mboŋ liim ve tol. Sawa tonenen, tineep toman tinidi iza. Lupuuŋ tonene, pughu tovene. Muuŋ, kinik samia eez to yes Grika iŋgin taan to Yudea, iza Antiokus Epipanes. Ye izuarua tau ighaze le igham yes Yuda tisob tipul ghurla todi, ve titaghon yes Grika ŋgar todi. Tovenen ighur patani naol padi, ve igham ŋgar pida pa iwaghamun Rumai Tiina paam. Eemoghon yes Yuda tiparab ariana le tilib pani. Muri ghoru, tigharaat mulin Rumai Tiina. Sawa tonenen, yes timbool pa ŋgoreeŋ to oliv. Rismoghon to inepneep. Eemoghon Maaron igham mbep gharatooŋa, ve ŋgoreeŋ todi rismoghon tonowen igham lam todi ighan irau mboŋ liim ve tol. Tovenen lupuuŋ tonene, iza ite nene: ‘Lupuuŋ to ghazooŋa.’ b 10:25-26 Yo 5:36, 8:47, 14:11; 1Yo 4:6 c 10:28 Yo 6:39; Ro 8:38+; 2Tes 3:3

²⁹Pasa, Tamaŋ to ighur di tinim leg ne, tapiri ilib pa mbeb tisob. Tovenen tamtoghon eta irau isad di ila ye nima ne maau. ³⁰You ve Tamaŋ, yeru ee moghon.”^d

³¹Yes Yuda tilooŋ saveeŋ toni tonene, ve timundig tigham yaam, ve tighaze tirabi imaat pataghaaŋ.^e

³²Tovenen Yesu ighason di ighaze: “You naghama uraat popoia naol ila matamim itaghon ŋgar to Tamaŋ. Sa uraat isosor, to aghaze arab ghou pa yaam?”

³³Yes tipamuul aliŋa tighaze: “Yei nighaze nirab ghom umaat pa uraat popoia to ugham di ne maau. Nighaze nirab ghom umaat pasa, yom tamtoghon sorok to taan. Eemoghon upakur taum ughaze yamru Maaron raratemim. Tovenen yom uveleg Maaron ve uwaghamun iza.”^f

³⁴⁻³⁵Yesu isaav padi muul ighaze: “Yam awatag maau? Saveeŋ waaro eez to ineeŋ ila tutuuŋ tiam isaav tovene: Maaron isaav pa daba pida ighaze: ‘You nasaav payam: yam ndimaronŋa.’ Daba tonowen, yes tamtoghon to taan. Eemoghon Maaron aliŋa to iŋarua di, nene iwaat di ighaze yes ndimaronŋa. Ve iit tawatag: Maaron aliŋa to timbooda wa, nene irau toraaŋi maau. Ineeŋ tovene.”^g

³⁶Eemoghon you, Tamaŋ Maaron ighur ghou pa naghama uraat patabuaŋ tonene, ve imbaaŋ ghou nazi nanim taan. Tovenen ighaze nawaat taug naghaze you Maaron Natu, pughu vena to aghaze you naveleg Maaron ve nawaghamun iza? ³⁷Ighaze you naghama Tamaŋ uraat toni maau, yam aghur inim tiou malep. ³⁸Eemoghon ighaze naghamaŋgham uraat toni, yam irau aghur inim tiou. Tovenen ighaze saveeŋ tiou ighamaŋgham aghur ila maau, aghita uraat to naghamaŋgham di ne, ve aghur ila. Leso ŋgar tiam ivot, ve aghilaal aghaze: You naneep ila to Tamaŋ, ve Tamaŋ ineeŋ inim tiou.”^h

³⁹Yes Yuda tilooŋ saveeŋ toni tonene, ve titoova pa tikisi muul. Eemoghon ye ighau padi ila.

⁴⁰Ilaagh ila imbut ya Yordan, ve ila ivot muul ndug to muuŋ Yoan ineeŋ pani ve irurughuuz tamtoghon. Yesu inepneep tonowe, ⁴¹ve ival tiina tila tivot toni, ve tiwasavon di tighaze: “Yoan ighama mbeb gharatoonŋa eta maau. Eemoghon saveeŋ isob to ye isavia pa ŋgeu tonene, nene onoon moghon.” ⁴²Tovenen tamtoghon katindi to tinepneep tonowe, tighur ila toni.

Mateeŋ to Lasarus

11 ¹⁻²I]geu eez to ineeŋ izi ndug Betania, moroghoonŋ tiina ighami. Iza Lasarus. Ndilivu ru tinepneep izi ndug tonowen paam. Eez iza

d 10:30 Yo 1:1, 17:11,21+ e 10:31 Yo 8:59 f 10:33 Wkp 24:16; Mt 26:65; Yo 5:18
g 10:34-35 Mbo 82:6; Mt 5:18 h 10:38 Yo 14:10+, 17:21

Marta, ve ite iza Maria. Maria tonene, tauto muun ilin ngoreen vuzi poia iza ila Yesu aghe, ve imusi pa daba raua.ⁱ

³Sawa to Lasarus imoroon, ndilivu ru tonowen timbaan ila pa Yesu tighaze: “Tiina, livumai Lasarus to yom ineeq toni kat, ye imoroon le isami kat.”

⁴Yesu iloon paesin tonene, ve isaav ighaze: “Moroghoon tonowen ivot pa igham Lasarus imaat ne maau. Pale inim ataam pa Maaron ipatoon tapiri ve poia toni. Leso tamtoghon tipait iza ve tipait Natu iza paam.”^j

⁵Yesu lolo pa Marta yesuru taziliva Maria ve livudi Lasarus kat. ⁶Eemoghon sawa to iloon tighaze Lasarus imoroon, ye rikia imundig ipul ndug to inepneep pani ne maau. Inepneep tonowe le mboj ru paam. ⁷Ghoro isaav pa taghoniina toni ighaze: “Yo, tamundig ve tamuul tala pa Yudea.”

⁸Taghoniina toni tiloon saveen tonene, ve tisaav pani tighaze: “Wai, Patonjaan, ngaramus yes Yuda to ndug tonowen tighaze tirab ghom pa yaam ve umaat. Pughu vena to aazne ughaze umuul ula tonowe?”^k

⁹Yesu isaav padi ighaze: “Vena, tamtoghon eta irau ipasul sawa to ndag ila inim tuku? Maau. Ghagharaar ila le rabrab izi, nene ndag dodoli to tagham uraat.^l Ighaze tamtoghon eta ilaagh pa ndag, nene irau itut aghe ve itap ne maau. Pasa, ye ighita ghazooja to taan.”^m

¹⁰Eemoghon ighaze tamtoghon eta ilaagh ila ndoroom lolo, nene pale itut aghe ve itap. Pasa, ghazooja ineeq toni maau.”ⁿ

¹¹Yesu isaav tovene, ve iseen aliqa ighaze: “Itaad Lasarus igheen wa. Tovenen you irau nala, lesu navaaja imundig muul.” ¹²Taghoniina toni tisaav pani tighaze: “Tiina, ighaze Lasarus igheen pooi, ye avaat mata pakia wa.”

¹³Yesu iwataq: Lasarus imaat wa. Eemoghon isavia saveen palelaan, tauto taghoniina toni tikankan pa saveen toni pughu, ve tighaze pa Lasarus igheen moghon. ¹⁴⁻¹⁵Tovenen Yesu isaav ghazooja padi ighaze: “Lazarus ineeq maau. Imaat wa. Onoon, you naneep tomani maau, ve imaat. Eemoghon lolog poia. Pasa, mbep to pale ivot, nene pale iuul gham, ve ipariaan ghurla tiam. Yo, amundig ve tala taghita.”

¹⁶Tomas, to iza ite Didimus, ye isaav pa ndita ighaze: “Tambaqa. Amundig ve itija tala. Leso iit tasob tamaat raraate toman tiina toit.”

**Yesu inim pughu pa mundigiin to yes mateeja,
ve nepoon to taneep mataad iyaryaar**

¹⁷Yesu toman taghoniina toni tilaagh tila tigharau ndug Betania, ve tiloon tighaze Lasarus paatu ineeq ila naal lolo irau mboj paan wa.

i 11:1-2 Lu 10:38+ **j 11:4** Yo 9:3 **k 11:8** Yo 8:59, 10:31 **l 11:9** Yesu saveen toni, pughu tovene: Ye imatughez pa koia to tighaze tirabi imaat ne maau. Pasa, ye iwataq: Sawa to Maaron ighuri pani pa igham uraat izi taan, tamtoghon eta irau ipasula maau. Tovenen koia irau tigham mbep eta pani rikia maau. Ye pale ineeq, ve ipasob uraat toni le isob kat. Ve sawa to ndoroom ighaze ivot, ghoro koia tirabi imaat. **m 11:9** Yo 9:4+
n 11:10 Yo 12:35

¹⁸Ndug Betania, nene ineep igharau ndug tiina Yerusalem, irau kilomita tol ma venen. ¹⁹Tovenen yes Yuda katindi tinim tineep toman Marta ve Maria pa moŋiŋ todi leso tirab atedi.

²⁰Sawa to Marta ilooŋ tighaze Yesu inim igharau ndug Betania, ye imundig ila ighaze ighita. Eemoghon Maria, ye ineep izi ruum. ²¹Marta ila ivot to Yesu, ve isaav pani ighaze: “O Tiina, inimale yom uneep sualen, tone livug imaat maau. ²²Eemoghon you nawatag: Aazne, sa mbep to ighaze yom ughason Maaron pani, ye pale ilooŋ ghom ve igham payom.”

²³Yesu isaav pani ighaze: “Livum pale imundig muul.”

²⁴Marta ipamuul aliŋa ighaze: “You nawatag. Sawa to Mboŋ Muri, Maaron ighaze ipamundigin yes mateeŋa, nene pale livug imundig paam.”^o

²⁵Yesu isaav pani muul ighaze: “Ulooŋ. You taug to nanim pughu pa mundigiŋ to yes mateeŋa ve nepooŋ to tamtoghon tineep matadi iyaryaar. Ighaze tamtoghon eta ighur inim tiou ve imaat, nene mateeŋ irau ikisi maau. Ye pale imundig muul, ve ineep mata iyaryaar le alok.^p

²⁶Tamtoghon tisob to tighur inim tiou ve tigham nepooŋ poia ila to Maaron, yes irau timaat ve tilaledi ne maau. Pale tineep matadi iyaryaar le alok. Yom ughur ila saveeŋ tiou tonene, ma maau?”

²⁷Marta ipamuul aliŋa ighaze: “Vee. Tiina, you naghur ila kat naghaze yom Mesia. Yom Maaron Natu. Ye imbaaŋ ghom tauto uzi unum taan.”^q

Yesu itaŋ pa Lasarus

²⁸Marta yesuru Yesu tisavsav le isob, ghoru Marta imuul ila ruum, ve ikamuun pa taziliva Maria ighaze: “Ulooŋ. Patooŋaŋ toit inim ivot wa. Ve ye ighaze yom ula ughita.” ²⁹Maria ilooŋ saveeŋ tonene, ve rikia moghon imundig ila ighaze ighita Yesu. ³⁰Sawa tonenen, Yesu inim peria paanu sone. Inepneep izi paanu dige to papazogi Marta ila ivot toni ne. ³¹Yuda pida yesŋa Maria tinepneep ila ruum lolo pa tirab ate. Tighita Maria imundig, ipul ruum ve ila, ve tighaze pa ye ila pa naal to Lasarus, leso itaŋ pani. Tovenen titaghoni tila.

³²Maria ila ivot to Yesu, ve iput aghe izi Yesu aghe pughu, ve isaav pani ighaze: “O Tiina, inimale yom unepneep sualen, tone livug irau imaat maau.” ³³Yesu ighita Maria yesŋa Yuda pida to tinim tomani titaŋtaŋ, le lolo ipataŋan kat. ³⁴Ye ighason di ighaze: “Yam aghur Lasarus paatu izi sine?”

Yes tipamuul aliŋa tighaze: “Tiina, unum tala ve ughita.”

³⁵Ghoru Yesu itaŋ.

o 11:24 Dan 12:2; Yo 5:28+ **p** 11:25 Yo 1:4+; 1Kor 15:51+; 1Tes 4:16+
q 11:27 Mt 16:16; Yo 6:69

³⁶Tovenen Yuda pida to yesja tiyondyood, tisaav tighaze: “Aghita. Ye avaat lolo pa Lasarus kat.”

³⁷Eemoghon tamtoghon todi pida tiwasavon di tighaze: “Ŋgeu tonene igharaat ŋgeu eez to mata pisi. Pughu vena to iuul Lasarus maau? Inimale iuuli, tone Lasarus irau imaat maau.”

Yesu ipamundigin Lasarus pa mateej

³⁸Yesu lolo ipatanjan kat pa mateej to Lasarus. Tovenen ilaagh ŋarua yaam saambu to Lasarus paatu ineepp pani. Saambu tonowen, tigharaata inim naal, ve tigham yaam tiina eez, ve tipoon avo wa. ³⁹Yesu ila ivot naal avo, ve isaav padi ighaze: “Apatambulin yaam ighau pa naal avo.”

Mateej tonowen livu Marta isaav pa Yesu ighaze: “Wai Tiina, ugham vene malep. Ye i nighuri ighen tonowe mboŋji paan wa. Takaaka, pale vuzi.”

⁴⁰Yesu isaav pani ighaze: “Marta, matam iŋgal saveej tiou, ma maau? You nasaav payom wa. Ighaze ughur ila, nene pale ughita Maaron ipatoon tapiri ve poia toni ivot ighazoon.” ⁴¹Tovenen tipatambulin yaam tiina ighau pa naal avo, ve Yesu mata izala pa sambam, ve isaav ighaze: “O Tamaŋ, you lolog poia payom pasa, suŋuun tiou, yom ulooŋa wa.

⁴²You nawatag: Sawa isob, yom ulonŋoon suŋuun tiou. Eemoghon you naghama ŋgar pa ival tiina to yeiŋa niyondyood ne, naghaze le yes tighur ila tighaze: Yom taum umbaan ghou to nanim. Tauto nasavia saveej tonene.”

⁴³Ye isavia saveej tonene le isob, ghoru imboob aliŋa tiina ighaze: “Lasarus, uvot unum!”^r

⁴⁴Rikia moghon Lasarus imundig, ve ivot. Eemoghon uli pida pida to tikaukai pani, tinepneep ila tini sone. Tovenen ye ivot ila pumuri, ghoru Yesu isaav padi ighaze: “Apool uli pida pida tonowen tighau pa nagho, nima, ve aghe. Leso ilaagh pooi.”

Daba to yes Yuda tikaal ataam pa tirab Yesu imaat

(Mt 26:1-5; Mk 14:1-2; Lu 22:1-2)

⁴⁵Yes Yuda to tinim tineep toman Maria, tighita mbep gharatoonja to Yesu ighami, le katindi tighur ila toni. ⁴⁶Eemoghon tamtoghon todi pida tila to ndiran tutuunja, ve tipaesia mbep tonenen varu padi. ⁴⁷Tovenen daba to watoonjrau ve ndiran tutuunja tila tilup di toman pooza pida to yes Yuda, ve tiwasavon di tighaze: “Ŋgeu tonowen ighamgham mbep gharatoonjadi katindi to tipatoonja tighaze Maaron ineepp tomani pa uraat toni. Pale tagham vena? ⁴⁸Ighaze tapuli ve ighamgham tovene, nene pale tamtoghon tisob tighur ila toni ve titaghoni. Ghoru yes Roma tinim, ve

r 11:43 Lu 7:14; Yo 5:25

tireu mbirisan Rumai Tiina toit, ve tiwarewon ghiit paam, le irau tauud tanjin ndug toit muul maau.”

⁴⁹Tilup di ve tinepneep, ve tamtoohon todi eez, iza Kaiapas, ye daba to watoonrau pa ndaman tonenen, imundig ve isaav padi ighaze: “Yam tonene, lemim ngar maau! ⁵⁰Agham vena to awaghamgham tovene? Yam aghilaal maau? Poia pa ngeu ee moghon igham ival tiina inadi, ve imaat padi. Pa vene, iit Yuda tasob tamatmaat.” ⁵¹Saveen tonene, Kaiapas isavia sorok itaghon tau ngar toni maau. Maaron igham pooz pani, tauto isavia. Pasa, ndaman tonenen, Kaiapas, ye daba to watoonrau. Tauto ivotia Maaron aliņa padi, ve ighaze Yesu pale igham yes Yuda inadi ve imaat padi. ⁵²Eemoghon Yesu imaat pa yes Yuda moghon maau. Ye imaat pa Maaron ndinatu tisob to tineep irau ndug ndug. Leso ilup di tinim lupuuņ ee moghon.^s

⁵³Tovenen sawa tonenen ve ila, daba to yes Yuda tikalkaal ataam pa tirab Yesu imaat. ⁵⁴Tauto ye ilaagh ghazooņa ila yes Yuda matadi muul maau. Ye ipul di, ve ila pa ndug Epraim to ineeep ndug balim dige, ve yesņa taghoniņa toni tinepneep izi tonowe.

⁵⁵Tinepneep le sawa to lupuuņ tiina to yes Yuda to tiwaata tighaze Pasova, nene inim igharau. Tovenen ival tiina to ndug ndug tizazala pa Yerusalem. Tighaze tigharaat taudi ve tinjalaan ila Maaron mata le isob, ghoru lupuuņ tiina tonowen ivot. ⁵⁶Tamtoghon tinepneep ila sirsiiir to Rumai Tiina lolo, ve matadi inesnes pa Yesu, ve tiwasavon di tighaze: “Ou, agham ngar vena? Ngeu tonowen pale inim pa lupuuņ tiina tonene, ma maau?” ⁵⁷Sawa tonenen, yes daba to watoonrau toman ndiran tutuuņa tisaav ariaņa pa ival tiina tovene: Ighaze tamtoohon eta iwataņ ndug to Yesu ineeep pani, ye irau rikia moghon ve ipaes padi. Leso tila tikisi.

Maria ilij ngoreen vuzi poia izala Yesu aghe

(Mt 26:6-13; Mk 14:3-9)

12 ¹Mboņi liim ve eez inepneep sone, ghoru uraat to Pasova ivot. Sawa tonenen, Yesu ila ivot Lazarus ndug toni Betania. Lasarus, ye ngeu to imaat ve Yesu ipamundigini pa mateen.^t

²Yesu toman taghoniņa toni tinepneep tonowe, ve ndita pida to ndug tonowen tigham ghanghaniņ pani. Marta igham uraat pa gharatooņ adi aniiņ, ve Lasarus ineeep toman di pa ghanghaniņ tonenen paam.

³Tovenen yes tighanghan, ve Maria igham ngoreen to vuzi poia ve atia tiina kat inim, ve iliņi izala Yesu aghe. Ghoru imusi pa daba raua. Njgoreen tonowen vuzi ivot le ikau ruum lolo.^u

s 11:52 Yo 10:16, 17:20+; 1Yo 2:2 **t 12:1** Yo 11:1+ **u 12:3** Maria ilij ngoreen tiina irau kilogram alulu. Tigharaat ngoreen tonowen pa mbeb eez to atia tiina kat, iza nard.

⁴Yudas Iskariot, ye taghoniija to Yesu to muri ighuri ila koia nimadi. Ye ighita mbep tonenen, ve isaav ighaze: ⁵“Wai, liva ne, iwaghamun ngoreen tonene sorok pasa! Inimale tagholia, tone tagham yaam tiina pani, irau 300 denari ma venen. Leso tagham pa yes mbolaanja.” ⁶Saveen tonene, ye mata ingal yes mbolaanja, ve isavia maau. Isaav sorok. Pasa, ye ngeu yubyub. Ye ingin lugluug todi, ve sawa pida nima serekserokia pa yaam todi pida.

⁷Yudas isaav tovene, ve Yesu isaav pani ighaze: “Uyou avom pani pasa? Upuli. Ye ikis ngoreen tonene pa gharatoon ghou pa sawa to namaat ve titavia ghou. ⁸Yes mbolaanja pale yamja anepneep irau sawa isob. Ve you irau itija tanepneep moghon maau.”

Yes daba to watoonrau timbua saveen tighaze tirab Lasarus imaat paam

⁹Ival tiina tiloon tighaze Yesu inepneep izi ndug Betania, ve tikeet tila tighaze tighita. Ve tighaze tighita Lasarus paam. Pasa, tiloon varu tighaze ye imaat ve Yesu ipamundigini pa mateen. ¹⁰Tovenen yes daba to watoonrau tilup di, ve timbua saveen tighaze tirab Lasarus imaat paam. ¹¹Pasa, Yuda katindi to tiloon Lasarus varu, tipul daba todi tonowen, ve tighur ila to Yesu.^v

Yesu izala pa Yerusalem

(Mt 21:1-11; Mk 11:1-11; Lu 19:28-40)

¹²Mboen ndugizau, ghoru ival tiina to tila tineep izi Yerusalem pa lupuun tiina to Pasova, tiloon Yesu varu tighaze ye ighaze izala pa Yerusalem. ¹³Tovenen tigham mbep inimale napatolo raua, ve tivot tila tighaze tighita. Sawa to tighita, tipamundigin bobaaen, ve tipait iza tighaze:

“Hosana!^w

Tapakur Maaron toit!

Poia to Maaron pale iza to ngeu tonene. Pasa, ye inim pa I]geu Tiina iza, ve ye kinik to iit Israela!”^x

¹⁴Yesu igham esele paghu eez ve mbole izala, ve ilaghova itaghon Maaron aliija waaro eez to timbooda. Isaav tovene:

¹⁵“Yam tamtothon to ndug Zion,^y

amatughez malep.

Aghita kinik tiam to ilat!

v 12:11 Yo 11:45 w 12:13 ‘Hosana,’ nene saveen waaro eez to yes Israela. Pughu tovene: ‘ugham mulini’ o ‘uul.’ Ighaze tipakur ngeu eta to iza tiina, nene titem pa saveen tonene tighaze: “Hosana, hosana!” x 12:13 Mbo 118:25+ y 12:15 Zion (o Sion, o Zaion), nene Yerusalem iza ite. Zion, nene ndug mbutja eez to Yerusalem to tirei Rumai Tiina to Maaron izala.

Ye ineeq izala esele paghu eez, ve ilat.”^z

¹⁶Sawa to mbef tonenen ivot, taghoniija to Yesu tighilaal pughu maau. Eemoghon muri, sawa to ye imaat ve imundig muul, ve iza tiina ivot ighazooŋ, ghoru matadi iŋgal mbef tonenen, ve tighilaal tighaze saveeŋ waaro tonenen, timbooda iza to Yesu.

¹⁷⁻¹⁸Pughu to ival tiina tikeet tila tighita Yesu, nene vene: Sawa to ye ipoi Lasarus, ve imundig pa mateeŋ ve ilaagh ivot pa naal, ival tiina tineep ve tighita mbef gharatooŋa tonenen. Tovenen muri, tila ve tipaesia mbef tonenen varu pa tamtoghon ve tipariaaŋ Yesu saveeŋ toni tighaze mbef tonenen ipatooŋa ighaze Maaron ineeq tomani pa uraat toni. ¹⁹Ndiran tutuuŋa pida tighita ival tiina tonowen yesŋa Yesu tilaghaagh ve tipapait iza, tauto tiwasavon di tighaze: “Aghita! Iit taraua maau. Tamtoghon to taan tisob tila titaghoni wa!”

Grika pida tighaze tighita Yesu

²⁰Yes to tizala Yerusalem ve tighaze tisuuŋ pa Maaron ila lupuuŋ tiina to Pasova, Grika pida tineep ila lolodi paam.^a

²¹Yes tila to Pilip, ye ŋgeu to ndug Betsaida to ineeq Galilaia, ve tisaav pani tighaze: “Olman, yei nighaze le nighita Yesu.” ²²Tovenen Pilip ila ipaesia aliŋadi pa Andreas, ghoru yesuru tila tipaes pa Yesu.

²³Yesu isaav padi ighaze: “Sawa to Tamtoghon Natu ipatooŋ iza tiina toman tapiri ve poia toni ivot ighazooŋ, tauto ivot wa.”^b

²⁴Onoon kat, you nasaav payam: Ighaze wit uve izila taan lolo maau, nene irau wit paghu eta ivot maau. Nene pale uuv tonenen moghon ineeq. Eemoghon ighaze uuv tonenen izila taan lolo, ve uli imbuuz ve ilale, nene pale matasupu toni iza, ve ighur anoŋa katindi.^{c d}

²⁵Ighaze tamtoghon eta lolo pa ghamuuŋ nepooŋ poia to taan moghon, nene pale tau ilale. Ve ighaze tamtoghon eta ighur muri pa taan nepooŋa, ye pale igham nepooŋ poia ila to Maaron itaghoni taghoni gha ila.^e

z 12:15 Is 62:11; Sek 9:9 **a 12:20** Grika to saveeŋ waaro tonene isavia di, yes tighur ila to Maaron, ve titaghon tutuuŋ pida to yes Yuda, ve tilulup toman di pa suŋuuŋ. Eemoghon tizir di maau. Tovenen yes tinim Yuda kat maau. **b 12:23** Yo 1:14, 13:31+, 17:1 **c 12:24** Yoaan imbood saveeŋ tovene: “Wit uve irau itap, ve izila taan lolo ve imaat, ghoru matasupu toni ivot, ve ighur anoŋa katindi. Ighaze maau, nene pale uuv tonenen moghon ineeq.” Eemoghon iit tawatag: Sawa to tavazog wit uve izila taan lolo, uve dodoli imaat maau. Uli moghon to imbuuz ve ilale. Ve anoŋa, tauto wit matasupu ivot pani. Yesu ighita ighaze mateeŋ toni, nene inimale wit uli to imbuuz ve ilale, ve wit paghu ivot. Pasa, ye pale imaat ve tighuri ila taan lolo. Eemoghon mateeŋ toni pale inim ataam pa Maaron igham mbef paghu ivot. Ve iit Kristen tovene paam. Iit irau tarei tauud pa Krisi ve uraat toni, ghoru ghurla toit ighur anoŋa popoia ivot. **d 12:24** 1Kor 15:36
e 12:25 Mt 10:39, 16:25

²⁶Ighaze tamtoghon eta imbees payou, ye irau itaghon ghou. Tamtoghon tovene, pale ineep toman ghou izi ndug to you pale nala naneep pani. Ve tamtoghon to ighaze imbesmbees payou, nene pale Tamaņ ipakuri.”^f

Yesu isavia mateeņ toni

²⁷Yesu isaav muul ighaze: “Aazne, lolog ipataņan kat ve naghām ngar naol. Pasa, sawa tiou to mateeņ inim igharau wa. Pale nasaav vena? Pale nasaav naghaze: ‘Tamaņ, upasalin ghou pa patañani tiina to ighaze ivot payou ne?’ Maau, irau nasaav tovene maau. Pasa, pughu tonene to you nazi nanim taan.”^g

²⁸O Tamaņ, mbep to pale ivot payou ne, you naghaze inim ataam pa upatooņ tapirim ve poia tiom ivot ighazooņ pa tamtoghon. Leso tipait izam.”

Yesu isavia saveeņ tonene, ghorō saveeņ sambam ve izi inim ighaze: “You napatooņ tapirig toman poia tiou pa tamtoghon wa. Ve you pale napatooņa padi muul. Leso tighilaal ghou tighaze you izag tiina.”^h

²⁹Ival tiina to yesņa Yesu tinepneep ne, tilooņ saveeņ tonene, ve pida tighaze pa lalaav avolutu. Ve pida tighaze: “Maau. Aņela eta avaat isavsavv pani.”

³⁰Eemoghon Yesu isaav padi ighaze: “Saveeņ to itaņ izi inim, nene pa iuul ghou maau. Nene pa iuul gham.”ⁱ

³¹Aazne, taza pa sawa to Maaron ipatooņ sosor to tamtoghon to taan ivot ighazooņ, ve ighur atia padi, ve indir daba to iņgin taan ne ighau.”^j

³²Aazne, you naneep izi taan. Eemoghon muri, sawa to tiit ghou naza, nene pale nayou tamtoghon tisob tinim tiou.”^k

³³Yesu isavia saveeņ tonene pa ivotia ataam to pale imaat pani.

³⁴Ival tiina tilooņ saveeņ toni tonene, ve tipamuul aliņa tighaze: “Maaron aliņa to timbooda, saveeņ waaro eez isaav tovene: Mesia pale ineep mata iyaryaar le alok. Ighaze venen, pughu vena to yom ughaze Tamtoghon Natu pale tiiti iza? Tamtoghon Natu to yom usavia, nene sei?”^l

³⁵Yesu isaav padi muul ighaze: “Aazne, ghazooņa to Maaron ineep toman gham. Eemoghon mala maau pale ipul gham. Tovenen sawa to ghazooņa toni inepneep toman gham, alaghlaagh ila ghazooņa tonowen lolo. Leso ndoroom ipoon gham sob. Tamtoghon to ighaze ilaghlaagh ila ndoroom lolo, nene pale ikankaan pa ndug sine to pale ila pani.”^m

³⁶Tovenen sawa to ghazooņa to Maaron inepneep toman gham, aghur ila toni pataghaaņ. Leso anim tamtoghon to ghazooņa.”

f 12:26 Yo 14:3, 17:24; 1Tes 4:17 g 12:27 Mt 26:39+ h 12:28 Mt 3:17

i 12:30 Yo 11:42 j 12:31 Yo 16:11; Kol 2:15; Syg 12:9, 20:2+ k 12:32 Yo 3:14, 8:28;

Ro 5:18 l 12:34 Mbo 89:36+, 110:4; Is 9:6+; Dan 7:14 m 12:35 Yo 8:12, 11:9+; Ep 5:8; 1Yo 1:7

Yesu isavia saveeŋ tonene le isob, ghoru ipul di, ve ila iyooŋ padi.

Yuda katindi tighur ila to Yesu maau

³⁷Onoon, Yesu igham mbeg gharatoonjadi naol ila yes Yuda matadi, lesu ipatoon tau padi, ve tighilaala tighaze Maaron ineep tomani pa uraat toni. Eemoghon tighur ila toni maau.ⁿ

³⁸Ŋgar to tighami, nene itaghon saveeŋ to muuŋ propet Isaia imbooda. Isaav tovene:

“O Maaron, yei nivotia aliŋam padi, ve sei ighur ila?

Ve sawa to upatoon tapirim ivot ighazoon padi, sei to ighilaala? Maau.”^o

³⁹Yes irau tighur ila to Yesu maau. Ve Isaia ipaghazonan ghiit pa pughu. Pasa, saveeŋ waaro ite to ye imbooda, isaav ighaze:

⁴⁰“Maaron tau igham ŋgar todi iyaryaŋ kat ve ipoon matadi.

Tauto matadi irau tighita mbeg to Maaron ighami ne maau, ve ledi ghilaloon ila lolodi maau. Ve lolodi imuul payou maau, ve tiyok pa nagharaat mulin di maau.”^p

⁴¹Isaia isavia saveeŋ tonene pasa, muuŋ ye ighita Yesu tapiri ve poia toni toman uraat tiina to muri pale ighami ne ila tandagiin. Tauto ighilaal Yesu ighaze ye iza tiina.^q

⁴²Onoon, pooza katindi to yes Yuda tighur ila to Yesu. Eemoghon tivotia ghurla todi ivot ighazoon maau. Pasa, timatughez tighaze ndiran tutuuna pale tizurun di pa lupuuŋ todi, ve irau yesŋa tilup di pa suuŋuu muul maau. ⁴³Ndiran tonowen, lolodi pa pakuruuŋ to tamtoghon ilib pa pakuruuŋ to inim pa Maaron.^r

Yesu ipasob saveeŋ toni pa ival tiina

⁴⁴Muri ghoru, Yesu isaav aliŋa tiina ighaze: “Tamtoghon to ighaze ighur inim tiou, nene ighur inim tiou moghon maau. Ye ighur ila to Tamaŋ to imbaaŋ ghou nanim ne paam.”^s

⁴⁵Tamtoghon to ighaze ighita ghou, nene ighita Tamaŋ to imbaaŋ ghou nanim ne paam. ⁴⁶You nazi nanim taan pa nanim ghazoonja pa tamtoghon. Lesu tamtoghon tisob to tighur inim tiou, tineep ila ndoroom lolo muul sob.^t

⁴⁷“Ighaze tamtoghon eta iloon saveeŋ tiou, ve itaghoŋi maau, nene irau naŋgabiiza ve naghur atia pani maau. Pasa, you nazi nanim taan pa naŋgabiiz tamtoghon to taan ve naghur atia padi ne maau. Nanim pa naghama mulin di.”^u

n 12:37 Yo 1:11 **o 12:38** Is 53:1; Ro 10:16 **p 12:40** Is 6:9+; Mt 13:15
q 12:41 Is 6:9+, 52:13–53:12 **r 12:43** Yo 5:44; Ga 1:10 **s 12:44** Mt 10:40
t 12:46 Yo 1:4, 8:12 **u 12:47** Yo 3:17, 4:42; 1Yo 4:14

⁴⁸Ve aloonj! Tamtoghon tisob to tizurun ghou, ve lolodi pa tigham saveenj tiou maau, sawa to Mboŋ Muri, Maaron pale ingabiiz di itaghon saveenj to you nasavia ne, ve ighur atia padi.^v

⁴⁹Pasa, you nasavia saveenj eta itaghon taug ngar tiou maau. You nataghon Tamaŋ to imbaaŋ ghou nanim ne ngar toni. Saveenj to ye tau ighuri payou pa nasavia, tauto nasasavia payam. ⁵⁰Ve you nawatag: Tutuunj toni to ye ighuri inim tiou pa navotia, nene inim ataam pa tamtoghon tigham nepoonj poia ila toni itaghoni taghoni gha ila. Tovenen saveenj to you nasasavia, nene nataghon katin saveenj to Tamaŋ isavia payou.”

Yesu imen taghoniija toni aghedi

13 ¹Sawa to lupuunj tiina to Pasova igharau ighaze ivot. Yesu iwatag: Sawa toni to ipul taan, ve imuul izala pa Tama, nene inim igharau wa. Muunj ve inim, ye ighur lolo kat pa tamtoghon toni to tineep izi taan. Iŋgar tonowen, ye itaghoni ila ila le sawa to mateenj toni, ghoru ipatoonja ivot ighazoonj kat.^w

²Rabrab izi, ve Yesu toman taghoniija toni tilup di pa ghanghaniinj. Yudas to Simon Iskariot natu, Iŋgeu Samia ipazaagh lolo wa, leso ighur Yesu ila koia nimadi. ³Yesu iwatag: Tama Maaron ighur mbep tisob tila nima wa. Ve ye ineej toni, to izi inim, ve pale imuul izala toni.^x

⁴Tovenen Yesu ipul ghaniinj, ve imundig ve iduduum nonogiiija toni to moŋeŋaaŋ izi, ve igham uli eez to musuunj, ve ipoosa ila ngali. ⁵Ghoru ilinj ya izila oon, ve ipamundigin uraat to menuunj taghoniija toni aghedi. Sawa to imenmen aghedi, imus di paam pa uli to ipoosa ila ngali ne.^y

⁶Imenmen aghedi ila ila le ivot to Simon Petrus. Ghoru Simon isaav pani ighaze: “Wai Tiina, yom ughaze umen agheg?”^z

⁷Yesu ipamuul aliŋa ighaze: “Iŋgar to you naghami ne, aazne yom ughilaal pughu maau. Eemoghon muri pale ughazoonj pani.”

⁸Petrus izoora ighaze: “Aazne ve muri paam, yom irau umen agheg maau. Maau le maau kat!”

Yesu isaav pani muul: “Ighaze namen aghem maau, yom tamtoghon tiou maau.”

⁹Simon Petrus isaav pani ighaze: “O Tiina, ighaze venen, ghoru umen agheg moghon malep. Umen nimag ve dabag paam!”

¹⁰Yesu isaav pani ighaze: “Tamtoghon to ighaze iririu wa, ye le pughu eta to iririu muul maau. Pasa, anoŋa isob ingalaan wa. Tovenen ye pale

v 12:48 Lo 18:19; Yo 3:18 w 13:1 1Yo 3:16 x 13:3 Mt 28:18; Yo 3:35; 1Kor 15:27
y 13:5 Mt 20:28; Lu 22:27; Pil 2:7+ z 13:6 Uraat to menuunj tamtoghon aghedi, nene uraat to yes mbesoonja sorok. Iŋgar to Yesu ighami, nene ipatoonj ghiit pa ngar to tatatan tauud izaad, ve tambees pa tamtoghon ve taul di. Ve ipatoonj ghiit ighaze mateenj toni pale ireu sosor to tamtoghon, ve igham di tingalaan ila Maaron mata.

imen aghe moghon. Yam tonene angalaan wa. Eemoghon yam asob maau.”^{a b}

¹¹ Yesu isavia saveen tonene pasa, ngeu to ighaze ighuri ila koia nimadi, ye iwatagi wa. Tauto isaav padi ighaze: “Yam asob angalaan maau.”

¹² Yesu imen taghoniina toni aghedi le isob, ghoru indudi pa nonogiiina toni muul, ve imuul ila pa ina ve mbole izi, ve ighason di ighaze: “Laak, ngar to ngaramus naghham payam ne, awatag pughu, ma maau? ¹³ Yam awatwaat ghou aghaze you patoanjan ve tiina tiam. Saveen tiam tonanan onoon. Ighaze awaat ghou tovene, nene denja.”^c

¹⁴ Aghita. You Tiina ve patoanjan tiam. Eemoghon namen aghemim. Ighaze you naghham tovene, yam paam irau agham ngar raraate moghon pa taumim.”^d

¹⁵ You naghham ngar tonene inim patoanjan payam, lesu aghita ve ataghon ngar raraate inimalu you naghham payam.”^e

¹⁶ You nasaav payam. Onoon kat, mbesoona eta irau ilib pa tiina toni ne maau. Ve mbanjoona eta irau ilib pa ngeu to imbaana ne maau.”^f

¹⁷ Ngar to naghami ne, yam aghazon pa pughu wa. Ighaze ataghoni, nene pale lolomim poia, ve poia to Maaron iza tiam.”^g

¹⁸ “Saveen tonene, you nasavia inarua yam asob maau. Yam to nasia gham anim leg, you nawatag katin gham. Tamtoghon tiam eez, ye lolo ineep toman ghou maau. Pasa, Maaron alina to timbooda, anona pale ivot. Saveen tovene:

‘Itag ite to yeru lupuan tiei ee moghon ve niluplup ghei pa ghanghaniin, tauto inim koia.”^h

¹⁹ Aghita. Mbeb tonene ivot sone, ve aazne you navotia payam pataghaan. Lesu sawa to ivot, yam aghur ila aghaze YOU TO IZAG NANEPNEEP.”^{i j}

²⁰ Onoon kat you nasaav payam: Yes to you nambaan di tila pa uraat ne, ighaze tamtoghon eta igham di toman lolo poia, nene igham ghou. Ve ighaze tamtoghon eta igham ghou, nene igham Tamaan to imbaan ghou nanim ne paam.”^k

a 13:10 Ighaze taghur ila to Krisi, mateen toni ireu sosor toit, ve igham ghiit tangalaan ila Maaron mata, tanimale ngeu to iririu pooi le anona isob ingalaan. Eemoghon, sawa pida, iit Kristen tatap ve tagham sosor. Ighaze tatap, iit irau tavotia sosor toit pa Krisi, ve taghasoni pa ireua pait. Lesu tangalaan ila ye mata muul. Ughita 1Yo 1:8-9. **b 13:10** Yo 15:3; 1Yo 1:8-9 **c 13:13** 1Kor 8:6; Pil 2:11; Kol 2:6 **d 13:14** Lu 22:25+; Ga 5:13; 1Pe 5:5 **e 13:15** Pil 2:5; 1Pe 2:21; 1Yo 2:6 **f 13:16** Mt 10:24+ **g 13:17** Mt 7:24; Yems 1:25 **h 13:18** Mbo 41:9 **i 13:19** Maaron iza Yoova pughu, nene YOU NANEPNEEP. Ughita Maaron Igham Mulin Tamtoghon Toni (o Eksodus) 3:14. Tovenen ngara katindi tighaze Yesu saveen toni pughu, nene vene: “Yam aghur ila aghaze you Yoova.” Ve ngara pida tighaze saveen toni pughu, nene vene: “Yam aghur ila aghaze you Mesia.” **j 13:19** Igham 3:14; Yo 8:58 **k 13:20** Mt 10:40; Lu 10:16

Yesu ivotia ngar to Yudas pale ighami
(Mt 26:20-25; Mk 14:17-21; Lu 22:21-23)

²¹Yesu isavia saveej tonene le isob, ghero lolo ipatanjan kat, ve isaav ghazooŋa ighaze: “Onoon kat, you nasaav payam: Tamtoghon tiam eez pale ighur ghou nala koiagna nimadi.”

²²Taghoniija toni tilooŋ saveej tonene, ve tiwambatutun di. Pasa, tikankaan: Yesu isavia saveej tonene ijarua sei? ²³Sawa tonenen, taghoniija to Yesu lolo pani kat ne, ineej Yesu dige.^l

²⁴Tovenen Simon Petrus lua katia pani ighaze ighason Yesu pa saveej to ye isavia ne. Ijarua sei?

²⁵Tauto taghoniija tonowen indaleel pa Yesu, ve ighasoni ighaze: “Tiina, yom usaav pa sei?”

²⁶Yesu ipamuul aliija ighaze: “You pale napazug mberet tonene ila sur, ve naghama pa tamtoghon toit eez. Ijgeu tonene to you nasavia.” Ghero igham mberet pida, ipazugi ila sur,^m ve igham pa Yudas to Simon Iskariot natu. ²⁷Yudas ipaes mberet tonowen, ghero Sadan izeeva. Tovenen Yesu isaav pani ighaze: “Ijgar to yom ughaze ughami, nene ughami rikia moghon.”

²⁸Yes to tilup di pa ghanghaniij, todi eta ighilaaal pughu to Yesu isavia saveej tonene pa Yudas ne maau. ²⁹Pida tigham ngar tighaze Yesu imbaaŋa pa gholiij mbep pida pa lupuuŋ tiina tonowen, ma imbaaŋa ila pa reiij mbep pida pa yes mbolaŋa. Pasa, Yudas ingin lugluug todi. ³⁰Tovenen Yudas igham mberet suruvu tonenen, ve rikia moghon imundig, ve ivot ila pumuri. Sawa tonenen, ndoroom izi wa.

Tutuuj paghu to Krisi

³¹⁻³²Yudas ipul di, ve ivot ila pumuri, ghero Yesu isaav padi ighaze: “Sawa to Tamtoghon Natu ipatoonj iza tiina toman tapiri ve poia toni ivot ighazooŋ, tauto ivot wa. Ve mbep to pale ivot pani, nene pale ipaghazoŋan Tama Maaron iza tiina toman tapiri ve poia toni paam. Leso tamtoghon tipait Tama Maaron iza. Ve Tama Maaron tovene paam. Pale ipaghazoŋan Natu iza tiina toman tapiri ve poia toni. Leso tamtoghon tipait Natu iza. Mala maau pale mbep tonene ivot.ⁿ

³³“Aa ndipain tiou, you pale naneep toman gham ris moghon, ghero aghita ghou muul maau. Pale napul gham, ve akaal naghog. Tovenen saveej to muuj nasavia pa yes Yuda, tauto aazne nasavia payam paam. Saveej tovene: ‘Ndug to you naghaze nala pani, nene yam irau ala

l 13:23 Yo 19:26, 20:2, 21:7 m 13:26 Sawa to yes Yuda tighan aniij to Pasova, tigharaat sur pa vaen suru, toman vaen anoŋa, ai fik ve ai det anoŋadi, ve mbep papaidi pida. Leso tipazug mberet todi izila. n 13:31-32 Yo 12:23, 17:5; 2Kor 4:6

pani maau.’³⁴ Alooŋ. Aazne, you nasavia tutuŋ paghu payam tovene: Lolomim pa taumim ve agham poian gham. Lolomim pa taumim kat, inimale you lolog payam kat.^o

³⁵ Ighaze lolomim pa taumim kat, nene pale tamtoŋhon tighilaal gham tighaze yam taghoniija tiou.”

Yesu isaav ighaze Petrus pale ipesamuni
(*Mt 26:31-35; Mk 14:27-31; Lu 22:31-34*)

³⁶ Yesu isavia saveeŋ tonene le isob, ghero Petrus ighasoni ighaze: “Tiina, ndug sine to yom ughaze ula pani?”

Yesu ipamuul aliŋa ighaze: “Ndug to you pale nala pani, yom irau utaghon ghou unum to aazne ne maau. Eemoghon muri, yom pale utaghon ghou unum.”^p

³⁷ Tovenen Petrus ighasoni muul ighaze: “Tiina, pughu vena to yom ughaze you irau nataghon ghom to aazne maau? You irau napul taug namaat payom.”

³⁸ Yesu isaav pani muul ighaze: “Aliŋam tonanan, pale onoon wa? Yom irau upul taum umaat payou? You nasaav payom: Onoon kat, mboŋ aazne, yom pale upesamun izag pae tol le isob, ghero tatareek itaŋ.”

Yesu pale ila igharaat ndug to nepooŋ pa tamtoŋhon toni

14 ¹ Yesu isaav pa taghoniija toni ighaze: “Lolomim ipataŋan ve agham ŋgar naol malep. Aghur ila to Maaron, ve aghur inim tiou paam.^q

²⁻³ Tamaŋ ruum toni, le sosoor katindi to nepooŋ. Inimale le sosoor katindi maau, tone irau nasaav payam tovene maau. You pale namuŋ nala, ve nagharaat lemim inamim to nepooŋ izi tonowe. Ighaze nagharaata le isob, nene pale namuul nanim, ve naghham gham anim tiou. Leso aneep toman ghou izi ndug to you naneep pani.^r

⁴ Ataam to ndug to you naghaze nala pani, yam awatagi wa.”

Yesu inim ataam pait pa tala to Tama Maaron

⁵ Tomas ilooŋ saveeŋ tonene, ve isaav pa Yesu ighaze: “Tiina, ndug to yom ughaze ula pani ne, yei nikankaan pani. Pale niwatag ataam to nila pa ndug tonanan vena?”

⁶ Yesu ipamuul aliŋa ighaze: “You taug to ataam. You napatoŋ katin gham pa Maaron ve saveeŋ toni onoon, ve nanim pughu pa nepooŋ to

o 13:34 Mk 12:31; Yo 15:12+; 1Pe 1:22; 1Yo 2:3, 3:11 **p 13:36** Yo 21:18+; 2Pe 1:14
q 14:1 Mbo 42:5; Mt 6:25; Pil 4:6+; 1Pe 5:7 **r 14:2-3** Yo 17:24; 2Kor 5:1+; Hib 11:16; 1Tes 4:16+

mataad iyaryaar. Ataam ee moghon to tamtoghon titaghoni ve tila to Tamañ, nene you. Ite paam maau.^s

⁷Ighaze awatag katin ghou, nene pale awatag Tamañ paam. Aazne ve ila, yam awatagi. Pasa, aghita wa.”^t

⁸Tovenen Pilip isaav pani ighaze: “Tiina, upatoon Tamam payei, ghoron nighazoon pani ve atemai izi.”

⁹Yesu isaav pani ighaze: “Wai Pilip, itinja takaria nepoon wa! Ve yom ughilaal ghou sone? Tamtoghon to ighaze ighita ghou, nene ighita Tamañ. Pughu vena to ughason ghou ughaze napatoon Tamañ payam?”^u

¹⁰Yom ughur ila sone? You naneep ila to Tamañ, ve ye ineeep inim tiou. Saveeñ to you nasavia payam ne, nasavia itaghon taug ngar tiou maau. Tamañ to ineeep inim tiou, tauto ighamgham uraat toni ila nimag.^v

¹¹You naneep ila to Tamañ, ve ye ineeep inim tiou. Saveeñ tonene, yam irau aghur ila. Ve ighaze aghur ila maau, ghoron agham ngar pa uraat tintina to you naghama di tivot wa. Leso ipalot gham, ve aghur inim tiou.”^w

¹²“Onoon kat, you nasaav payam: Ighaze tamtoghon eta ighur inim tiou, ye pale igham uraat tintina tinimale uraat to you naghama di. Ve ye pale igham uraat tintina pida paam le tilib pa uraat tiou. Pasa, you pale napul taan, ve namuul nala to Tamañ.”^x

¹³Sa mbep to ighaze yam aghason Tamañ Maaron pani ila you izag, nene pale you naghama ivot. Leso napaghazoon Tamañ iza tiina toman tapiri ve poia toni.^y

¹⁴Tovenen sa mbep to ighaze yam aghason pani ila you izag, nene pale you naghama.

Yesu pale imbaañ Avuvu Patabuañ izi inim

¹⁵“Ighaze lolomim payou, nene pale matamim kisin tutuun tiou, ve ataghon di.”^z

¹⁶Ve you pale naghason Tamañ pa imbaañ Palotiinja ite paam izilat tiam. Leso ineeep toman gham irau sawa isob, ve ipalot gham. ¹⁷Palotiinja tonowen, nene Maaron Avuvu. Ye pale ipaghazoon gham pa saveeñ onoon to Maaron. Pasa, ye isasavia saveeñ onoon. Tamtoghon to titaghon taan ngara, yes irau tighami maau. Pasa, tighita maau, ve tiwatagi maau. Eemoghon yam, ghoron awatagi. Pasa, ye ineeep toman gham. Ve muri, ye pale ineeep tunja ila lolomim.”^a

¹⁸“You irau napul gham aneeep sorok animale yes paroonja ne maau. You pale namuul nanim tiam.”^b

s 14:6 Yo 10:9, 11:25; Ep 2:18; Hib 10:19+ t 14:7 Yo 8:19 u 14:9 Yo 12:45;
Kol 1:15; Hib 1:3 v 14:10 Yo 7:16+ w 14:11 Yo 5:36, 10:38 x 14:12 Mk 16:16+;
Mbañ 2:43, 5:12 y 14:13 Mt 7:7; Yo 15:7; 1Yo 3:22, 5:14 z 14:15 Yo 15:10+; 1Yo 2:3+
a 14:17 Yo 15:26, 16:7,13+; Mbañ 2:4; 1Kor 2:14 b 14:18 Mt 28:20; Mbañ 2:4

¹⁹Yes to titaghon taan ngara, mala maau pale tighita ghou muul maau. Eemoghon yam ghoru aghita ghou. Pasa, you pale namundig muul ve naneeep matag iyaryaar. Tovenen yam paam pale agham nepooŋ poia inim tiou, ve aneeep matamim iyaryaar. ²⁰Sawa tonenen, yam pale aghilaal aghaze you naneeep ila to Tamaŋ, ve yam aneeep inim tiou, ve you naneeep ilat tiam. Iit tasob talup ghiit tanim ee moghon.^c

²¹Tamtoghon to ighaze mata kisin tutuunŋ tiou ve itaghon di, nene ye to lolo ineeep. Tamtoghon tovene, nene pale Tamaŋ lolo ineeep toni, ve you paam lolog ineeep toni ve napatoonŋ taug pani.^d

²²Yesu isaav tovene, ve Yudas ite (ye Yudas Iskariot maau) ighasoni ighaze: “Tiina, vena to yom ughaze upatoonŋ taum pa yei moghon, ve ival tiina to taan maau?”

²³Yesu ipamuul ghasoniinŋ toni tovene: “Ighaze tamtoghon eta lolo payou kat, nene pale mata kisin saveeŋ tiou ve itaghoni. Tamtoghon tovene, Tamaŋ pale lolo pani kat, ve yeru Tamaŋ nila toni, ve nighami inim inamai to nepooŋ.^e

²⁴Eemoghon tamtoghon to ighaze lolo ineeep tiou maau, nene pale lolo imaagh pa saveeŋ tiou, ve itaghoni maau. Saveeŋ to yam alonŋloona, nene taug saveeŋ tiou maau. Nene Tamaŋ to imbaaŋ ghou nanim ne saveeŋ toni.

²⁵“Aazne, itiŋa tanepneep, ve nasavia saveeŋ tonene payam.

²⁶Eemoghon mala maau pale napul gham, ve Tamaŋ imbaaŋ lemim Palotiŋa ite paam izilat pa you izag. Nene Avuvu Patabuaŋ. Ye pale igham naghog, ve ipaghazonaŋ ngar tiam pa mbep tisob, ve ipei ngar tiam pa saveeŋ isob to you nasavia payam. Leso matamim kisini.^f

²⁷“You pale napul gham. Tovenen naghaze napul luuma tiou ineeep toman gham, lesa aneeep poia toman lolomim luuma. Nepooŋ poia to naghaze naghama payam, nene raraate inimale nepooŋ poia to tamtoghon to taan tighamghami ne maau. Tovenen lolomim imbumbu malep, ve amatughez malep.^g

²⁸Yam aloonŋ ghou naghaze: ‘You pale napul gham, ve nala. Eemoghon muri, you pale namuul nanim tiam.’ Ighaze lolomim payou, nene pale lolomim poia ve tinimim iza. Pasa, Tamaŋ to ilib payou ne, you naghaze namuul nala toni. ²⁹Saveeŋ isob tonene, you nasavia payam pataghaaŋ. Leso sawa to anona toni ivot, matamim ingal aliŋag, ve aghur inim tiou. ³⁰Saveeŋ to nasavia payam ne, irau naseeŋga ila mala kat maau. Pasa, nginiinŋ to taan tonene inim igharau wa. Ye tapiri irau ghou maau, ve you naneeep ila ye samba maau. ³¹Eemoghon you irau nataghon katin saveeŋ isob to Tamaŋ isavia payou, ve patajani ivot payou itaghon ngar toni. Leso tamtoghon to taan tiwatag tighaze you lolog pa Tamaŋ kat.

c 14:20 Yo 17:21 **d 14:21** 1Yo 2:5, 5:3 **e 14:23** 1Kor 3:16; 2Kor 6:16; Syg 3:20

f 14:26 Lu 24:49; Yo 16:13; 1Yo 2:20,27 **g 14:27** Yo 16:33; Ro 5:1; Pil 4:7; Kol 3:15

Yo, amundig tapul ndug tonene, ve tala.”^h

Yesu, ye vaen tau

15 ¹Yesu isaav muul ighaze: “You taug to vaen tau.ⁱ
Ve Tamaŋ, ye ŋginiŋ to uum vaen.^j

²Yes to tineep tuŋia inim tiou, nene tinimale ai vaen boga. Boga tisob to anoŋadi tivot pooi maau, nene Tamaŋ ipook di tizi. Ve boga tisob to anoŋadi tivot pooi, nene ye irab motmotin matadi ve ighagharaat di, lesu tiŋgalaŋ ve anoŋadi katindi tivot.^k

³Yam tonene, saveeŋ to nasavia payam, tauto igharaat gham ve aŋgalaŋ wa.^l

⁴Yam irau aneep tuŋia inim tiou, ve you naneep tuŋia ilat tiam. Agham ŋgar pa vaen boga. Ighaze ineeep sagan pa vaen luvuŋa, pale boga tonowen ighur anoŋa? Maau. Ai boga irau ineeep tuŋia ila ai luvuŋa, ghoru anoŋa. Ve yam tovene paam. Ighaze aneep tuŋia inim tiou maau, nene irau ghurla tiam ighur anoŋa poia eta maau.^m

⁵“You taug to ai vaen, ve yam animale vaen boga. Tamtoghon to ighaze ineeep tuŋia inim tiou, ve you naneep tuŋia ila toni, nene pale ghurla toni ighur anoŋa popoia katindi. Ve ighaze aneep sagan payou, nene irau agham mbeb poia eta ivot maau.ⁿ

⁶Tamtoghon to ighaze ineeep tuŋia inim tiou maau, nene ye inim ai booga gorgori to timbuti ve tipiyaava ila. Ai boga tovene, pale muri tindou di, ve tipiyaav di tisob tizala yab ighan di.^o

⁷Ighaze aneep tuŋia inim tiou, ve saveeŋ tiou ineeep tuŋia ila lolomim ve ataghoni, yam irau aghason Tamaŋ Maaron pa sa mbeb to lolomim pani, ve ye pale igham mbeb tonenen ivot payam.^p

⁸Ighaze ghurla tiam ighur anoŋa popoia katindi, nene pale apaghazoŋan Tamaŋ Maaron iza tiina toman tapiri ve poia toni, ve apatoŋ taumim paam aghaze yam taghoniŋa tiou.^q

⁹You lolog ineeep tiam kat inimale Tamaŋ lolo ineeep tiou. Matamim kisin ŋgar tiou tonene, ve aneep ilooŋ ila irau sawa isob. ¹⁰Ighaze matamim kisin tutuuŋ tiou tisob ve ataghon di, nene pale awatag kat aghaze you lolog payam kat, ve aneep ilooŋ ila ŋgar tiou tonene irau sawa isob. Inimale you. Matag kisin Tamaŋ tutuuŋ toni to naol

h 14:31 Yo 10:18; Pil 2:8; Hib 5:8 **i 15:1** Muuŋ, Maaron igham yes Israela nditimbudi tila tivot taan to yes Kanaana, ve igham taan tonowen padi, lesu tineep pani, ve tigham ŋgar popoia tivotvot, inimale ai vaen ighurghur anoŋa popoia. Eemoghon sawa naol, yes Israela titaghon ŋgar poia maau. Ve Yesu, ye igham ŋgar poia ivot itaghon Maaron ŋgar toni. Tauto iwaat tau ighaze ye vaen tau. **j 15:1** Mbo 80:8+; Is 5:1+ **k 15:2** Ro 11:17+ **l 15:3** Yo 13:10, 17:17; Ep 5:26 **m 15:4** Kol 1:22+, 2:7 **n 15:5** Ga 5:22+; Pil 2:13; Kol 1:10 **o 15:6** Mt 3:10+, 7:19 **p 15:7** Yo 14:13; 1Yo 5:14+ **q 15:8** Mt 5:16; Lu 6:43

ne, ve nataghon di. Tauto nawatag naghaze ye lolo ineeḡ tiou kat, ve naneeḡ ilooḡ ila ḡgar toni tonenen irau sawa isob.^r

¹¹“You nasavia saveeḡ tonene payam, lesa lolomim poia le poia kat inimale you. ¹²Tutuun to nasavia payam, nene vene: Lolomim pa taumim ve agham poian taumim, inimale you lolog payam ve naghām poian gham.^s

¹³Ighaze tamtoghon eta imbaad pataḡani pa ndita, ve ipul tau imaat padi, nene ipatoḡa ighaze ye lolo ineeḡ todi kat. ḡgar tovene ilib pa ataam tisob to lolood pa nditaad.^t

¹⁴Ighaze ataghon tutuun to naghuri payam, yam pale apatoḡ taumim aghaze you nditag kat to yam.^u

¹⁵Mbesoḡa eta iwatag katin uraat to tiina toni ighamghami ne maau. Eemoghon yam, ghorō awatagi. Pasa, saveeḡ isob to naloḡa ila to Tamaḡ, tauto navotia payam ve aloḡa wa. Tovenen you irau nawaat gham mbesoḡa muul maau. Pale nawaat gham naghaze nditag kat.^v

¹⁶Yam taumim lolomim ve anim ataghon ghou maau. You taug to nasia gham anim leg, ve naghur gham pa ala ve agham uraat. Uraat to aghami, nene pale ighur anoḡa, ve anoḡa tonenen ineeḡ itaghoni taghoni gha ila. Ighaze yam agham tovene, ve aghason Tamaḡ pa mbēb eta ila you izag, ye pale ilooḡ gham ve igham payam.^w

¹⁷Tovenen you naghur tutuun payam tovene: Lolomim pa taumim ve agham poian taumim.”^x

Yes to titaghon taan ḡgara, pale tighur koi pa Yesu tamtoghon toni

¹⁸Yesu isaav padi muul tovene: “Ighaze yes to titaghon taan ḡgara tighur koi payam, matamim ḡḡal: ḡgar todi tonowen, paghu maau. Yes tighur koi payou muun, tauto tighur koi payam paam.^y

¹⁹Ndiran to titaghon ḡgar to taan, inimale yam ataghon di pa ḡgar todi ve yamḡ raratemim, tone lolodi payam. Eemoghon maau. Pasa, you napas gham avot ila lolodi ve anim leg, ve apul ḡgar to taan wa. Tauto yes tighurghur koi payam.^z

²⁰Matamim ḡḡal saveeḡ to you nasavia payam: Mbesoḡa eta irau ilib pa tiina toni ne maau. Tovenen yes to tighur pataḡani payou, nene pale tighur pataḡani payam paam. Ve yes to matadi kisin saveeḡ tiou ve titaghoni, nene pale matadi kisin saveeḡ tiam paam ve titaghoni.^a

r 15:10 1Yo 5:3 s 15:12 Yo 13:34+; 1Yo 4:7+ t 15:13 Ro 5:7+; Ep 5:2;
 1Yo 3:16 u 15:14 Mt 12:50; Yo 14:23 v 15:15 Mbnp 18:17; Mbaḡ 20:27; Yems 2:23
 w 15:16 Mt 28:19; Yo 14:13; Ep 1:4 x 15:17 Yo 13:34 y 15:18 Mt 10:22; 1Yo 3:13
 z 15:19 Lu 6:22; Yo 17:14; 1Yo 4:5 a 15:20 Mt 10:24+; 2Tim 3:12; 1Yo 4:6

²¹Tamaŋ to imbaaŋ ghou nanim, tamtoghon to titaghon ŋgar to taan, tiwatagi rita maau. Tauto yes pale tigham ŋgar tovene payam. Pasa, yam anim leg ve ataghon ghou.^b

²²Inimale you nanim ve navotia saveeŋ padi maau, tone ledi sosor ila Maaron mata maau. Eemoghon you nanim ve navotia saveeŋ toni padi wa. Tauto, aazne, yes irau tipoon taudi pa sosor todi muul maau. Sosor todi ineeŋ ghazooŋa wa.^c

²³Tamtoghon to ighaze ighur koi payou, nene ighur koi pa Tamaŋ paam.

²⁴Uraat tintina to naghham di ila matadi, nene ŋgeu eta igham uraat tovene pa eta sone. Inimale naghham uraat tonene maau, tone ledi sosor ila Maaron mata maau. Eemoghon you naghham uraat tonowen ve tighita wa. Ve tighurghur koi pa yeru Tamaŋ sone. Tauto ledi sosor ila Maaron mata. ²⁵Ŋgar to tigham payou, nene itaghon saveeŋ to muuŋ timbooda ila tutuuŋ todi. Ighaze:

‘Yes tighur koi payou sorok.’^d

²⁶Yesu iseeŋ saveeŋ toni muul ighaze: “Palotiŋa to pale inim, ye ineeŋ to Tamaŋ. Ve you pale nambaŋa izilat tiam. Ye Maaron tau Avuvu to ivot ila toni ve izi inim. Ye isasavia saveeŋ onoon moghon. Ve ye pale ipariaaŋ saveeŋ tiou, leso tamtoghon tighur inim tiou.”^e

²⁷Ve yam paam pale apariaaŋ saveeŋ tiou. Pasa, sawa to napamundigin uraat tiou le imuul aazne, yam anepneep toman ghou.^f

16 ¹“Saveeŋ isob tonene, you nasavia payam pa napalot gham.

Leso atap ve apul ghurla tiam sob. ²Aghita. Muri, yes Yuda pale tizurun gham pa rumai todi, ve irau yamŋa alup gham pa suŋuuŋ muul maau. Sawa tonenen, ighaze todi eta irab tiam eta imaat, nene pale igham ŋgar ighaze imbees pooi pa Maaron.^g

³Tamtoghon pale tigham ŋgar tonenen payam pasa, tikankaan pa Tamaŋ Maaron, ve tikankaan payou paam.^h

⁴Saveeŋ tonene, you nasavia payam pataghaaŋ. Leso sawa to pataŋani tonenen ivot payam, matamim iŋgal aliŋaŋ tonene, ve ayoon ariana.

Yesu isavia uraat to Avuvu Patabuaŋ

“Muuŋ, you nasavia saveeŋ tonene payam maau. Pasa, taug nanepneep toman gham. ⁵Ve aazne, naghaze napul gham, ve namuul nala pa Tamaŋ to imbaaŋ ghou nanim. Eemoghon tiam eta ighason ghou pa ndug to naghaze nala pani ne maau. ⁶Onoon, saveeŋ to nasavia payam ne, pale igham gham lolomim ipataŋan kat. ⁷Eemoghon you nasaav payam: Onoon kat, ighaze napul gham ve nala, nene pale poia payam. Pasa,

b 15:21 Mt 5:10+; Yo 16:2+ **c** 15:22 Lu 12:47; Yo 9:41; Ro 1:20; Yems 4:17

d 15:25 Mbo 35:19, 69:4 **e** 15:26 Lu 24:49; Yo 16:14; Mbaŋ 2:33 **f** 15:27 Lu 24:48;

Mbaŋ 1:8; 1Yo 1:1+ **g** 16:2 Mt 24:9; Mbaŋ 26:9+ **h** 16:3 Yo 15:21; Ro 10:2; 1Tim 1:13

ighaze napul gham maau, nene irau Maaron Avuvu izilat tiam maau. Ve ighaze nala, nene pale nambaarj Palotiija tonowen izilat, leso iuul gham.ⁱ

⁸Sawa to izilat, ye pale igham tamtoghon to taan tighilaal sosor todi ve ngar to denja ila Maaron mata, ve tighilaal tighaze muri pale Maaron ingabiiz tamtoghon ve ighur atia padi. ⁹Sosor todi, nene vene: Tighur inim tiou maau.^j

¹⁰Ve sawa to namuul nala to Tamañ, ve aghita ghou muul maau, nene pale tamtoghon tighilaal tighaze you naghama ngar denja ila Maaron mata.^{k l}

¹¹Ve uraat to gabizooñ ve ghuruuñ atia pa tamtoghon, nene pale ivot. Pasa, nginiñ to yes to titaghon ngar to taan, Maaron ingabiiza ighaze ye isosor wa. Tovenen ye isasañan moghon pa sawa to Maaron ighur atia pani.^m

¹²“You leg saveeñ naol to naghaze nasavia di payam. Eemoghon irau nasavia di to aazne ne maau. Pale ipatañan payam. ¹³Eemoghon Maaron Avuvu, ye ipaghazoñan saveeñ onoon to Maaron pughu. Sawa to inim, ye pale igham pooz payam, leso aghazoñ kat pa saveeñ isob to onoon. Pasa, ye irau isavia saveeñ eta itaghon tau ngar toni maau. Sa saveeñ to ilooña ila to Tamañ, tauto ye pale ivotia. Ve ye pale ipaghazoñan gham pa mbeb pida to pale tivot muri.ⁿ

¹⁴Sa ngar ma saveeñ to ighami inim tiou, ye pale ivotia payam. Leso aghazoñ payou, ve aghilaal ghou aghaze izag tiina pa tapirig ve poia tiou. ¹⁵Tamañ ngar toni ve tapiri, toman mbeb toni to naol ne, tineep tiou paam. Tauto nasaav payam naghaze: ‘Sa ngar ma saveeñ to Maaron Avuvu ighami inim tiou, ye pale ivotia payam.’”^o

Taghoniija to Yesu pale lolodi ipatañan.

Eemoghon muri pale lolodi poia muul

¹⁶Yesu iseñ saveeñ toni muul ighaze: “Mala maau pale akaal naghog. Ve tala ris, ghoru aghita ghou muul.”

¹⁷Tovenen taghoniija toni pida tiwasavon di tighaze: “Wai, saveeñ toni tonene, pughu vena? Ye isaav pait ighaze, mala maau pale takaal naghog. Ve tala ris, ghoru taghita muul. Ve isaav paam ighaze ye pale ila to Tama.

¹⁸Alija waaro ris to ighaze: ‘mala maau,’ nene pughu vena? Iit takakaan pa saveeñ toni tonene. Ye isavia sa?”

¹⁹Yesu ighilaal ngar todi ighaze yes tighaze tighasoni pa saveeñ toni pughu. Tovenen isaav padi ighaze: “Vena, aliñag waaro to naghaze: ‘Mala

i 16:7 Yo 14:16,26, 15:26 j 16:9 Yo 15:22 k 16:10 Sawa to Maaron ipamundigin Yesu pa mateeñ, ve imuul izala pa ndug sambam, nene ipatoña ighaze Tama Maaron lolo poia pani, ve iyok pa uraat toni. l 16:10 Ro 1:4 m 16:11 Yo 12:31 n 16:13 Yo 14:26; 1Yo 2:27 o 16:15 Mt 11:27; Yo 17:10

maau pale akaal naghog, ve tala ris, ghoru aghita ghou muul,' saveen tonene to awaghasonin gham pani ne? ²⁰⁻²¹ Onoon kat, you nasaav payam. Yam pale lolomim ipatajan kat ve agham tañiiz tiina. Ve yes to titaghon ngar to taan pale tinidi iza. Eemoghon tala ris muul, ghoru lolomim ipatajan muul maau, ve anamim tinimim iza inimale liva to ipoop. Onoon, sawa to popaan, ye iyamaan yabyabuun tiina. Eemoghon sawa to ipoop tamtoghon izi, ye lolo poia kat pa natu paghu tonenen, ve lolo imaagh pa yabyabuun to ighami.

²² "Yam tovene paam. Aazne, lolomim ipatajan kat. Eemoghon you pale nanim naghita gham muul.^p

Sawa tonenen ighaze ivot, yam pale lolomim poia le poia kat. Ve lolomim poia tonenen, tamtoghon eta irau iwalabi payam maau.^q

²³ Sawa tonenen ve ila, yam pale aghason ghou pa mbeg eta pughu muul maau. Pasa, ngar tiam pale ighazoonj. Onoon kat, you nasaav payam: Ighaze aghason Tamañ pa mbeg eta ila you izag, ye pale igham payam.

²⁴ Muun ve inim aazne, yam aghason Maaron pa mbeg eta ila you izag sone. Ve you nasaav payam: Aghasoni, ghoru igham payam. Leso lolomim poia le poia kat.^r

Yesu itatan taan tapiri wa

²⁵ "Saveen tonene, you nasavia payam ila saveen palelaan. Eemoghon sawa tiou ighaze ivot, nene pale you irau nasavia saveen eta payam ila saveen palelaan muul maau. You pale nasaav ghazoonja, ve napaghazonjan gham pa Tamañ. ²⁶ Sawa tonenen, yam taumim pale aghur ghasoniin tiam inarua Tamañ ila you izag. Lemim pughu eta pa naghavomim, ve naghur ghasoniin tiam ila pani ne maau. ²⁷ Pasa, Tamañ iwata: Yam lolomim payou, ve aghur inim tiou aghaze you naneep toni ve nanim. Tauto ye lolo payam, ve ighaze igham poian gham. ²⁸ Onoon kat, you naneep to Tamañ, ve nazi nanim taan. Ve aazne, sawa to napul taan ve namuul nazala toni, nene inim igharau wa."

²⁹ Yesu isavia saveen tonene, ve taghoniina toni tisaav pani tighaze: "Tiina, aazne yom usavsav ila saveen palelaan muul maau. Usaav ghazoonja kat payei. ³⁰ Tovenen yei nighilaal ghom nighaze yom uwatag mbeg tisob. Pasa, sawa to tamtoghon tighason ghom sone, ve yom uwatag ghasoniin todi wa. Tauto nighur ilat tiom nighaze yom uneep to Maaron, to uzi unum."

³¹ Yesu ipamuul alinadi ighaze: "Onoon? Ingaramus aghur ila? ³² Aloon, sawa tiou inim igharau wa. Ighaze ivot tonene. Tovenen tamtoghon pale tinaan gham le asob awaghaughau ala lemim lemim, ve apul ghou

p 16:22 Yesu avaat isavia saveen tonene inarua sawa to mundigiin toni.

q 16:22 Lu 24:52; Yo 20:20; 1Pe 1:8 r 16:24 Mt 7:7; Yo 15:11

naneep. Eemoghon you engengou naneep maau. Pasa, Tamaŋ inepneep toman ghou.^s

³³Saveeŋ tonene, you nasavia payam, leso aneep tuŋia inim tiou, ve luuma tiou ineeep toman gham. Onoon, sawa to aneep izi taan, pataŋani pale igham gham. Eemoghon amatughez malep. Lolomim poia ve ayoon ariana! Pasa taan tapiri, you natatani wa.”^t

Yesu isuŋ ve ighason Tama Maaron pa ipaghazoŋani ighaze ye iza tiina

17 ¹Yesu isavia saveeŋ tonene le isob, ghero mata izala pa sambam, ve isuŋ ighaze: “O Tamaŋ, sawa tiou, tauto ivot wa. Upaghazoŋan tamtoŋhon pa Natum, ve ugham di tighilaal tapiri ve poia toni. Leso ye ipaghazoŋan di payom, ve tighilaal ghom paam tighaze yom izam tiina pa tapirim ve poia tiom.”^u

²Yom ughur tamtoŋhon tisob tineep ila Natum samba wa. Leso yes to yom ughur di tinim ye le, tisob tigham nepooŋ poia ila toni itaŋhoni taghoni gha ila.^v

³Yom moghon to Maaron tau. Ve nepooŋ poia to tamtoŋhon tighami ilat tiom, nene ŋgara tovene: Yes tiwatag katin ghom, ve Natum Yesu Krisi to umbaŋa izi inim taan. Tamtoŋhon tovene, pale tineep poia ilat tiom itaŋhoni taghoni gha ila.^w

⁴Uraat naol to ughur di tinim nimag, you napasob di tisob wa. Tauto napaghazoŋan izam tiina toman tapirim ve poia tiom izi taan.^x

⁵O Tamaŋ, muuŋ kat, sawa to mbeb eta ivot sone, you naneep toman ŋgurubag ve izag tiina ila matam. Tovenen aazne, you naghaze ugham ghou namuul nalat tiom, ve naneep toman ŋgurubag ve izag tiina animale muuŋ.^y

Yesu ighason Tama Maaron ighaze iŋgin poian taghoniŋa toni

⁶“O Tamaŋ, yom upas ndiran pida tivot ila tamtoŋhon to taan lolodi, ve ugham di tinim leg, ve you napaghazoŋan di pa izam toman ŋgar tiom ve gabuam wa. Yes tamtoŋhon tiom. Eemoghon yom ugham di tinim leg, ve matadi kisin saveeŋ tiom ve titaghoni.”^z

⁷Aazne, yes tiwatag tighaze: Mbeb tisob to yom ugham di payou, nene tivot ilat tiom.^a

⁸Pasa, saveeŋ isob to yom ughuri inim tiou, nene anag nasavia padi, ve tighami inim ledi wa. Tauto aazne, tighur inim tiou, ve tiwatag tighaze: You naneep tiom, ve yom umbaŋ ghou to nanim.

s 16:32 Mt 26:31,56; Yo 8:29 t 16:33 Yo 14:27; Ro 8:35+; 1Yo 4:4, 5:4 u 17:1 Yo 12:23 v 17:2 Dan 7:14; Mt 28:18; Yo 6:39 w 17:3 Yo 3:16; 2Pe 1:2+; 1Yo 5:20 x 17:4 Yo 4:34, 13:31 y 17:5 Yo 1:1+; Pil 2:6; Hib 1:3 z 17:6 Yo 6:37+, 10:29 a 17:7 Mbeb to Yesu isavia di, nene mbeb tinimale iza tiina, ve tapiri to igham mbeb gharatoŋadi, ve ŋgar to ineeep toni, toman uraat ve saveeŋ toni.

⁹“Taman, suņuuņ tiou tonene iņarua ghom pa ndiran tonene pasa, yes tamtoghon tiom, ve yom ughur di tinim leg wa. Ve yes to titaghon nġar to taan, you naghur di ila suņuuņ tiou tonene maau. ¹⁰Tamtoghon tiou toman mbef tiou to naol ne, nene yom tiom. Ve tamtoghon tiom toman mbef tiom tisob, nene you tiou. Ndiran tiou tonene tipaghazoņan izag tiina toman tapirig ve poia tiou wa. ¹¹You irau naneep toman di muul maau. Pale napul di tineep izi taan. Pasa, naghaze nalat tiom tonene. O Taman, yom patabuaņ. Uņgin poian di ve unum sigeu padi. Leso tikis izam toman nġar tiom ariana, ve lupuuņ todi eemoghon tinimale ituru.^b ¹²Tapirim toman nġar tiom to izam tiina pani, nene yom ugham payou paam. Tovenen sawa to nanepneep toman di, you nanġin di ila izam, ve nanim sigeu padi. Tauto todi eta ilale maau, ve aazne tikiskis izam toman nġar tiom ariana. Iņgeu to iza ineeep pataghaaņ pa ilale, ye moghon to ilale. Leso saveeņ tiom to timbooda ne anoņa ivot.^c

¹³“Eemoghon naghaze napul ndiran tonene tineep, ve nalat tiom tonene. Tovenen sawa to yeiņa ninepneep izi taan sone, ve nasavia saveeņ isob tonene padi pataghaaņ. Leso lolodi poia kat tinimale you.^d

¹⁴Ndiran tonene, you navotia saveeņ tiom padi, ve tighami wa. Tovenen yes to taan muul maau, inimale you to taan maau. Pughu tonene to tamtoghon to titaghon nġar to taan tighurghur koi padi.^e

¹⁵You naghason ghom pa upas di tivot sagan pa yes to titaghon nġar to taan ne maau. You naghaze unum sigeu padi, ve upoon di pa Iņgeu Samia.^f

¹⁶Pasa, ndiran tonene, yes to taan maau, inimale you to taan maau.

¹⁷“Saveeņ tiom, nene saveeņ onoon moghon. Upalot saveeņ tiom ineeep ariana ila lolodi. Leso tinim tamtoghon tiom patabuaņa, ve titaghon katin nġar tiom.^g

¹⁸You nambaņ di tila pa tineep ila tamtoghon to taan lolodi, ve tigham uraat padi, inimale yom umbaaņ ghou nazi nanim naneep ila tamtoghon to taan lolodi.^h

¹⁹Aazne, you napul taug nalat nimam, ve naghaze napasob uraat to yom ughuri payou. Leso nauul di, ve saveeņ tiom onoon igham uraat padi ve tinim tamtoghon tiom patabuaņa.ⁱ

**Yesu ighason Maaron pa ilup yes to muri pale
tighur ila toni tinim ee moghon**

²⁰“Suņuuņ tiou tonene iņarua ghom pa ndiran tonene moghon maau. You naghason ghom pa yes to muri pale tilooņ saveeņ todi, ve tighur

b 17:11 2Tes 3:3; 1Pe 1:5; Jud 24+ **c 17:12** Mbo 41:9; Yo 6:39,70 **d 17:13** Yo 15:11
e 17:14 Yo 15:19; 1Yo 2:15+ **f 17:15** Mt 6:13; 1Yo 5:18 **g 17:17** Yo 15:3; 1Pe 1:22
h 17:18 Mt 28:19; Yo 20:21 **i 17:19** 1Kor 1:2,30; Ep 5:26; Hib 10:10

inim tiou paam. ²¹Tamaŋ, ulup di tisob tinim ee moghon, ve ugham di tineep tunja inim toit, inimale you naneep ilat tiom, ve yom uneep inim tiou, ve lupuuŋ toit ee moghon. Leso tamtoŋhon to taan tighilaal tighaze yom umbaaŋ ghou to nanim.^j

²²Tapirim ve poia tiom to izam tiina pani, yom ugham payou, ve you napaghazoŋan di pani wa. Leso tilup di tinim ee moghon, tinimale ituru.

²³You pale naneep ila todi, ve yom uneep inim tiou. Leso tilup di tinim ee moghon kat. Ighaze ŋgar tovene ivot, nene pale tamtoŋhon to taan tighilaal tighaze yom umbaaŋ ghou to nazi nanim, ve lolom pa yes to tighur inim tiou ne, inimale lolom payou.^k

²⁴“Tamaŋ, yes to yom ugham di tinim leg, you naghaze tinim tineep toman ghou izi ndug tiou, ve tighita katin ŋgurubag, toman tapirig ve poia tiou. Sawa to yom ughur mbeg eta ivot sone ve inim, yom lolom payou.

Tauto ugham ghou naneep toman ŋgurubag ve tapirig tiina, ve izag tiina.^l

²⁵O Tamaŋ, yom deŋiam kat. Yes to titaghon ŋgar to taan, tiwatag ghom maau. Eemoghon you, ghoronawataŋ katin ghom. Ve ndiran tonene tighilaal tighaze yom umbaaŋ ghou to nanim. ²⁶Izam tiina toman gabuam ve ŋgar tiom, you napaghazoŋan di pani wa. Ve you pale naghamaŋgamaŋ tovene, le tighazoŋan pani kat. Leso lolodi pa taudi inimale yom lolom payou, ve naneep ila todi ve yeiŋa nilup ghei ninim ee moghon.”

Tikis Yesu

(Mt 26:47-56; Mk 14:43-50; Lu 22:47-53)

18 ¹Yesu ipasob suŋuuŋ toni le isob, ghoronawataŋ taghoniŋa toni tipul ndug tiina Yerusalem, ve tizila timbut ya Kidron, ve tinau tizala pa oliv lolo to ineeŋ ila lolooz dige. ²Ndug tonowen, Yudas, ŋgeu to ighaze ighur Yesu ila koia nimadi, ye iwataŋi paam. Pasa, Yesu toman taghoniŋa toni moghon moghon tiluplup di izi tonowe. ³Tovenen Yudas ighamaŋ ndaaba pida to Rom toman uraata pida to yes daba to watoŋrau ve ndiran tutuuŋa timbaaŋ di, ve yesaŋa tila pa ndug tonowen. Tikis lam ve sul toman ndaab to malmal, ve tilaagh tila. ⁴Iŋgar isob to pale ivot pani, Yesu iwataŋi wa. Tovenen ipul oliv lolo tonowen, ve ilaagh ŋarua di ila, ve ighason di ighaze: “Yam akaal sei?”

⁵Yes tipamuul ghasoniŋ toni tighaze: “Yei nikaal Yesu to Nasaret.” Yudas to ighur Yesu ila koia nimadi, ye paam iyondyood toman di.

Yesu isaav padi ighaze: “You Taug To Nanepneep.” ⁶Sawa to ye isaav padi tovene, ruŋadi iza ve tinduur timuul, le titaptap tizi taan.^{m n}

j **17:21** Ro 12:5; Ga 3:28; Ep 4:3+ k **17:23** Yo 16:27 l **17:24** Yo 12:26; 1Tes 4:17
 m **18:6** Maaron iza Yoova, pughu tovene: ‘You nanepneep.’ Ughita Maaron Igham Mulin
 Yes Israela (o Kisim Bek) 3:14. Sawa to Yesu isavia saveeŋ tonene, ye avaat ipatoŋ Maaron
 tapiri pida. Pughu tonene to yes to tila pa ghamuŋi titaptap tizi. n **18:6** Igham 3:14

⁷Ghoro Yesu ighason di muul ighaze: “Yam akaal sei?”

Ve yes tighaze: “Yei nikaal Yesu to Nasaret.”

⁸Ye isaav padi muul ighaze: “You nasaav payam wa. You Taug To Nanepneep. Ighaze yam aghaze agham ghou, nene poia. Eemoghon apul ndiran tonene tila.” ⁹Ye isaav padi tovene, lesu saveerj toni to muuj isavia ne anoja ivot. Saveerj tovene: ‘Yes to yom ugham di payou, you napul todi eta ilale maau.’^o

¹⁰Sawa tonenen, Simon Petrus le buza. Tovenen ipasi iza, ve isap motin ngeu eez taliņa dige ila pa nima waan. Ngeu tonowen, ye daba to watoonjrau mbesooņa toni. Iza Malkus.^p

¹¹Yesu isaav pa Petrus ighaze: “Ai! Uzeev buza tiom tonanan imuul ila ina. Vena, rubruub to Tamaņ igham payou ne, irau naghun ila maau?”^q

Tigham Yesu ila to Anas

¹²⁻¹³Ghoro yes ndaaba to Rom toman daba todi, ve yes uraata to yes Yuda timbaan di tinim, tikis Yesu, tikau nima, ve tighami tila to Anas muuj, lesu ilooņ saveerj toni. Ndaman tonenen, Anas rawa Kaiapas, ye daba to watoonjrau.^r

¹⁴Kaiapas tonene, to muuj isaav pa pooza to yes Yuda ighaze: “Poia pa ngeu ee moghon igham ival tiina inadi ve imaat padi. Pa vene, tamtoghon tisob timatmaat.”^s

Petrus ipesamun Yesu iza

(Mt 26:69-70; Mk 14:66-68; Lu 22:55-57)

¹⁵Simon Petrus yesuru taghoniņa ite titaghon Yesu le tila tivot daba to watoonjrau ruum toni. Taghoniņa tonowen, daba to watoonjrau iwatagi. Tovenen ye itaghon Yesu ve yesuru tilooņ tila didiņj to iluvut ruum lolo. ¹⁶Eemoghon Petrus, ye ineeep pumuri igharau ataam avo. Tovenen taghoniņa ite tonenen ivot muul, ve isaav pa liva to ingin ataam, pa igham Petrus ilooņ ila paam. ¹⁷Tauto liva tonowen ighason Petrus ighaze: “Yom taghoniņa eez to ngeu tonowen paam?”

Petrus ipamuul aliņa ighaze: “Ee-e, you taghoniņa toni maau.” ¹⁸Sawa tonenen, ndug iyaun. Tovenen yes mbesooņa toman uraata pida titavun yab gha ilaav di ve tinepneep. Ve Petrus paam ila iyondyood toman di, ve yab ilavlaava.

o 18:9 Yo 17:12 **p 18:10** Takabiid Malkus tonene ve Markus izadi malep. Markus, ye ngeu to muri imbood varu poia. Ve Malkus, ye daba to watoonjrau mbesooņa toni.

q 18:11 Rubruub to Yesu isavia, nene iza to pataņani to ye pale imbaada, lesu ireu soror to tamtoghon, ve itatan Maaron mbalmbali toni. **r 18:12-13** Anas, muuj ye inim daba pa ndiran to watoonjrau. Ve sawa tonene, ye isob pa uraat toni wa. Eemoghon iza inepneep sone. Sawa to tirab Yesu imaat, Anas rawa Kaiapas imuuj pa ndiran to watoonjrau.

s 18:14 Yo 11:49+

Anas ighason roran Yesu

(Mt 26:59-66; Mk 14:55-64; Lu 22:66-71)

¹⁹Anas, ye daba muŋgina to ndiran to watoŋrau. Ye ighason Yesu pa taghoniina toni, ve saveeŋ to ivovotia pa tamtoghon. ²⁰Yesu ipamuul aliŋa ighaze: “Saveeŋ tiou, you nangooza maau. Nasasavia ighazooŋ ila ival tiina matadi. Sawa naol, you napatoot tamtoghon pa Maaron aliŋa izi ndug to iit Yuda taluplup ghiit pani, inimale rumai to ndug ndug, ve ila Rumai Tiina nagho. ²¹Yom ughason ghou pa saveeŋ tiou pasa? Ughason yes to tiloŋloŋ saveeŋ tiou. Pasa, yes tiwatag saveeŋ to nasasavia.”

²²Yesu isavia saveeŋ tonene, ve uraata eez to iyoon igharui, ipambar paŋa ve isaav pani ighaze: “Ai, upamuul daba to watoŋrau saveeŋ toni tovene pasa? Uronon pani maau?”

²³Yesu isaav pani tovene: “Ighaze aliŋag eta isosor, ghoron uvotia. Ve ighaze saveeŋ tiou denja, pughu vena to upambar sorokin ghou?”

²⁴Yesu isaav tovene, ghoron Anas ipuli, ve isaav ve tighami tila to Kaiapas to daba to watoŋrau. Ve ravraav to tikau Yesu nima pani, nene inepneep, ve ye ilaghlaagh tomani.

Petrus ipesamun Yesu iza muul

(Mt 26:71-75; Mk 14:69-72; Lu 22:58-62)

²⁵Petrus, iyondyood igharau yab, ve yab ilavlaava. Tovenen yes to yesŋa Petrus tinepneep izi yab dige, tighasoni tighaze: “Yom paam avaat taghoniina toni eez?”

Ghoron Petrus ipesam pa tau ighaze: “Ee-e, you taghoniina toni maau.”

²⁶Ŋgeu to Petrus isap motin taliŋa, siŋ toni eez, ye mbesooŋa to Kaiapas. Ye imundig ve isaav pa Petrus ighaze: “Wai, yom tonene to naghita ghom yamŋa ayondyood izi oliv lolo!” ²⁷Eemoghon Petrus ipesam pa tau muul. Sawa tonenen kat, ve tatareek itaŋ.

Tipayoon Yesu pa savaaveeŋ ila Piladus mata

(Mt 27:1-2,11-14; Mk 15:1-5; Lu 23:1-5)

²⁸Mboŋmaagh kat, daba to yes Yuda tigham Yesu ve tipul ruum to Kaiapas, ve tighami tila pa ruum tiina to Piladus to gavana to Rom. Eemoghon tilooŋ tila ruum toni lolo maau. Tineep pumuri. Pasa, Piladus, ye Yuda maau. Ve sawa to Pasova inim igharau wa. Tovenen timatughez: Ighaze tilooŋ tila ruum toni lolo, nene pale igham di tisami ila Maaron mata, ve irau tighan aniiŋ to Pasova maau. ²⁹Tovenen Piladus ivot ila todi, ve ighason di ighaze: “Ŋgeu tonene igham sa sosor, to aghami inim?”

³⁰Yes tipamuul ghasoniina toni tighaze: “Wai, ighaze ye ŋgeu poia, pale nighami inim tiom? Maau. Ye ŋgeu samia eez. Tauto nighami inim.”

³¹Tovenen Piladus isaav padi muul: “Ighaze venen, yam aghami ala, ve taumim agharaat saveen toni itaghon tutuun tiam.”

Yes tisaav pani tighaze: “Nene poia. Eemoghon yam Roma tutuun tiam ingalsekin ghei pa rabuun tamtoghon imaat.” ³²Muun, Yesu isavia ataam to pale imaat pani. Yes tisaav tovene, tauto Yesu aliņa tonenen ighur anoja.

³³Tovenen Piladus imuul iloon ila ruum lolo, ve isaav ve tigham Yesu iloon ila toni. Ghoru ighasoni ighaze: “Vena, yom kinik to yes Yuda?”^t

³⁴Yesu ipamuul ghasoniij toni ighaze: “Ghasoniij tiom tonenen, ivot ila taum ngar tiom, ma tamtoghon pida tipaesia ghou payom, tauto ughason ghou ne?”

³⁵Piladus isaav pani muul ighaze: “Vena, you to Yuda? Nene taum tamtoghon tiom, toman yes daba to watoonrau, to tighur ghom unum nimag. Tovenen usaav ghazoņa payout lak. Yom ugham sa sosor, to tigham ghom unum?”

³⁶Yesu isaav pani ighaze: “Mbeb to you naghamgham pooz pani, nene to taan maau. Inimale you kinik itaghon ngar to taan, tone uraata tiou tivool tiou, ve tigham malmal. Leso yes Yuda irau tikis ghou maau. Eemoghon saveen, tauto nasavia ila wa. Mbeb to you naghamgham pooz pani, nene to taan maau.”^u

³⁷Piladus iloon saveen toni, ve ighasoni muul ighaze: “Ighaze venen, yom kinik tou?”

Yesu ipamuul aliņa ighaze: “Saveen tauto taum usavia ne. [Eemoghon you kinik inimale yom ugham ngar pani ne maau.] You nazi nanim taan pa napariaan tamtoghon lesu tighur ila saveen onoon. Tinaņ ipoop ghou pa pughu tonene. Tovenen tamtoghon tisob to tighaze titaghon saveen onoon, nene pale tiloon aliņag ve titaghoni.”^v

³⁸Tauto Piladus ighasoni muul ighaze: “Saveen onoon, nene sa?”^w

Piladus iyok pa tirab Yesu imaat
(Mt 27:15-23; Mk 15:6-14; Lu 23:13-23)

Piladus isavsav toman Yesu le isob, ghoru ivot ila pumuri muul, ve isaav pa yes Yuda ighaze: “You naghita naghaze ngeu tonene, ye le sosor eta maau. ³⁹Aghita. Yam gabuamim tovene: Tamtoghon tiam to tineep ila ruum to yabyabuun lolo, ighaze sawa to Pasova ivot, you irau napul todi eez ivot ilat tiam. Vena, aghaze napul kinik to yam Yuda tonene ilat?”

⁴⁰Yes timboob toman aliņadi tiina tighaze: “Yei lolomai pa ngeu tonanan maau! Upul Barabas inim!” Barabas tonowen, muun igham malmal pa izurun gavman to Rom tighau.^x

t 18:33 Mt 2:2 u 18:36 Dan 7:13-14; Ro 14:17 v 18:37 Yo 8:47 w 18:38 Yo 14:6
x 18:40 Mbanj 3:14

Yes ndaaba tilos Yesu ve tipamogherani inimale ye kinik

(Mt 27:27-31; Mk 15:16-20)

19 ¹Tovenen Piladus isaav pa ndaaba toni, ve tigham Yesu ve tilosi.^y ²⁻³Ve tigham waar mata mata ve titalia, ve tighuri izala Yesu daba inimale moghar to yes kinik. Ve tindudi pa nonogiija eez to bodeerja inimale aindanz izala pogho. Ghoro tamtoghon todi erjaerja tila tiyoon ila mata, ve tisaav pani tighaze: “Aa, kinik to yes Yuda, ghagharaar poia! Yei nipakur ghom!” ve tipambar paña.

Piladus isaav ighaze tirab Yesu imaat

(Mt 27:24-25; Mk 15:15; Lu 23:24-25)

⁴Tighamgham tovene, ve Piladus ivot ila pumuri, ve isaav pa ival tiina ighaze: “Aghita. You pale naghham ngeu tonowen ivot inim tiam. Leso awatag aghaze you naghita naghaze ye le sosor eta maau.” ⁵Tovenen Piladus igham Yesu ivot ila pumuri. Waar mata mata ineep ila daba, ve nonogiija to bodeerja inimale aindan ineep ila tini. Ghoro Piladus isaav pa ival tiina ighaze: “Aghita! Tamtoghon tau tonene!”

⁶Yes daba to watoonrau toman uraata pida to Rumai Tiina tighita Yesu, ve timboob tighaze: “Urabi izala ai pambarooj! Urabi izala ai pambarooj!”

Eemoghon Piladus isaav padi ighaze: “Yam taumim aghami ala, ve arabi izala ai pambarooj. Pasa, you naghita naghaze ye le sosor eta maau.”^a

⁷Yes Yuda tipamuul aliña tighaze: “Yei lemai tutuun. Ve tutuun tiei isaav ighaze: tamtoghon tovene, ye irau imaat. Pasa, ipakur tau ighaze ye Maaron Natu.”

⁸Piladus ilooj saveen tonene, le matughezaan tiina ighami. ⁹Tovenen ilooj ila ruum lolo muul, ve ighason Yesu ighaze: “Yom sa ngeu? Ulaagh vena to unum?” Eemoghon Yesu isavia saveen eta pani maau. Neneerja moghon. ¹⁰Tovenen Piladus ighasoni muul ighaze: “Pughu vena to upamuul aliñag maau? Yom ukankaan payou? Aazne, yom uneep ila nimag. You leg tapirig pa napul ghom ula, ve leg tapirig pa nasaav ve tirab ghom uzala ai pambarooj.”

¹¹Yesu isaav pani tovene: “Ighaze Maaron to sambam ipul ghou nalat nimam maau, nene irau lem tapirim pa ugham mbeb eta payou maau. Tovenen ngeu to ighur ghou nalat nimam, sosor toni ilib pa sosor tiom.”^b

y **19:1** Ravraav to yes Roma tiloslos tamtoghon pani, poia maau. Timbit mbeb matadi ila, leso iwaghamun tamtoghon kat. z **19:2-3** Yes kinik tindud di pa nonogiija to bodeerja inimale aindan. a **19:6** Mbarj 3:13+ b **19:11** Yo 10:18; Mbarj 2:23

¹²Piladus ilooŋ saveeŋ tonene, ghero ikaal ataam pa ipul Yesu ila. Eemoghon yes Yuda timboob ila pani: “Ighaze yom upul ŋgeu tonanan ila, yom kinik tiina to Rom ŋgeu toni maau. Pasa, tamtoghon tisob to tipakur taudi tighaze yes kinik, nene tizoor kinik tiina to Rom pooz toni.”^c

¹³Piladus ilooŋ saveeŋ tonene, ve igham Yesu ve yesuru tivot tila pumuri, ghero Piladus mbole ila ina to gharatoon saveeŋ. Ina tonowen ineeŋ ndug to tiwaat iza ila saveeŋ Hibru tighaze ‘Gabata’ (‘Gabata’ pughu tovene: ndug to tirau yaam babaŋadi ila inim ndug to nepooŋ.)¹⁴Sawa tonenen, nene sawa to gharatoon aniŋ ma mbeb pa Pasova. Ve ndag iza inim bobodaŋ wa. Piladus isaav pa yes Yuda ighaze: “Aghita. Kinik tiam tau tonene!”

¹⁵Eemoghon timboob ila pani tighaze: “Maau. Ŋgeu tonanan ineeŋ malep! Ughami ila, ve urabi imaat. Urabi izala ai pambarooŋ!”

Tovenen Piladus ighason di muul ighaze: “Lolomim vena? Aghaze you narab kinik tiam tonene izala ai pambarooŋ?”

Yes daba to watoonŋrau tipamuul aliŋa tighaze: “Yei lemai kinik ite paam maau. Kinik tiina to Rom, ye moghon to kinik tiei.”^d

¹⁶Tovenen Piladus ilooŋ aliŋadi, ve ipul Yesu ila ndaaba toni nimadi. Leso tirabi izala ai pambarooŋ.

Tirab Yesu izala ai pambarooŋ
(Mt 27:32-44; Mk 15:21-32; Lu 23:26-43)

¹⁷Tovenen tigham Yesu tila, ve tau imbaad ai pambarooŋ toni. Tipul ndug tiina Yerusalem, ve tivot tila pumuri, ghero tinau pa ndug mbuŋa eez, iza ‘Daba rubruuba.’ Tiwaat ndug tonowen iza ila saveeŋ Hibru tighaze ‘Golgata.’^{e f}

¹⁸Tila tivot tonowe, ghero tirab Yesu toman ndiran ru paam tizala ai pambarooŋ todi todi, ve tipayoon di tiza. Ndiran ru tonowen, eez imonau ila pa Yesu nima ŋas, ve ite imonau ila pa nima waan, ve Yesu ineeŋ bodbodaŋ.

¹⁹Ve timbood mateeŋ toni pughu ila ndiu suruvu, ve tirabi izala ai pambarooŋ toni daba, titaghon saveeŋ to Piladus isavia padi. Paesiŋ tonowen isaav tovene: “Yesu to Nasaret, kinik to yes Yuda.”²⁰Saveeŋ tonene, timbooda ila saveeŋ Hibru, Roma aliŋadi, ve yes Grika aliŋadi paam.^g

c 19:12 Lu 23:2 **d 19:15** Maaron saveeŋ toni isaav tovene: Maaron, ye kinik to yes Israela. Eemoghon saveeŋ waaro tonene, nene yes Yuda tizurun Maaron to kinik todi kat, ve tighaze kinik to Rom to ingin di. **e 19:17** Saveeŋ ‘daba rubruuba,’ yes Roma tiwaata ila aliŋadi Latin tighaze ‘Kalvari.’ **f 19:17** Hib 13:12 **g 19:20** Saveeŋ to timbooda, nene vene: Yeshua Nasaret, Hamelech Yehudah (saveeŋ Hibru), Yesus Ho Nazaraios, Ho Basileus Toon Yudaion (Grika aliŋadi), Iesus Nazarenus Reks Iudaeorum (saveeŋ Latin). Saveeŋ Latin tonene, tuku toni nene INRI. Yesu anunu to tineep ila rumai pida lolodi, timbood saveeŋ INRI ila.

Ndug to tineep pani ve tirab Yesu izala ai pambarooŋ, nene ineep igharau Yerusalem. Tovenen yes Yuda ival tinim tighita saveeŋ tonenen, ve tiwaata.

²¹Tauto yes daba to watoonrau tila to Piladus, ve tisaav pani tighaze: “Yom umbood ughaze ‘kinik to yes Yuda’ malep. Yom irau umbood saveeŋ tovene: ‘Ŋgeu tonene tau isaav ighaze ye kinik to yes Yuda.’ ”

²²Eemoghon Piladus ipamuul alijadi ighaze: “Maau. Saveeŋ to nambooda, pale ineep tovene.”

²³Ndaaba tonenen tirab Yesu izala ai pambarooŋ le isob, ghoru tigham nonogiiŋa toni toman mbep toni pida paam, ve tivalag di tinim paan, ve tireii irau di. Eemoghon nonogiiŋa toni to moŋejaan, nene sainj maau. ²⁴Tovenen ndaaba tonenen tiwasavon di tighaze: “Nonogiiŋa to moŋejaan tonene, tareepa malep. Ineep tovene ve tanjozŋgooz ve taghita: Sei pale ighami?” Tovenen Maaron aliŋa waaro eez to timbooda, anoŋa ivot. Isaav tovene:

“Yes tirei nonogiiŋa tiou toman mbep pida irau di.

Ve nonogiiŋa tiou to moŋejaan, nene tigham mogheraan eez pani.

Leso tighita sei to pale ighami.”^h

Ŋgar to ndaaba tighami, nene deŋja pa saveeŋ tonene.

²⁵⁻²⁶Yesu tina Maria yesuru taziliva, ve Maria ite to Klopas azuwa, ve Maria to ndug Magdala, ve taghoniŋa to Yesu lolo ineep toni kat, yes liim tiyondyood tigharau ai pambarooŋ toni pughu. Yesu mata izi le ighita tina yesuru taghoniŋa toni tonowen tiyondyood. Tovenen isaav pa tina ighaze: “Tinaŋ, ughita. Nanan natum.”ⁱ

²⁷Ve isaav pa taghoniŋa toni ighaze: “Ughita. Nanan yom tinam.” Tauto sawa tonenen ve ila, taghoniŋa tonenen igham Yesu tina ila ruum toni, ve iŋgini.

Yesu imaat

(Mt 27:45-56; Mk 15:33-41; Lu 23:44-49)

²⁸Yesu isavsavaav pa tina ve taghoniŋa toni tonenen le isob, ghoru iwataŋ ighaze ye ipasob uraat toni isob wa. Tovenen isaav ighaze: “You murun ghou!” Saveeŋ tonene, ye isavia lesu Maaron aliŋa to timbooda ne anoŋa ivot. ²⁹Uur eez toman vaen maŋiŋi ineep igharau. Tovenen tigham momosan ve tizeeva izila vaen tonowen. Ghoru tidadaŋa ila ai isop boga, ve tizuzuuna izala pa Yesu avo.^j

³⁰Yesu iyavoon vaen tonenen le isob, ve isaav ighaze: “Uraat tiou, nene isob wa.” Ghoru lua itap, ipul avuvu ila, ve imaat.

Tiŋgeer Yesu waria

³¹Sawa tonenen, nene sawa to titartar taudi pa umbom patabuanj to ighaze ivot. Umbom tonenen, nene patabuanj kat. Tovenen daba to yes Yuda tila to

Piladus, ve tighasoni tighaze ye isaav ila pa yes ndaaba, ve tirab polin yes to timomonau ila ai pambaroon ne aghedi. Leso timaat rikia, ve tizugua di tizi, ve tila titavia di. Le isob, ghero umbom patabuan ivot. ³²Tovenen ndaaba tila, ve tirab polin ndiran ru to tirab di toman Yesu ne aghedi. ³³Tirab polin yesuru aghedi le isob, ghero tila pa Yesu ana. Eemoghon tighita imaat wa. Tauto tirab polin aghe maau. ³⁴Eemoghon ndaaba eez igham iiz, ve ingeer Yesu waria. Ve rikia moghon sirj toman ya imalij.^k

³⁵Ŋgeu to ighita mbep tonenen pa tau mata, tauto isavia. Ve ye iwatag: Saveej toni, nene onoon. Pasa, ye ighita katin mbep tonenen. Tauto ipariaan saveeja, lesu yam paam aghur ila. ³⁶Mbeb tonenen tivot pa Yesu, lesu Maaron alija waaro eez to timbooda ne anoja ivot. Saveej tovene:

“Tua eta irau ipol maau.”^l

³⁷Ve saveej waaro ite isaav tovene:

“Pale matadi ila pa ŋgeu to tinjeera ne.”^m

Tighur Yesu paatu ila naal lolo

(Mt 27:57-61; Mk 15:42-47; Lu 23:50-56)

³⁸Mbeb tonenen tivot le isob, ghero Yosep to ndug Arimatea ila ighason Piladus ighaze iyokia Yesu paatu pani, lesu ighami ila ve ighuri iloon ila naal. Yosep, ye taghoniija eez to Yesu. Eemoghon ivotia ghurla toni ivot ighazoon maau. Pasa, imatughez pa yes Yuda. Piladus iyok pani, tauto ye ila pa igham Yesu paatu. ³⁹Ve Nikodemus to muuj ila to Yesu ve yesuru tisavsav pa mboj, ye paam ila toman Yosep. Ye igham ŋgoreej tiina to vuzi poia ne, ve inim. Ŋgoreej tonowen, patajani toni tiina, irau 30 kilogram ma venen.^{n o}

⁴⁰Yesuru tila tigham Yesu paatu, ve tila tigharaata itaghon yes Yuda gabuadi to moghon moghon tighamgham pa mateeja todi. Timusil ŋgoreej tonenen pida izala Yesu paatu, ve pida ila uli, ve tikaukai. ⁴¹Ndug to tirab Yesu pani, ndug paghuna eez ineep igharau. Ve yaam saambu paghu eez to tigharaata pataghaan inim naal pa mateeja, nene ineep tonowe. Saambu tonowen, tighur mateej eta iloon ila sone. ⁴²Sawa tonenen, nene sawa to yes Yuda titartar taudi pa umbom patabuan. Ve rabrab izi, ve umbom patabuan ighaze ivot. Yaam saambu tonenen ineep igharau. Tovenen tigham Yesu paatu, ve tighuri iloon ila.

Yesu imundig pa mateej

(Mt 28:1-8; Mk 16:1-8; Lu 24:1-12)

20 ¹Umbom patabuan isob, ve ndag to ivot muuj pa wik tonenen, mbojmaagh, ndoromromaaja, ve Maria to Magdala ila ighaze

k 19:34 1Yo 5:6+ **l 19:36** Igham 12:46; Mbo 34:20 **m 19:37** Mbo 22:16+; Sek 12:10; Syg 1:7 **n 19:39** Ŋgoreej to Nikodemus ighami, nene tigharaata pa mbep ru, izadi miir, ve aloe. Muuj, sawa to Maria ipoop Yesu, yes ŋgara to ndag iza tigham miir pa Yesu. Ughita Mt 2:11. **o 19:39** Yo 3:1+, 7:50

ingig naal to Yesu. Ila ivot yaam saambu to tighur Yesu paatu pani, ve ighita yaam tiina to ipoon naal avo, nene tipatambulini ighau wa. ²Tovenen ilaan imuul ila to Simon Petrus ve taghoniija to Yesu lolo pani kat, ve ipaes padi ighaze: “Paanu eta tipas Tiina toit paatu ivot pa naal, ve tighami tila wa! Ve yei nikankaan pani. Tighuri sine?”

³Tovenen Petrus yesuru taghoniija ite tonowen timundig tila pa naal. ⁴Yesuru tilaan tila, ve taghoniija ite tonenen ilaan rikia imuuj pa Petrus, le ila ivot naal avo muuj. ⁵Ghoro itugi izi, ve ingig ilooj ila pa naal lolo, le ighita uli pida pida to tikau Yesu paatu pani, inepneep ila ina. Eemoghon ye ilooj ila naal lolo maau. ⁶Mala maau, Simon Petrus ana inim peria, ve malmali ilooj ila naal lolo. Ye paam ighita uli pida pida to tikau Yesu paatu pani, tinepneep. ⁷Ve ighita uli to tikau Yesu daba pani, nene inep toman uli pida pida tonowen maau. Nene tipoola izi inep sagan. ⁸Ghoro taghoniija ite to ila ivot naal avo muuj, ana itaghon Petrus ve ilooj ila. Ye ighita mbeb naol tonenen, ve ighur ila.

⁹Onoon, Maaron aliija to timbooda, isaav tovene: Mesia pale imaat, ve imundig pa mateej itaghon Maaron ngar toni. Eemoghon ngar todi ighazooj pa saveej tonenen pughu sone.^p

¹⁰Yesuru tighita mbeb tonenen le isob, ghoro tipul naal, ve timuul tila pa inadi to nepooj.

Yesu ivot pa Maria to Magdala

(Mt 28:9-10; Mk 16:9-11)

¹¹Maria to Magdala imuul ila ivot naal avo, ve iyondyood ve itanjan. Ghoro itugi izi, ve ingig ilooj ila pa naal lolo, ¹²le ighita anjela ru tinepneep. Yesuru tindud di pa nonogiija pisolooja, ve mboledi izi ndug to tighur Yesu paatu igheen pani. Eez inep pa daba, ve ite inep pa aghe.

¹³Anjela ru tonowen tighasoni tighaze: “Liva, yom utanjan pasa?”

Ye ipamuul alijadi ighaze: “Wai, tigham Tiina tiou paatu ila wa. Ve you nakankaan pani. Tighuri sine?” ¹⁴Ghoro indaleel, ve ighita Yesu tau iyondyood. Eemoghon ighilaala maau.

¹⁵Yesu ighasoni ighaze: “Liva, utanjan pasa? Ukaal sei?”

Maria ighaze pa ye uraata eta to ingin ndug tonowen. Tovenen isaav pani ighaze: “Olman, ighaze yom ugham Tiina tiou paatu ila ndug eta, ghoro upaes payou: Ughuri sine? Leso nala naghami.”

¹⁶Tovenen Yesu isaav pani ighaze: “Maria.”

Ye isaav tovene, ghoro Maria ighilaala ighaze nene Yesu tau tonene. Tovenen indaleel, ve isaav pani ila saveej Hibru ighaze: “Raboni!” Saveej tonene, pughu tovene: ‘Patojanjan tiou.’ ¹⁷Yesu isaav pani muul ighaze: “Usavag ghou malep. Pasa sawa to nazala to Taman, nene sone.

Umuul ula to nditazig, ve upaes padi tovene: You pale namuul nazala to Tamaŋ. Ye, yam Tamamim paam. Ve ye Maaron tiou, ve Maaron tiam paam.”^q

¹⁸Tovenen Maria to ndug Magdala ila ivot to yes taghoniija, ve ipaes padi ighaze: “You naghita Tiina toit pa taug matag wa!” Ghoro ipaesia Yesu aliŋa padi ve tilooŋ.

Yesu ivot to taghoniija toni

(Mt 28:16-20; Mk 16:14-18; Lu 24:36-49)

¹⁹Sawa ee moghon tonenen, rabrab toni, yes taghoniija to Yesu tilup di ilooŋ ila rium eez lolo ve tipoon ataam le tuŋia kat. Pasa, timatughez pa yes Yuda. Mala maau ve, Yesu ivot iyoon ila lolodi, ve isaav padi ighaze: “Luuma to Maaron

ineep toman gham.” ²⁰Ghoro ipatoon nima ve waria padi. Yes tighita Tiina todi, ve lolodi poia le poia kat.

²¹Yesu isaav padi muul ighaze: “Luuma to Maaron ineep toman gham. Aazne, you nambaŋ gham ala, inimale Tamaŋ imbaŋ ghou nanim.”^s

²²Ghoro ivib avuvu ila padi, ve isaav padi ighaze: “Agham Avuvu Patabuaŋ irau gham. ²³Ighaze yam apul sosor to tamtoghon eta, nene Maaron paam ireu sosor toni. Ve tamtoghon to ighaze apul sosor toni maau, nene Maaron paam, irau ireu sosor toni maau.”^{t u}

Yesu ivot to Tomas

(Mk 14:14)

²⁴Sawa to Yesu ivot to taghoniija toni, tamtoghon todi eez, iza Tomas, ineep toman di maau. Tomas tonowen, iza ite Didimus. ²⁵Tovenen muri, ghoro tipaes pani tighaze: “Yei nighita Tiina toit wa!”

Eemoghon Tomas ipamuul aliŋadi ighaze: “Ah, ighaze taug matag naghita kiruun inadi to tineep ila nima, ve nazeev nimag u itaghon kiruun inadi tonowen, ve nazeev nimag ilooŋ ila iiz ina to waria, nene pale naghur ila. Ve ighaze maau, nene irau naghur ila saveeŋ tiam tonanan maau!”

q 20:17 Hib 2:11+ **r 20:19** Luuma to Maaron ilup mbeb naol. Yesu imbaad sosor toit atia wa, tovenen Maaron ate yabyab pait muul maau, ve itija Maaron irau talup ghiit tanim ee moghon. Ve Maaron ingin ghiit ve mata pait, tovenen tamatughez muul maau, ve lolood ipatanan muul maau. Lolood poia. Ve aazne, izaad pa ghamuun nepoon poia ila to Maaron to iseengga itaghoni taghoni gha ila. **s 20:21** Mt 28:19 **t 20:23** Saveeŋ tonene, pughu tovene: Ighaze tamtoghon eta ighur ila to Kriŋ, nene pale Maaron ireu sosor toni. Tamtoghon tovene, iit irau tasaav pani taghaze: “Maaron ireu sosor tiom wa.” Ve ighaze tamtoghon eta ighur ila maau, nene ipatoonja ighaze ye ineep ilooŋ ila pooz to Maaron sone. Tamtoghon tovene, iit irau tasaav ghazoona pani: Maaron ireu sosor toni sone. **u 20:23** Mt 16:19+, 18:18

²⁶Mboŋ liim ve ru inim ila, ghero taghoniija toni tilup di muul iloon ila ruum to tinepneep pani ne. Sawa tonenen, Tomas ineeep toman di paam. Yes tipoon ataam tisob tivool le tunja. Mala maau ve Yesu ivot iyoon ila lolodi, ve isaav padi ighaze: “Luumma to Maaron ineeep toman gham.” ²⁷Ghero isaav pa Tomas ighaze: “Unum ugharau, ve ughita nimag, uzeev nimam u itaghon kiruun ina tonene, ve uzeev nimam iloon ila iiz ina to ineeep ila wariag ne. Yom lolom ru iraua! Ughur ila!”

²⁸Tomas isaav pani ighaze: “Yom Tiina tiou, ve Maaron tiou!”

²⁹Yesu isaav pani muul ighaze: “Yom ughita ghou pa taum matam, tauto ughur inim tiou. Ve yes to tighita ghou pa matadi maau, ve tighur inim tiou, nene pale poia to Maaron iza todi ve tinidi iza.”^v

Rau tonene pughu

³⁰Yesu igham mbeb gharatoonadi katindi ila taghoniija toni matadi, lesu ipatoon tau padi, ve tighilaal tighaze Maaron ineeep tomani pa uraat toni. Eemoghon saveeja pida ineeep ila rau tonene maau.^w

³¹Ve saveeja isob to ineeep ila rau tonene, nene pa igham gham aghur ila to Yesu aghaze ye Mesia ve Maaron tau Natu. Leso ye ndamo payam, ve agham nepoon poia ila to Maaron.^x

Yesu ivot to taghoniija toni liim ve ru izi naari to ya naliu Galilaia

21 ¹Muri ghero, Yesu ila ivot to taghoniija toni muul izi naari to ya naliu Tiberias.^y

Ila ivot todi itaghon ataam tovene. ²Simon Petrus, Tomas to iza ite Didimus, Natanael to ndug Kana to ineeep izi Galilaia, ve Zebedi ndinatu ru, toman taghoniija ru paam, yesja tinepneep. ³Simon Petrus imundig, ve isaav pa ndita tonowen ighaze: “You naghaze navot nala napiyaav malum.”

Ndita tonowen tisaav pani tighaze: “Yei paam, itiija tavot tala.” Tovenen yes tisob tila tiza waan, ve tivot tila. Mboŋ tonenen, tiwaswaas le ndugizau. Eemoghon tigham iigh eta maau.^z

⁴Mboŋmaagh, ndoromaaja, ve matadi iloon ila, le tighita Yesu iyondyood izi naari. Eemoghon tighilaala maau. ⁵Yesu imboob ila padi ighaze: “Ou ndipain, agham iigh eta, ma maau?”

Yes tipamuul aliija tighaze: “Waii, nigham eta maau kat.”

⁶Tovenen ye imboob ila padi muul ighaze: “Ighaze venen, ghero apiyaav malum ila pa waan dige to ineeep ila pa nimamim waan. Leso agham amim iigh.” Tovenen tipiyaav malum todi izila muul. Sawa to tighaze tiyoui iza, titoova le tiraua maau. Pasa, iigh katindi tingud ila malum le isami kat.

v 20:29 2Kor 5:7; 1Pe 1:8 w 20:30 Yo 21:25 x 20:31 Ro 1:17; 1Yo 5:13
y 21:1 Tiberias, nene ya naliu Galilaia iza ite. z 21:3 Lu 5:4+

⁷Taghoniija to Yesu lolo pani kat, ighita mbef tonenen, ve isaav pa Petrus ighaze: “Nowe avaat Tiina toit!” Sawa tonenen, Simon Petrus iduduum nonogiija toni to moŋejaan izi, ve ighamgham uraat. Ye iloon saveeŋ tonenen, ve rikia moghon indud olija muul, ve iyatova izila ya, ve iwai iloon ila pa naari. ⁸Yes tipot tigharau naari, irau 100 mita ma venen. Tovenen taghoniija pida to tineep ila waan pogho, tiweu malum toman iigh, ve titaghon Petrus ve tiloon tila pa naari. ⁹Tiloon kurukia ve tiyatov di tizi, ve tighita mberet toman iigh inepneep izala yab ngiliŋi.

¹⁰Yesu isaav padi ighaze: “Igh to ngaramus agham di ne, agham pida tinim timoz.”

¹¹Tovenen Simon Petrus ivot muul ila izala waan, ve iyou malum toman iigh iloon inim taan. Igh tingud tila malum le isami kat. Eemoghon imotmot maau. Igh geegeu maau. Tintinadi moghon. Tinin di le irau 153.

¹²⁻¹³Yesu isaav padi muul ighaze: “Mboŋmaagh wa. Anim aghan amim aniiŋ.” Ye isaav tovene, ve nima ila pa mberet toman iigh tonowen, ve ireii padi. Taghoniija toni eta avo ikaak ve ighasoni ighaze: “Yom sei?” ne maau. Timatughez pa ghasoniiji. Pasa, tighilaala tighaze ye Tiina todi.^a

¹⁴Yesu imundig pa mateeŋ, ve ivot to taghoniija toni pae ru ila wa. Ve ite tonene inim tol pani.

Yesu ighur Petrus pa uraat muul

¹⁵Yes tighan le isob, ghoru Yesu ighason Simon Petrus ighaze: “Aa Simon, Yoan natu, vena? Yom lolom payou kat ilib pa nditam pida tonene, ma maau?”

Petrus ipamuul aliŋa ighaze: “Vee! Tiina, yom uwatag, you lolog payom.”

Yesu isaav pani ighaze: “Upan sipsip tiou papaghu.”^b

¹⁶Ghoru Yesu ighasoni muul inim pae ru ighaze: “Simon, Yoan natu, yom lolom payou kat, ma maau?”

Petrus ipamuul aliŋa ighaze: “Vee! Tiina, yom uwatag: You lolog payom.”

Yesu isaav pani ighaze: “Uŋgin poian sipsip tiou.”

¹⁷Ghoru Yesu ighasoni muul inim pae tol ighaze: “Simon, Yoan natu, yom lolom payou, ma maau?”

Petrus iloon Yesu igham ghasoniij tonenen pani inim pae tol, le lolo ipatajan. Tovenen ipamuul aliŋa ighaze: “Vee! Tiina, yom uwatag mbef to naol ne. Yom uwatag, you lolog payom.”

Yesu isaav pani ighaze: “Upan sipsip tiou.”^c

¹⁸Onoon kat, you nasaav payom: Sawa to yom paghum, taum ulul kawaal tiom iza ve upus ghom. Ve ndug sine yom to ughaze ula pani, nene ula

a 21:12-13 Mbanj 10:41 b 21:15 Mbanj 20:28; 1Pe 5:2 c 21:17 Lu 22:61+

moghon. Eemoghon muri, sawa to unum olman waat, nene pale upaat nimam, ve ngeu ite ilul kawaal tiom iza ve ipus ghom. Ve ndug to yom ughaze ula pani maau, ye pale igham ghom ula pani.”¹⁹ Saveeŋ tonene, Yesu isavia iza to ataam to Petrus pale imaat, ve ipaghazonŋan Maaron iza tiina.^d

Ve Yesu isaav pani muul ighaze: “Utaghon ghou!”^e

Taghoniija to Yesu lolo pani kat

²⁰ Petrus yesuru Yesu tilaagh tila, ve Petrus itoora, ve mata imuul le ighita taghoniija to Yesu lolo ineeŋ toni kat, itaghon di inim. Muuŋ, sawa to tilup di pa ghanghaniij to Pasova, ngeu tonowen to indaleel pa Yesu, ve ighasoni pa sei to pale ighuri ila koia nimadi.^f

²¹ Petrus ighita taghoniija tonowen, ve ighason Yesu pani ighaze: “Tiina, vena pa ngeu to inim ne?”

²² Yesu ipamuul aliŋa ighaze: “Matam ila pani malep. Ighaze you naghaze ye ineeŋ le irau namuul nanim, nene yom mbeb tiom maau. Nene ineeŋ to you taug. Yom irau matam iŋgal taum, ve utaghon ghou.”

²³ Yesu isaav pani tovene, tauto muri saveeŋ ilaan irau toŋvetaz naol to tighur ila to Krisi, ve tighaze pa taghoniija toni to ye lolo pani kat ne, irau imaat maau. Eemoghon Yesu isaav tovene maau. Ye isaav moghon tovene: “Ighaze you naghaze ye ineeŋ le irau namuul nanim, nene yom mbeb tiom maau.”

²⁴ Taghoniija tonowen, to ighita katin mbeb tisob tonenen, ve imbood di ila rau tonene. Leso ipariaaŋ saveeŋ to Yesu ve tamtoghon tighur ila toni. Ve yei niwatag: Saveeŋ toni, nene onoon moghon.^g

Saveeŋ to ipasob rau tonene

²⁵ Yesu igham uraat katindi. Eemoghon timbood di tisob tila rau maau. Timbood eŋaerŋa moghon. Ve inimale timbood uraat toni tisob tila rau, tone rau tonenen tivot tinim katindi kat le tipavonin taan isob, ve pida ledi inadi maau!^h

d 21:19 Kamos muŋginadi pida tisaav tovene: Muri, Petrus ila ineeŋ izi ndug tiina Rom. Sawa tonenen, kinik to Rom ighur pataraŋi naol pa yes Kristen, ve irab tamtoghon todi katindi timatmaat. Eemoghon Petrus imatughez maau. Iyoon ariana, ve ivovotia varu poia le irau yes Roma tikisi ve tirabi izala ai pambarooŋ. Eemoghon Petrus lolo pa imaat raraate inimale Krisi maau. Tovenen isaav pa yes ndaaba, ve tirabi aghe izala ve daba izi.
e 21:19 Mk 1:16+; 2Pe 1:14 **f 21:20** Yo 13:23+ **g 21:24** Yo 19:35 **h 21:25** Yo 20:30